

IAZ.
III

I


BIBLIOTECA NAZ.
Vittorio Emanuele III

XLII

B

67

NAPOLI



XII

B

63



LA
COMPAGNIE
DU VOYAGEUR,

• V RECVEIL D'HISTOIRES,
Bons-Mots, & Discours plaisans.

Choisis pour la RECREATION des
AMES vertueuses;

ET POUR RELOVR LES PLUS
MELANCHOLIQVES.



IMPRIME

Dans la Belle-Saison, par LAQUELLE
GAILLARD.



L A
COMPAGNIE
DV VOYAGEVR,

OV RECVEIL D'HISTOIRES,
Bons-mots, & Discours plaisans.

Choisis pour la RECREATION des
AMES vertueuses.

*Naisveté d'un Lacquais en pais
estrange.*



N Lacquais qui n'étoit iamais sorty de Paris, y trouua vn Maistre, qui le prit pour le mener à Rome, comme il eust passé les Monts, & arrivé à Thurin, son maistre qui estoit à la suite de Monsieur l'Ambassadeur (qui fut deffrayé luy & son train aux despēs de son Altesse de Sauoye) l'envoya avec vn billet pour faire apprester sa chambre dans la ville, car son Altesse logeoit l'Ambassadeur chez luy, & les Gentils hommes chez les plus apparens Bourgeois de Thu-

rin, ce lacquais s'estant fait montrer la maison, entre dedans, & voulant parler à ses hostes, il fut tout estonné qu'il ne les entendoit point, ny eux luy, donc tout estonné il vint trouver son maistre, luy disant, Monsieur, que voicy vn sot pays, on n'y parle pas comme à Paris, ie leur ay demandé de l'eau, & des gens qui ont de la barbe au menton, ne m'entendoient pas, & à Paris des enfans de trois ans m'entendent bien, il s'est trouvé là vn homme qui entendoit bien leur jargon, qui m'a dit qu'ils n'ont garde de m'entendre, & qu'il faut ici demander de l'aigue. De l'aigue ? Dieux quelles sottises gens, ne vaut-il pas bien, mieux demander de l'eau, tout le monde entend bien cela ! Ce n'est pas encor le tout, Monsieur, on ne conte pas ici les heures comme à Paris, (car en Italie on commence à conter les heures par le coucher du Soleil) ils m'ont demandé à quelle heure vous vous viendriés coucher, ie leur ay dit, que vous viendriez à dix ou onze heures, ils disent que c'est demain au matin ; vit-on iamais au monde plus sottises gens.

LE mesme lacquais estant arriué à Florence avec son maistre, il fut au Dome
avec

avec luy pour ouyr Messe, mais trouuant la Messe plus qu'à demy dite, il desiroit sçauoir si on n'en diroit pas encor vne autre, ce lacquais va demander à celuy qui auoit aidé à dire la Messe, si c'estoit la dernière, & si on en recommenceroit point bien tost vne autre; ce garçon qui n'entendoit pas son patois, luy dit en Italien qu'il n'entendoit pas ce qu'il disoit, son maistre oyant cela, dit à son lacquais, que c'estoit vn brutal de luy parler en François, veu que depuis le temps qu'il estoit en Italie, il voyoit bien qu'on y parloit autre langue que la sienne, & qu'il n'auoit garde de luy respondre: le lacquais haussant la teste, dit à son maistre, que ce n'estoit que pure meschanceté qui le tenoit, & qu'il respondroit bien s'il vouloit, parce que quand le Prestre disoit *Dominus vobiscum*, il auoit bien ouy que l'autre auoit respondu, & *cum spiritu tuo*.

LE mesme lacquais estant arriué à Rome demandoit à son maistre si la Seine de Rome estoit aussi grande que celle de Paris, où estoit le Louure, la place Maubert & les Thuilleries, croyant que tout cela deuoit estre à Rome comme à Paris.

qui n'en estoit iamais sorty, fut rauy d'aller en lieu où il pourroit voir le Roy, dont il auoit tant ouï parler; il escheut que comme ils entroient dans Paris, le Roy reuenoit à cheual de Saint Germain, comme on luy eut montré, il se prit à rire, disant, quoy? c'est là le Roy? ie pensois bien qu'il fut autrement fait: & l'interrogeant comment ils s'imaginoient qu'il fut fait, il dit qu'il croyoit qu'il fut tout d'or, & qu'il pensoit qu'il eust la main bien plus grande, parce, dit il, qu'on faist dernièrement nostre vache en la main du Roy, & ie voy qu'elle n'y scauroit pouuoir. Passant par dessus le Pont-neuf avec son maistre, le lacquais vid le cheual de bronze, & s'escriant, dit à son maistre, Monsieur, voila vn soudart, il me regarde, ie pense qu'il me connoist bien. Trois ou quatre iours apres y repassant, & le voyant, dit à son maistre, Monsieur, voila encor ce soudart à la même place où il estoit dernièrement.

CE mesme lacquais estant avec son maistre qui estoit en compagnie de quelques Gentils-hommes de ses amis, voulant passer par vne porte, ils se firent entre eux plusieurs complimens à qui passeroit le premier. Apres plusieurs contestations

HISTOIRES, &c.

ils obligerent son maistre à passer deuant le
 lacquais croyant qu'il y alloit de son hon-
 neur, s'il ne suiuoit immédiatement son
 maistre, pensa cullebuter les autres, pour
 estre à sa queue, ce que voyant son maistre
 apres que la compagnie fut partie, il reprit
 son lacquais, le menaçant de le chastier, si
 vne autrefois il se mesloit de passer auant
 que toutes les honnestes gens fussent passez.
 Ce lacquais retint si bien ce commande-
 ment, qu'un iour comme son maistre alloit
 à cheual à la rue S. Iacques, & passoit par
 dessus le Pont Nostre Dame, il regarda der-
 riere luy estant deuant S. Yues, & ne
 voyant point son lacquais, il creut qu'il
 s'estoit esgaré; il demeura deux ou trois heu-
 res chez vn Libraire, & comme en retour-
 nant il passa par dessous le petit Chastellet,
 & vid son lacquais le chapeau au poing,
 qui faisoit la reuerence, à tous ceux qui pas-
 soient, son maistre luy demanda ce qu'il fai-
 soit là, il luy respondit, j'attends que tous ces
 honnestes gens là soient passez; il prenoit la
 vouëte du petit Chastelet pour vne porte.

Autre naïfueté d'un Lacquais.

VN certain lacquais aussi naïf pour le
 moins que cettuy-cy, estant à Paris au
 seruice.

seruice d'un Gentil homme, son maistre en un Dimanche matin estant conuié de dîner chez un homme de condition, où il y auoit fort bonne compagnie, tant d'hommes que de femmes, on fit auant dîner vne partie pour aller apres à la promenade, à laquelle les Dames conuièrent le maistre de ce laquais, qui s'en excusa, disant auoir donné parole à un Gentil-homme, à qui il auoit necessairement affaire, de l'aller trouuer l'apres dînée, mais la verite, estoit que c'estoit vne Damoiselle à laquelle il auoit promis de l'aller voir les Dames là dessus s'insisterent fort, afin qu'il fust de la compagnie, voyant cela, il dit qu'il alloit enuoyer son laquais à ce Gentil-homme pour sçauoir à quelle heure il le pourroit trouuer, il appelle ce laquais, & l'enuoye vers cette Damoiselle, luy disant tout bas qu'il s'allast informer d'elle, à quelle heure il la trouueroit alloué, mais qu'en luy rendant responce deuant le monde il se gardast bien de parler de Damoiselle, mais de Gentil-homme, & qu'il s'empeschast bien de se couper, il s'en va, & quelque peu apres la compagnie, se mit à table. Comme on estoit au milieu du dîné, le laquais arriué, à qui son maistre dit tout haut, & bien qu'y a-t'il? monsieur,

dit il, ie viens de chez ce Gentil-homme, où vous m'avez enuoyé, à qu'elle heure, dit le maistre, le trouueray-ie au logis? Monsieur, dit-il, m'a dit que vous veniez à telle heure qu'il vous plaira, & qu'il vous y attendra sans en sortir. Que faisoit-il? dit le maistre? Monsieur, respondit le lacquais, ie l'ay laissé qui prenoit sa coëffe, & son masque pour aller à la Messe. Là dessus tout le monde se prend à rire, & par la sortise du valet la fourbe du maistre fut decouuerte.

Naisiveté d'un autre Lacquais

VN Gentil-homme auoit vn lacquais fort seruiable, mais extrêmement simple, comme vn iour il auoit conuié cinq ou six de ses amis pour faire débauche chez luy, estans à table, & n'ayans personne à les seruir que ce petit lacquais, il leur fait mettre à chacun leur verre plain sur la table, chacun devant soy, & dit à son lacquais, si tost que tu verras vn verre vuide, ne manque pas de le remplir aussi tost, car si i'en voy vn seul vuide, ie t'estrilleray bien; ce pauvre petit lacquais ne faisoit autre chose qu'aller & venir, à la fin voyant qu'il

qu'il y en auoit vn de la compagnie qui vuidoit son verre aussi-tost qu'on luy auoit rempli, il se mit à pleurer au bout de la table, son maistre s'informant ce qu'il auoit à pleurer, il luy respondit, vous m'auiez menacé de me battre, si ie laisse vn verre vuide, ie n'en scaurois tant seruir, car quand il n'y auroit que Monsieur tout seul, moustrant celuy que i'ay nommé cy-dessus, ie n'en scaurois seulement venir à bout, car autant de fois que ie luy emplis, il le vuide tout aussi-tost.

Autre naïfueté d'un Lacquais.

VN Gentil-homme auoit vn petit lacquais fort simple, & comme il auoit dessein le lendemain de se leuer de fort grand matin, il commanda à son lacquais de l'esveiller dès cinq heures. Le lendemain le lacquais dès quatre heures se trouua à la chambre de son maistre, & le laissa dormir iusqu'à ce qu'il se resueilla de luy-mesme, qui fut sur les sept heures du matin. Estant esueillé il demanda à son petit lacquais quelle heure il estoit, il luy dit qu'il estoit sept heures, comment dit le maistre, maraut, t'auois-ie pas commande d'estre icy dès cinq heures? Monsieur, dit-il, i'y estois dès quatre

heures, pourquoy donc, luy dit-il, ne m'as-tu pas esueillé ? il luy respondit, ie n'osois, Monsieur, car vous dormiez.

Autre sur le mesme sujet.

Cettuy-cy ne fit pas de mesme, car comme son maistre lui auoit expressement enchargé de l'éueiller ponctuellement à six heures, ayant à cette heure vne affaire tres-importante, la crainte d'estre surpris le fit veiller vne partie de la nuict, & s'esueillant en sursaut, craignant qu'il ne fust trop tard, il se leue, & entend sonner quatre heures, ce que voyant, il va trouuer son maistre, qui dormoit profondement. & le tira tant qu'il l'esueilla : Payant esueillé il luy dit, Monsieur, n'ayez crainte de rien, dormez en assurance, vous auez encores deux bonnes heures, car quatre heures viennent de sonner.

Naifveté d'un Payſan enuers son Iuge.

LAissons les Naifvetez des lacquais, nous en auons donné assez d'exemples, venons à la Naifveté d'un Payſan enuers son Iuge, qui n'est pas mal plaifante. Vn Iuge auoit condamné vn pauvre homme à estre pendu, le bourreau commanda à vn

Charpentier

Charpentier du lieu de faire la potence , le Charpentier n'en tint conte, disant, qu'il en auoit desia fait deux ou trois, dont il n'auoit point este payé , & qu'il n'en feroit point sans argent ; le bourreau luy dit qu'il verroit ce qui luy en arriueroit, faute de potence l'execution ne peut estre faite pour ce iour là , dont le Iuge fort en colere enuoye querir l'executeur pour sçauoir de luy à quoy il auoit tenu , il s'excusa sur le Charpentier , qui n'auoit pas voulu faire la potence, quoy qu'il luy en eust fait commandement de la part du Iuge : le Iuge aussi tost l'enuoye querir, estant deuant luy , il luy fit vne fort rude reprimande , de n'auoir pas obey à son commandement, à quoy le Charpentier respondit, il est vray, Monsieur , que j'ay refusé de la faire sur la parole de l'Executeur, parce que j'en ay desia fait d'autres , dont ie n'ay peu estre payé , mais si j'eusse creu que la potence eust esté pour vous ie n'y eusse pas manqué , & eusse laissé toutes affaires.

Naïfueté d'un Docteur ignorant.

VN certain Docteur , ou se disant tel, pour le moins luy auoit on fait croire qu'il estoit, estant en compagnie, vn certain

homme parlant à luy, & n'usant pas du respect qu'il croyoit luy estre deu, luy dit; Est-ce ainsi que vous parlez à vn Docteur? Docteur? respondit cét autre, excusez moy s'il vous plaist, ie ne scauois point que vous eussiez cette qualité-là; mais encor dites-moy ie vous prie en quelle science c'est. En verité respondit le pretendu Docteur ie n'en scay rien, mais i'en ay les Lettres: chez moy.

Autre naïfueré d'un Moyne Espagnol.

VN Cordelier François, député de sa Province, alloit au Chapitre general de son Ordre qui se tenoit à Salamanque, comme il estoit homme de reputation & de lettres, il fut bien receu & réueré de diuerses maisons de son Ordre en Espagne, mais entre les nouuelles qu'on luy demandoit de son pais, cette-cy merite d'estre enroollée. Mon Pere, luy demandoit vn Pere graue, y a-il encore en France quelque peu des Peres de nostre Ordre qui soient Catholiques. Cé Pere luy riant au nez sur vne si fallotte demande, luy respondit, Tous le sont, mon Pere, par la grace de Dieu, l'autre hochant la teste: tous, reprit-il, ouïy tous, c'est pour sauuer l'honneur

neur de v^{ost}re nation que vous dites cela. A v^{ost}re aduis, ce bon Moyne Espagnol estoit-il fort simplifié.

Autre Naïveté d'un Curé.

DAns le fond des Alpes, il y a des contrées où tous les habitans ont de grosses loupes à la gorge, aussi enflées que la teste, & ils appellent cela au langage du pais des goüestres. Vn iour vn François allant en Italie, passoit par vn de ces villages, & estant vn iour de Dimanche, il voulut entendre la Messe, qui n'estoit autre que la parroissiale. Comme le Curé faisoit son Profne, il se void interrompu à chaque mot par le ris de ses parroissiens, il ne sçauoit d'où leur procedoit cette humeur de rire. A la fin s'en estant enquis, quelqu'un luy dit, qu'il regardât le col de cét estranger, & puis qu'il s'abstint de rire s'il pouuoit. Le Curé voyant le François qui auoit le col rond & long sans aucun goüestre; eut eu de la peine, sans le don de continence, à s'abstenir de rire, neantmoins la peur de scandaliser la compagnie le fit mettre sur le graue & le serieux, & reprenant ses parroissiens de leur immodestie, il leur disoit: Faut-il, Messieurs, se mocquer de

la sorte de ceux à qui Dieu n'a pas donné tous leurs membres, ne sçavez vous pas qu'il faut supporter les deffauts du prochain, & les courir, s'il en estoit de besoin, de nostre manteau : pensez-vous que cét honneste homme encore qu'il n'ait point de Gouëstre ne soit pas capable du Paradis aussi bien que vous : Non, non, l'Euangile nous apprend qu'il vaut mieux entrer au Royaume du Ciel borgne, bossu, boiteux, ou sans gouëstre, que d'estre ietté en la gehenne avec la taille belle, & les plus accomplis gouëstres du monde. Le bon homme s'imaginoit gouëstreux, qu'il estoit aussi bien que les autres, que ces loupes fussent vne partie necessaire à la beauté de la composition du corps humain, & que sans cela, il n'estoit pas entier.

Naïfueté d'un Valet.

VN Gentil-homme se faisoit peindre en la presence d'un de ses amis, quelques iours apres ce Gentil-homme enuoyant son lacquais chez cét amy, il l'interroge ce que faisoit son maistre, il luy respond, qu'il se faisoit peindre : comment dit cét amy, il se fait peindre ? l'estois dernièrement chez luy, où le Peintre mettoit la derniere main au vilage,

visage, il faut donc qu'on traualle maintenant au pourpoint: le lacquais respond, ie ne sçay pas Monsieur, mais ie n'ay veu que le Peintre, ie n'ay point veu de Tailleur.

Autre Naïfueté.

EStans en compagnie, certaines personnes, comme on discouroit de la nature des poissons, on vint à parler des harangs, disant que personne n'a veu harang en vie, parce que si-tost qu'il est hors de l'eau ils meurent; à quoy vn de la compagnie s'opposa, disant, qu'il auoit veu vn harang en vie à Poictiers, & si cette ville est plus de vingt lieues distante de la mer. Les autres dirent que cela ne pouuoit estre, vn d'eux voulant encherir sur la menterie, va dire, pourquoy cela ne peut-il pas estre? l'ay bien veu à Bourdeaux vn harang-foret en vie, il est vray qu'il n'est pas si esloigné de la mer que Poictiers.

Autre Naïfueté.

LE Roy allant faire son entrée en vne certaine ville du bas Languedoc, les habitans (ne l'ayans iamais veu, & pas vn d'eux-

mesme n'ayant iamais esté à Paris, hormis vn qui y auoit fait son voyage, il y auoit long-temps) furent fort en peine de quelle façon il le falloit receuoir, & quel present ils luy deuoient faire; sur cette incertitude, ils se resolurent de demander aduis à celuy qui autresfois auoit esté à Paris, s'imaginant qu'il deuoit estre bien plus sçauant en cette matiere qu'eux. Ils l'enuoyerent donc querir, luy conterent la peine où ils estoient, pour ne sçauoir comme ils deuoient receuoir le Roy, le prièrent, luy qui auoit esté à Paris, de leur vouloir donner aduis là-dessus, & mesme quel present ils deuoient luy faire des fructs du pais, qu'ils n'en auoient point d'autre que des figues & des pignons, qu'ils le prioyent de leur dire s'ils luy deuoient presenter des figues, ou des pommes de pin. Cettuy cy glorieux de se voir consulté en vne chose, où il estoit aussi ignorant qu'eux: & en laquelle pourtant il vouloit faire l'entendu, & l'homme de conséquence, il leur dit qu'ils le laissassent faire, leur conseille de luy presenter des figues, que cela seroit bien plus honorable que des pommes de pin: leur dit qu'ils enuoyassent querir six bassins d'argent, qu'il les falloit remplir de figues qu'il porteroit le premier, que les
autres

autres le suiuoient , & que chacun prit bien garde comme il feroit , afin de faire la mesme chose que luy. Ils emplierent donc de figures six bassins d'argent, il en prit vn , & donnerent les cinq autres aux cinq plus suffisans de la ville, ils firent en apparat les presenter au Roy , à qui on fit sçauoir que les députez de la ville le vouloient saluer , le Roy les fit entrer , celui qui menoit les autres entre le premier , & sans prendre garde qu'il falloit descendre deux marches , ayant la teste leuée , & marchant tout droict , ne manque point à se laisser choir tout de son long : les autres qui le suiuoient , ayans ordre de l'imiter en toutes choses , pensant que ce fust vne submission qu'il fallust rendre au Roy de cette façon-là , ne manquerent pas à se jeter tous à terre , & de resprendre leurs figures , comme auoit fait le premier : Ce que voyans ceux qui estoient à la suite du Roy , ramassans ces figures , les jetterent toutes à la teste de ces pauvres Deputez , qui s'estant releuez suivirent leur Conducteur , qui n'osant parestre avec sa courté honte , s'en retourna au logis, où estans arriuez , les compagnons en pre-

il prend la chandelle, & s'approche du miroir, & approchant la chandelle de sa barbe, il se la brula toute, & voyant son menton plus large eneor qu'il ne pensoit, & ce qui luy estoit arriué, dit, cettuy-cy est esprouué, & le cotta à la marge, voulant dire qu'il auoit fait paroistre vn trait de sa sottise.

D'un Gentil-homme & d'une Villageoise.

VNe ieune Villageoise couroit apres son aînesse, qui alloit au lieu où elle auoit vn petit poulain. Il passa par là vn Gentil-homme, qui la voyant assez iolie, luy dit: D'où estes vous mamie? De Ville-luif, Monsieur, respondit elle, De Ville-luif, dit le Gentil-homme, connoissez vous point là la fille de Nicolas Guillot. Ouy Monsieur, respondit la fille ie la cognois fort bien; le vous prie, lui dit il, faites moi la faueur de lui porter vn baiser de ma part, & se mit en posture de la vouloir baiser, cette ieune fille respondit, Monsieur, si vous avez haste, donnez le à mon aînesse, elle y sera plustost que moy, & le disant, s'eschappa de ion galand, qui demeura avec sa courte honte.

D'un Prince, & d'un Astrologue.

VN Prince Souuerain rencontra vn iour en son chemin vn homme qui se mesloit de predire les choses par l'Astrologie, en laquelle il s'estudioit fort. Cét Astrologue, luy dit, Monseigneur, ie suis bien aise de vous auoir rencontré, ie vous cherchois pour vous donner vne mauuaise nouuelle, dont pourtant il est necessaire que vous soyiez averty, pour donner ordre à vos affaires, ce que ie vous conseille de faire au plûtost, & dauantage encor à vostre conscience; car ie vous declare pour chose tres-asseurée, que vous n'avez pas encor trois mois à viure; Comment le sçais-tu mon amy, luy dit ce Prince, ie le sçay, Monseigneur, dit-il, par le moyen de l'Astrologie, qui m'apprend que vous mourrez dans ce temps-là, mais d'une mort violente. Et toy, dit le Prince, as-tu pourueu de quelle mort tu dois mourir? Ouy, Monseigneur, ie dois mourir d'une fièvre chaude. Or, dit le Prince, ie te veux faire voir que tu es vn resueur, & que la science te trompe; ie veux que tu sois pendu tout à cette heure, & à l'instant commanda à ses gens de le mener en prison, & de le

le faire prendre, ce que voyant le pauvre Astrologue, il luy dit, voyez Monseigneur, que ie vous ay dit vray, taisez-moy le poëlx, ie vous prie, & vous verrez si ie n'ay pas la fièvre bien chaude, par cette subtile eschapatoire, il eut la vie sauue.

Autre sur le mesme sujet.

VN Seigneur rencontrant vn pâyfan en son chemin, il luy dit; Où vas-tu? le pâyfan luy respondit asses brusquement; Que sçay- ie moy. Le Seigneur voyant l'impertinente responce du pâyfan, & le peu de respect qu'il luy portoit, dit, tu n'en sçais rien, ie te vais enseigner à parler d'une autre façon; qu'on le meine en prison tout à cette heure. Il le fait prendre par ses gens, ce que voyant le pauvre pâyfan, il dit Monsieur, voyez ie vous prie, que ie vous ay bien respondu; car ie vous jure que ie ne sçauois pas que j'allois en prison, le Seigneur se prenant à rire de cette naïfue responce le laissa aller en liberté.

D'une Carpe eschapée.

Cardin Lorin estoit vn Apothicaire de Roüen, yn des plus facetieux hommes

de son temps, estant allé en vn iour maigre sur le pont de Robec acheter vne carpe pour le dîner de luy & de sa famille, passant par dessus le Pont, cette carpe qui estoit toute vifue, voyant l'eau, eschappe de ses mains, & se lance dedans: Le pauvre homme tout estonné, s'en va à sa maison, où il trouue sa femme & les enfans, à qui il dit, venez çà, suivez moy, il les meine tous sur le pont de Robec, où la carpe luy estoit eschappée, & les ayans tous fait mettre à genoux, leur fit dire graces.

Naïveté d'un Voleur.

VN des plus grands voleurs du païs fut vn iour pris par les Archers du Preuost, qui l'emmenèrent deuant luy, luy disant, Monsieur, voicy ce grand voleur que nous vous emmenons, qui a fait tels & tels vols en tels lieux, & à tels: Ce voleur respond, i'ai bieu fait pis, Monsieur, il est vray, repartit vn des Archers, c'est luy qui vola & assassina vn tel, il respond encor, i'ay bien fait pis, Monsieur, les autres contans encor d'autres vols, & d'autres assassinats: Cettuy-cy respondoit tousiours i'ai bien fait pis; le Preuost luy demandant ce qu'il auoit fait de pis, il dit, ie me suis laissé prendre, comme

comme il eut entendu prononcé son Arrest de condamnation à estre pendu & estranglé. il dit, Monsieur, s'il faut pendre tous les voleurs, il y a long temps que vous le deussiez estre; Comment? repliqua le Preuost. Parce, dit le voleur que tous les Preuosts le sont, & les lettres de leur nom ne chantent autre chose, P. veut dire prend, R. veut dire raffe, E. emporte, V. vole, O. oste, S. serre. T. tire ou tout. De sorte qu'en disant Preuost, on dit prend, raffe, emporte, vole, oste, serre, tout. Mais tout ce discours n'empêcha point que ce pauvre diable ne passa le pas: Tant les voleurs haïssent ceux qui les ressemblent, afin que sans seuls leur part du larcin soit plus grande.

Naïveté de Rabelais.

Rabelais a esté de tout temps conneu pour vn homme des plus habiles de son temps, & d'une humeur fort iouiale & recreatiue, comme vn iour il estoit à la suite du Cardinal de Lorraine, qui estoit à Rome l'accompagnant lors qu'il fut voir la Sainteté, il vid que le Cardinal son maistre se prosterna à genoux deuant elle, & luy baïsa le pied comme on a accoustumé, il tourna les dos, & s'enfuit, & ferma rudement la porte.

apres luy, le Cardinal estant de retour chez luy, luy reprocha l'affront qu'il luy auoit fait, & lui demanda qui l'auoit obligé à faire vne telle sottise : A quoy Rabelais respondit, comment, Monsieur, srie voy que vous qui estes mon maistre, Cardinal & grand Prince, estes reduit à luy baisser les pieds, moy qui ne suis qu'un maraud, au prix de vous, ay-je pas eu raison de croire qu'il eust fallu que ie luy eusse baissé le derriere? car il n'eust pas esté raisonnable qu'on m'eust traité à l'égal de vous.

Naisueté d'un Plaideur.

VN villageois de Normandie auoit baillé à vn sien voisin vne terrinée de lait à luy garder, quand il luy redemanda sen lait, ce voisin, soit qu'il l'eust mangé, ou respendu, lui dit que les mouches l'auoyent mangé, sur quoy ce villageois le fait assigner estant deuant le iuge, & ayant fait plaider sa cause, le iuge le condamne à payer la terrinée de lait, le voisin s'en veut excuser, disant que les mouches l'auoient mangé; A quoy le iuge respondit, qu'il les deuoit auoir tuées; Quoy? respond le païsant, est-il donc permis de tuer les mouches? le iuge luy dit qu'ouy: en quelque lieu que ie les

les trouue, Monsieur, respond le païsan :
 Ouy dit le luge, en quelque lieu que ce soit
 ie te le permets : Lors le païsan voyant vne
 mouche sur la joüe du luge, s'approche de
 luy, & luy baïlle vn beau soufflet ; disant la
 voila la galande de mouche, ie gage que
 c'est vne de celles qui ont mangé mon lait.
 Le luge, quoi qu'il se sentist frappé, n'osa
 faire aucune instance, veu la permission
 qu'il lui en auoit donnée.

Jugement naïf.

VN homme estant dans vne Eglise en
 priant Dieu, il trouue vne bourse au-
 pres de lui qu'il ramasse, & la voyant pleine
 d'or, il appelle deux de ses amis, auxquels il
 raconte la bonne fortune qu'il lui estoit ar-
 riuée, & sur cette trouueure vont boire en
 vn cabaret proche de là. Celui qui l'auoit
 perduë reuiet sur ses pas, s'informe dans
 l'Eglise si on n'a point veu vne bourse, on
 lui dit qu'on auoit veu vn ieune homme,
 dont on lui dit les marques, estant sorti, &
 s'enestant informé à ceux de dehors, il ap-
 prend d'eux. que celui-là mesme avec deux
 ou trois de ses amis estoient entrés en tel ca-
 baret qu'on lui marque, il va tout à l'heure
 querir vn Sergent, pour lui faire rendre cet-

te bourse qui lui appartenoit, ils entrent tous dans le logis, & le trouuant à table, lui demandent s'il n'auoit pas trouué vne telle bourse, dont ils lui disent les marques; le ieune homme ne le pouuant nier l'aduouë, tire la bourse & la veut rendre à celui à qui elle appartenoit, mais il dit, qu'ils venoient de conter, & que pensant auoir fait fortune il auoit conuié ses amis à faire collation, qu'il auoit despensé vn écu, qu'il ne s'en falloit que cela de son argent, l'homme dit, qu'il vouloit auoir son argent entier, sans que rien lui manquast, & l'autre n'en ayant point pour lui rendre, d'autant que c'estoit au pais de Normandie, celui qui auoit perdu sa bourse fait haro sur celui qui l'auoit trouuée, le Sergent lui veut mettre la main sur le collet, il se sauue dans la rue, à la faueur de ses amis, le Sergent avec sa partie apres lui, il court si vite, qu'en son chemin il rencontre vne femme preste d'accoucher qu'il poussa si rudement, qu'il la fit accoucher deuant terme, se voyant environné de tous costés, & ne pouuant esquiuier, il rencontre vn asne par la rue, il le prend par la queue, faisant tourner les gens tout à l'entour de lui, & la tire si rudement qu'il lui arracha la queue, ne se pouuant sauuer il vid vne eschelle d'un

d'un maison qui couuroit vne maison, il monte en haut de l'eschelle, sa partie prend le pied de l'eschelle, & la secouë si rudement, qu'il fait tomber cét homme qui estoit dessus, qui cheut sur lui, & rompit vn bras au Sergent, il fut pris & mené deuant le Iuge chacun crioit contre luy, l'un demandant sa bourse & son argent, le mary de la femme grosse demande ses interets de son enfant qui estoit mort, & la femme en danger. Le maistre de l'asne demande qu'on lui paye son asne, qui auoit la queuë arrachée: Le sergent l'interest de son bras rompu: Le Iuge ayant ouï les raisons d'un chacun, ordonne que pour l'argent puis qu'il n'auoit pas les cent escus iustes, qu'il garderoit la bourse & l'argent iusques à ce qu'il eust la somme entiere. Pour l'homme qui demandoit l'interest de son enfant mort, le Iuge ordonne qu'il feroit peuser la femme, & quant regnerie il coucheroit avec elle, & la garderoit iusqu'à ce qu'il luy eust fait vn autre enfant: Pour le maistre de l'asne, le Iuge ordonna que le mal faicteur garderoit l'asne, & s'en seruiroit iusqu'à ce qu'il luy fust reuenu vne queuë: Et pour le Sergent, qui auoit le bras rompu, le Iuge ordonna que le Sergent monteroit au haut de l'es-

chelle, & se laisseroit tomber sur le criminel, pour luy rompre vn bras, comme il auoit fait le sien; le Iuge auoit fait sans doute ieu la Loy qui ordonne au mal faicteur la peine du talion. Il n'y en eut pas vn qui ne se portast pour appellant de la sentence.

Simplicité d'une bonne Femme.

VNe bonne femme assez simple auoit vn procez criminel deuant le Iuge, qui n'estoit gueres plus habile qu'elle, comme par son Aduocat elle auoit fait représenter la cause & la raison qu'elle auoit de poursuivre sa partie, l'Aduocat qui soutenoit la cause de sa partie, en niant vne partie du fait, allegua Bartole, cette femme soudain l'interrompit, croyant que c'estoit quelque faux tesmoin, qu'il vouloit produire, disant, Monsieur, ie vous iure que Bartole n'y estoit point. Le Iuge aussi simple que cette pauvre femme, voiant qu'un homme se mesloit d'attester ce qu'il ne pouuoit sçauoir pour n'y auoir pas esté, decreta mandement de comparance personnelle sur Bartole.

Autre.

VN villageois vendit vn veau qu'il auoit à vn boucher, mais il en retint la peau, qu'il

qu'il porta vendre à Paris. Ne ſachant en quel endroit on vendoit de ſemblable marchandiſe, paſſe au trauers de Noſtre Dame, où il vid les Chanoines avec leur aumusſes ſur leurs bras, qui ſe promenoient dans l'Egliſe, il creut que c'eſtoient Marchands de peaux auſſi bien que lui, de ſorte que mettant la peau de ſon veau ſur ſon bras, comme il voioit faire les autres, mit à ſe promener comme eux, diſant tout haut, promenons-nous entre nous Marchands, & ne deuiſſions nous rien vendre.

D'un Iuge.

VN Iuge plus habile homme que ceux dont nous auons parlé ci-deſſus, examinant vn qui deuoit eſtre receu Conſeiller en vne Juſtice inferieure de la ſienne, vid que le Conſeiller eſtant fort ignorant, ne reſpondoit pas à vne queſtion qu'il luy fit; Quoi voiant il lui dit, par la Loi Vellician, la femme peut-elle reſpondre pour ſon mari, l'interrogé dit, qu'oui. Eſtes vous marié lui demanda le Iuge: oui, Monſieur, dit le Conſeiller, allez donc querir vôtre femme lui dit le Iuge, afin qu'elle reſponde pour vous, puis que vous ne voulez dire mot.

D'un Abbé.

VN Abbé prenant possession d'un Benefice, vn qui y estoit present entendant lire les prouisions, où ses qualités estoient, ouït dire *Abbas, sancti Petri Abbas, sancti Laurenti Abbas, sancti Victoris Abbas, &c.* Vertu bieu, voilà bien des bas pour vn asne. le croi que c'est vn asne à tous bas.

D'un Rotisseur.

EN vne petite ville de Normandie, il y auoit vn Iuge, estimé le plus grand voleur du pais. Comme il faisoit vn iour festin, il fut chez vn certain Rotisseur de la ville demander s'il y auoit moien de trouuer des canards de riuere pour le iour de son festin. Ce Rotisseur qui estoit extremement matois, lui dit, que ce n'estoit pas la saison, & qu'on n'en voioit point encor. Quoi, lui dit ce Iuge, i'en vis dernièrement plus de deux douzaines ensemble qui voloient. ie pense bien Monsieur, tous ceux qui volent ne sont pas pris. le vous laisse à penser si Monsieur le Iuge n'auoit pas son fait, & s'il n'estoit pas bien stupide s'il ne s'apperecuoit pas qu'on parloit à lui.

D'une

D'une bonne Femme.

VNe bonne femme estoit mere d'un ieune homme, qui vne ieune fille poursuiuoit en mariage, disant, qu'il lui auoit promis, & le fit assigner deuant l'Official: Comme l'Aduocat de cette fille plaidoit sa cause, il representa les sermens que ce ieune homme auoit faits de n'en auoir iamais d'autre, & lui reprochant son peu de foi, vsa d'une parole latine, pour l'exprimer, disant, qu'il estoit *fidefrage*, qui veut dire manqueur de foi. La mere du ieune homme qui y estoit presente, va dire tout haut au Iuge, il a menti sauf correction, Monsieur, mon fils n'est point fils de Frage, il est fils de mon mari qui est son pere.

D'un Cordelier.

VN Cordelier estant monté sur un asne, vint pour passer vne riuier; étant descendu de dessus son asne, eut peine à le faire entrer dans le bac, étant entré, cet asne se met à trembler, un homme qui étoit près de lui, lui dit, mon pere, vôtres asne tremble bien; ie pense bien, dit le Cordelier, si tu estois en sa place tu tremblerois bien d'une autre façon. Comment? dit cet homme. Si tu

auois comme lui, dit le Cordeliers, la corde au col, les fers aux pieds, & vn Cordelier apres de toi, tu ne ferois pas meilleure mine. Il est à croire qu'en tel estat, il seroit prêt d'aller au gibet.

D'un débauché Malade.

VN bon drole qui pouuoit passer pour vn des enfans de Noé Iaphet, car il auoit desia mangé son fait de bonne heure au ieu, & à toutes sortes de débauches. Se trouuant mal, enuoia querir le Medecin, qui lui ordonna vne saignée, apres auoir esté saigné le Medecin le vint voir, qui lui demanda comme il se portoit, il dit, que la saignée l'auoit beaucoup allegé, il le pria de voir son sang, pour voir s'il estoit fort mauuais, le Medecin le regardant, lui dit, voila du sang qui est bien verd, il peut bien estre verd, répondit le malade, car j'ai mangé tout mon bled en herbe.

De deux Cordeliers.

DEux Cordeliers allans par la campagne arriuerent fort tard en vn certain village de Poictou, où ils logerent au logis d'un boucher qui les mit coucher dans vne chambre voisine de la sienne, où il n'y auoit que
des

des ais entre deux , encor alléz mal joints , d'où l'on pouuoit aisement ouïr tout ce que l'on disoit de l'vne à l'autre. Il print enuie à ces Cordeliers d'escouter ce que la femme & le mari, diroient dans le liēt, mettant leur oreille droict au cheuet du liēt du mari, qui ne se doutant point de ses hostes, parloit priuément à sa femme de son mesnage , lui disant, mamie, il me faut leuer demain de bon matin pour aller voir nos Cordeliers (ainsi auoit-il accoustumé d'apeller ses cochons) car il y en a vn bien gras , qu'il nous faut tuer , pour en faire nostre profit. Les deux pauvres freres qui entendirent cette deliberation, ne croyant pas qu'on parlaſt d'autres que d'eux se tinrent tous asſeurez de leur mort , & attendoient le iour en grande apprehension , il y en auoit vn d'eux fort gras , & l'autre maigre, ce qui augmentoit le soupçon. Le plus gras se vouloit confesser à son compagnon , disant qu'un boucher , ayant perdu l'amour & la crainte de Dieu , ne feroit non plus d'estat de l'assommer qu'un bœuf, ou vne autre beste, & veu qu'ils estoient enfermés en leur chambre , d'où ils ne pouuoient sortir sans pouuoir passer par celle de l'hoste, de sortes qu'ils se mirent à recommander leurs ames à Dieu. Mais le ieune qui

auoit vn peu moins d'aprehension que son
compagnon, lui dit, que puis que leur por-
te estoit fermée, il falloit essayer à passer par
la fenestre, aussi bien ne sçauroient-ils auoir
pis que la mort, à quoy le gras s'accorda.
Le ieune ouurit la fenestre, & voyant qu'elle
n'estoit pas trop haute, sauta legerement en
bas, & s'enfuit le plustost & le plus loing
qu'il peût sans attendre son compagnon, qui
essaya le danger, mais la pesanteur le contrai-
gnit de demeurer, car au lieu de sauter, il
tomba si rudement qu'il se blessa fort vne
iambe, & quand il se vid abandonné de son
compagnon, & qu'il ne pouuoit suivre, re-
garda autour de lui, où il se pourroit cacher,
& ne vid rien qu'une estable où estoient les
deux pourceaux de l'hoste, où il se traïsna du
mieux qu'il peût, & ouurant la porte pour
entrer dedans, les pourceaux eschapperent,
en la place desquels se mit le pauvre Corde-
lier, & ferma la porte sur lui, esperant quand
il orroit le bruit des passans, qu'il apellerait
quelqu'un, & trouueroit secours. Mais si tost
que le matin fut venu, le boucher appresta
ses grands cousteaux, & dit à sa femme qu'elle
lui tint compagnie, pour aller tuer ces
deux pourceaux, & quand il vint au lieu où
le pauvre Cordelier estoit caché, il com-
mença

mença à crier en ouurant la petite porte; misericorde à l'aide, si le Cordelier eut grand peur, le boucher & sa femme n'en eurent pas moins, & lui demanderent pardon. Le Cordelier à la fin connoissant que le boucher ne lui vouloit point de mal, lui conta le sujet pourquoy il s'estoit caché dans ceste estable, dont leur peur fut conuertie en risée, Son compagnon qui l'auoit laissé au besoin courut toute la nuit, tant qu'il arriva à vn bourg voisin, où il se plaignit de ce boucher qu'il soupçonnoit auoir tué son compagnon, veu qu'il n'estoit point venu apres luy. On enuoya à ce village pour en sçauoir la verité, laquelle sçeuë ne donna aucun sujet de pleurer.

D'un Marchand de poisson.

VN certain Marchand de poisson apporta quelque quantité de marée à Dijon, qui est vne ville fort esloignée de la mer, & par consequent on n'y en voit quasi point du tout à cause de la peine, & des frais, qu'il y auroit à la faire venir fraîche. Neantmoins comme il y a des bouches fort friandes, quelques-vns ayant esté aux lieux où l'on en mange, souhaittoient d'en auoir à quelque prix que ce fut. Ce qui obligea ce

Marchand à en faire venir, comme ie vous ay dit, à grands frais, encore estoit elle fort mauuaise, & neantmoins il la vendoit par dessus les maisons. Cela n'empeschoit pas que quelques-vns n'en-acherassent, esmus par la nouveauté, & n'en donnassent toutce que l'on en demandoit: D'autres qui auoient la bourse legere, & qui n'y pouuoient atteindre, la descrioyent. Les vns disans qu'elle estoit puante & empoisonnée, & qu'il y auoit danger d'en manger, afin d'en dégoûter les autres. De façon qu'on commençoit à en acheter avec crainte. Vn honnête-homme de la ville accommodé, & qui se mocquoit de ces terreurs populaires, ne laisse point d'acheter vne belle solle, & de commander à sa seruante de la lui accommoder pour son disner, cét homme se tenoit sur la grande place. Comme la seruante l'eut frite, elle la met sur la table, attendant que son maître fut venu, & comme elle tournoit la tête d'un autre côté pour ouuir la porte à son maître qui frapoit, cependant vn chat vient qui emporte la sole, comme le maître entre, la seruante auise le chat qui mangeoit la sole, de colere elle prend vn gros baton, & lui en donne vn si grand coup sur la tête, que le chat tomba mort à ses pieds. Ce que voyant le

le maître, il en voulut ſçauoir le ſujet, lequel ayant appris, voyant qu'il n'y auoit plus de remede ne s'en fit que rire, & le prenant par les pieds de derriere le jettâ dans la ruë, où il y auoit quantité de monde aſſemblé, il leur dit en riant, voila vn chat qui eſt mort pour auoir mangé de la ſole. A ce mot qu'ils prindrent d'autre façon qu'il ne l'auoit dit, mit le peuple en telle emotion, d'autant que la perſonne qui auoit dit cela, étoit d'autorité, & qu'ils ne reuoquoient nullement en doute ce qu'il auoit dit, que chacun court au marchand qui vendoit la marée publiquement : le battirent & outragerent grandement, ietterent tout ſon poiſſon par la ruë, quelque excuſe qu'il peût alleguer pour ſa iuſtification, ils le traînent pardeuant le Iuſte pour le faire châtier : Le Iuſte l'oüit, & ſur ce qu'il s'excusoit que ſon poiſſon étoit fort bon, & que le peuple alleguoit, qu'un homme de croyance qu'ils nommerent tout haut, auoit dit publiquement que ſon chat étoit mort pour auoir mangé de la ſole. On enuoye querir cét homme, qui declara la verité, dont le Iuſte ne fit que rire. Ainſi par cette equiuoque mal entendue le pauvre Marchand perdit tout ſon poiſſon, qui lui reuenoit à beaucoup

d'argent, fut excessiuellement battu, sans aucune esperance de ressource.

De deux Gascons.

DEux Gascons sortirent vn iour de Bordeaux, en resolution de voir le pays ensemble, & de faire fortune, tâchans de flouter le monde? Ils arriuerent à Paris, où en exerçans leur métier, ils furent attrapez dans le Palais. Et vn d'eux saisi d'une bourse fraichement coupée, on leur met à tous deux la main sur le collet, & parce qu'ils auoient bien la mine d'en auoir fait d'autres, on les dépouilla pour voir s'ils étoient point Officiers de la Majesté, c'est à dire, marquez à la marque Royale, mais on n'en trouua qu'un d'eux qui l'auoit sur l'espaule, qui fut condamné à estre pendu en Greve, & l'autre fouetté au pied de la potence. L'Arrest ayant esté executé, celui qui auoit euité la mort fut mis en liberté, & quelque temps apres il s'en retourna en son pays, où il fut visité de tous ses parens & ceux de sa connoissance, auxquels il racontoit des merucilles de son voyage. Comme chacun s'enquêtoit ce qu'étoit deuenu son compagnon: Il a fait vne belle fortune, dit-il, & a bien fait trouuer le prouerbe veritable, qui dit que nul

nul n'est Prophete en son pays. Comment ? lui demanda t'on, quelle fortune a t'il faite ? Il s'est marié, dit-il, fort richement en pays estrange. Et comme on lui demandoit à qui, il a été pourueu, dit-il, en haut lieu, & i'ay bien dancé à les nopces. Estoit-ce pas bien deguiser l'affaire ?

*D'un Gascon qui n'auoit point de froid
en Hyuer.*

VN certain Gascon durant les plus grandes froideurs de l'Hyuer se promenoit sur le Pont neuf, avec vn petit pourpoint de toile blanche decoupé sur la chemise, vn bas de toile, vn petit manteau de camelot avec son espée au costé, comme s'il eust esté au mois d'Aoust, Le Roy passe par là en carrosse, qui se cachoit le né dans son manteau de panne à cause de la grande froidure qu'il faisoit, & leuant les yeux, il vid ce Gascon en cet equipage, ce qui l'étonna extrêmement, il le fait appeller, & lui demanda s'il n'auoit point de froid, il répondit que non. Comment peux-tu faire mon ami, de n'auoir point de froid, vêtu comme tu es, luy dit le Roy, & moi ie ne puis durer, quoy que ie sois fort bien vêtu ? Sire, respondit-il, si vôtre Majesté faisoit comme moi, elle n'au-

roit iamaïs de froid. Comment ? lui demanda le Roy. Si vous portiez, Sire, respondit il, tous vos habits sur vous comme ie porte les miens, assurez vous que vous n'aurez iamaïs de froid, le Roy trouua cette raison si bonne, qu'il luy fit donner dequoy auoir vn habit tout complet.

*D'un autre avec vn Tresorier de
l'Espargne.*

VN Gascon ayant obtenu vn breuet du Roy de cinq cens écus pour vne pension qu'il auoit de sa Majesté. Ce breuet s'adressoit au Tresorier de l'Espargne. Ce Gascon le fut chercher, où l'on lui auoit dit qu'il se tenoit, estant pres de son logis, il s'informoit à chacun où estoit le logis de ce Thresorier de l'Espargne, l'ayant apais, le premier qu'il rencontre fut lui-mesme, à qui il demanda vostre maistre est-il au logis, il respondit que c'estoit lui-mesme. C'est donc vous, dit-il qui estes le Tresorier ? Ouy, respondit-il : Sabous lire, lui demanda le Gascon. A quoy ayant respondu qu'ouy : Voyez vn peu, dit-il, ce que le Roy vous mande. Il luy presente son breuet, à quoy Monsieur le Tresorier respondit : Eh ! bien,
Monsieur

Monsieur , ce sont cinq cens escus qu'il faut que ie vous baille. Quand les aurons-nouz mon mignon ! Monsieur , respondit-il , nous nous allons mettre à table , vous aurez , s'il vous plaist , patience que nous ayons dîné. Combien durera ce dîner , demanda-t'il ? il durera bien , respondit-il , vne heure & demie du moins : car il y a aujourd'hui bonne compagnie ceans , & nous y ferons plus qu'à l'accoustumée. Cap, dit le Gascon , si cela est i'en suis : lacquais , s'escria-il , va dire au logis qu'on ne m'attende point à dîner, Diou me damne, dit-il, Monsieur, ie ne fay point de ceremonie. Ce que voyant Monsieur le Tresorier , il fut contraint de l'emmener dîner, estant entré dans la salle il se met à laver , & se sied à table le premier, disant, sans ceremonie, Messieurs , & se met à mascher des deux costez comme vn cheual , comme celuy qui de long temps ne s'estoit trouué en pareil festin. Quand on eut acheué de dîner , il s'adresse à Monsieur le Tresorier , luy disant , & bien mon mignon aurons-nous d'argent, à quoy il respondit , ouy dea , Monsieur, & appellant vn de ses Commis, il lui commanda de lui deliurer cette somme , & lui dit à l'oreille , qu'il luy retint vingt escus pour son escot. Le

commis fait son deuoir, & lui compte son argent à vingt escus prés, cetruy cy dit qu'il n'auoit point son compte, il lui fit raconter quatre ou cinq fois, à la fin le Commis lui dit, il y a vingt escus-moins, Monsieur, que ie rebats pour vôtre escot : Comment, dit il pour mon escot, que veut dire cela ? Monsieur, dit le Commis, ces Messieurs de là dedans payent chacun autant. Vertu, dit-il, ie nourriray deux mois toute ma famille pour cela, mais quoy qu'il fist du bruit, il fallut qu'il passast par là, & fut veritablement payé de son effronterie, & traité comme il meritoit.

Redomontade d'un Gascon.

VN certain Cavalier Gascon, ayant été appelé pour se battre en duel contre vn autre qui pretendoit d'estre offensé de luy, ne manque point de se trouuer à l'assignation, où il vid vn Cavalier qui se promenoit, qu'il creut de loing estre son homme; mais l'ayant approché, il yid que c'estoit vn autre, la crainte qu'il eut que son dessein ne fust troublé par la présence, luy fit dire assez rudement à ce Cavalier qu'il sortist delà, l'autre n'estant point accoustumé à telles ambassades luy repartit de mesme, de façon que de

parole.

parole en parole, s'estans picques l'un en vinrent aux mains, sur cette entrefaite celui qui l'auoit fait appeller arriue, qui fort étonné de le trouuer en cette posture, lui demanda pourquoy il lui manquoit de parole, & attaquoit vn autre auant que de l'auoir satisfait, car respondit le Gascon, il m'ennuoyoit, ie pelotois en attendant qu'on jouiât partie. Le mesme ayant esté vn iour arreté prisonnier, dit, car les Courtisans ont bon temps à present que le Lyon est enchainé, ils ne doiuent plus rien craindre.

D'un qui vendoit vn Cheual'auueug'e.

EN la ville de Caën vn Normand vendoit vn cheual auueugle, mais il n'y auoit que les clairvoyans qui s'en peussent appercevoir, tant il auoit la veue belle & claire, & celui qui le marchandoit ne s'y connoissoit point du tout, il dit au vendeur, au moins c'est à la charge que vous me le garentissez de tout vice generallyment quelconque, car ie ne m'y connoy point, celui qui le vendoit & qui connoissoit bien où le mal lui tenoit, lui dit, Monsieur, faites-le voir, ie le garantis de tout vice, ils demeurèrent d'accord du prix, il le paye, & emmene son cheual; mais au bout d'un iour ou deux, il s'aperceut que

son cheual étoit auetugle , il va trouuer son marchand à qui il le veut rendre , maintenant qu'il lui auoit garenti de tout vice , & qu'étant auetugle il lui deuoit rendre son argent , & emmene avec lui les tesmoins qui étoient presens quand il l'acheta, il dit qu'il s'en rapportoit aux mesmes tesmoins qu'il ne deuoit rien rendre , puis qu'il aduoüoit qu'il le fit voir , & qu'il le garentissoit de tout vice, puis qu'il ne lui manquoit rien que la venë. De façon qu'il s'échapa par là , & le pauvre homme fut contraint de se seruir de son auetugle.

*Brocard à une Femme la taxant
d'impudicité.*

VNe femme de celles qui passent leur temps aux despens de leur honneur, desirant aller en mascarade, & se voulant deguïser en sorte qu'elle ne fust conneüe de personne. Comme elle se conseilloit avec celui qui la deuoit mener qui sçauoit ce qu'elle estoit, Madame, deguïsez-vous en femme de bien, ie puisse mourir si personne vous pourra iamais connoître.

*Jugement subtil du Duc d'Osbonne contre
deux Marchands.*

CHacun a ouy parler de ce fameux Duc d'Osbonne, de ce braue Espagnol, Chef
de

de la maison des Giron, dont l'esprit excellent, & les hautes actions le rendront immortel dans les siècles à venir. Il n'y a gueres plus de 20. ans qu'estant Vice-Roy de Naples; sous les Roys d'Espagne Philippes III. & Philippe IV. à present regnant, il fit plusieurs choses dignes de memoire, dont ie conterai icy quelques vnes des plus remarquables. Trois Marchands de la ville de Naples ayans équipé & armé vn vaisseau de guerre pour aller en course contre les pirates, ils eurent la fortune si fauorable qu'en peu de temps, ils amasserent vn butin qui pouuoit bien monter, tant en argent qu'en nippes à la valeur de soixante mil ducats. Avec cette somme ils voulurent se retirer, craignant qu'en voulant hazarder dauantage ils ne perdissent le tout. Esperant qu'auec chacun vingt mil ducats, sans ce qu'ils auoient chez eux, ils passeroient assez doucement le reste de leur vie, ce peu de bien estant assez capable de contenter vn homme sobre. Ils reuindrent donc en leur ville de Naples, avec dessein de mettre cét argent chez quelque riche marchand pour le faire profiter. Mais comme ils estoient tous trois extremement desfians, ils ne voulurent qu'aucun d'eux fut gardien de l'argent, mais le mi-

rent chez vn certain Banquier pour estre en seureté, iusques à ce qu'ils eussent trouué vne occasion favorable de le mettre en vn raisonnable interest, ils en firent dresser vn mot d'escri par ce Banquier, par lequel il s'obligeoit de rendre cet argent toutes fois & quantes qu'il en seroit requis par tous les trois d'acord de partie, & de ne le rendre point qu'en leur presence, sur peine de le payer au double, declarant ces Marchands, qu'ils ne lui demandoient aucun interest pour le temps que cet argent seroit entre ses mains, attendu qu'ils n'auoient pas resolu de luy laisser long temps, mais l'employer le plustost qu'il leur seroit possible. Il y auoit vn de ces trois marchands, qui auoit beaucoup plus d'esprit que les autres, aussi les affina-t'il; Cettuy-cy pour son experience & bonne conduite menoit les autres par où il vouloit, & auoit la charge de toute la des-pence qu'ils faisoient, mesme de trouuer moyen de placer cet argent en lieu pour leur faire profiter à interest, cettuy-cy mesme negocioit au nom des trois les affaires qu'ils auoient en la Vicairie de Naples, qui est vne espece de Parlement, & auoit vne procuration de ses compagnons pour agir en leur nom de tout ce qui les concernoit touchant l'opération

l'operation de leurs biens, & quand il luy falloit quelque argent, il prenoit vne police de ses compagnons c'est ainsi qu'en ce pays là on nomme les billets, pour en receuoir du banquier pour les despences qu'il leur falloit faire en commun, laquelle police estoit à peu près en ces termes. Vn tel banquier, vous deliurerez contant à vn tel, present porteur la somme de tant, qu'estant signée de luy sera aloüée par nous sur les comptes que nous auons à faire ensemble. Cestuy cy auoit desia receu quantité de polices de cette nature, & beaucoup d'argent dont il auoit tenu compte à ses compagnons, & comme il auoit enuie de les tromper, il leur fit entendre qu'il ne tarderoit gueres de trouuer vn moyen d'employer leur argent en chose dont ils tireroient vn notable interest. S'en vanta mesme au banquier, & fit en sorte que les compagnons lui dirent qu'il ne garderoit plus leur argent, & qu'vn tel lui nommant ce matois icy, le deuoit placer en lieu, dont ils tireroient vn grand profit : à quoy le banquier leur dit que quand ils le desireroient, leur argent estoit tout prest ; cettuy cy ne voulant pas retarder dauantage à faire eclorre son dessein, vint trouuer ses compagnons, & leur dit, qu'il estoit temps de faire profit.

ter leur argent, & qu'il auoit trouué le moyen comme il leur auoit promis, leur faisant croire vne fourbe qu'il inuenta sur le champ qui leur faisoit esperer vn profit tres-avantageux, mais que pour y paruenir il falloit faire vn present à vn certain personnage sans lequel il ne pouuoit rien, & autre argent qu'il falloit auancer pour cét effect, dont il dit qu'il leur tiendrait conte & leur demanda vne police pour le banquier, qu'ils ne hesiterent point de signer, comme ils auoient fait les autres, mettant N. Banquier ne manquez à deliurer à vn tel present porteur, là dessus ils luy demanderent quelle somme il vouloit; ie ne vous le sçauois bien dire pour cete heure, respond-il; car faut auparauant que ie consulte plusieurs personnes, & i'aurois trop loing à reuenir icy, mettez qu'il me baille la somme que ie lui demanderay, ce qu'ils firent notant ce qu'il vous demandera. Cettuy-cy bien content va trouuer le Banquier, à qui il dit, ie sçauois bien que vous ne garderiez gueres nostre argent; ie m'en vay tout de ce pas le placer, voilà mes compagnons qui vous mandent que vous me le mettiez entre les mains. Ce Banquier voyant la police, ne fit aucune difficulté de mettre tout l'argent qu'il lui re-

stoit

Estoit de ces trois Marchans, entre les mains de cettuy cy, qui extremement ioyeux, sortit tout à l'heure de Naples, ayant donné ordre auparauant de preparer vn vaisseau pour ce sujet, & depuis ce temps là on n'a point ouy parler de luy. Ses deux compagnons voyans qu'il ne reuenoit point, ce qu'il n'auoit garde de faire; vont chez ce Banquier, pour voir s'ils n'en auroient point de nouuelles, mais à leur grand regret, ils apprirent ce qu'ils apprehendoient le plus, comme il s'en estoit allé avec leur argent, dont ils furent extremement estonnez, & dirent au Banquier, qu'il en respondroit, & qu'ils auoient son escrit, par lequel il s'estoit obligé de ne rendre point l'argent qu'en presence de trois, & que pour ce sujet ils ne tireroient aucun interest de leur argent: ce Banquier leur dit, qu'ils le missent en action, qu'il auoit de quoy leur respondre? & que la police qu'il auoit de leur main luy seruoit de bon garant. Ils s'en vont donc en resolution de le mener par la iustice. Cette affaire fut diuulgée par toute la ville, & vint insqu'aux oreilles du Viceroy, qui dans quantité de iustes iugemens qu'il a rendus, a paru dans Naples vn second Salomon. Il voulut auoir la connoissance de cette affaire, & fit venir

les parties plaider pardeuant lui. Ces deux Marchands qui estoient demandeurs, firent premierement leur harangue, & representent à son Excellence, qu'ayant mis quantité d'argent entre les mains de ce Banquier qui appartenoit à eux trois, ils ne lui auoient demandé aucun interest, souhaittant seulement qu'il s'obligcast de ne deliurer cet argent, qu'en presence d'eux trois, que neantmoins vn des leur, avec qui il se deuoit entendre sans doute, auoit tiré cet argent de ses mains pour les en frustrer, contre son escrit qu'ils representent. Le Banquier respond qu'il auoit deliuré cet argent sur leur police qu'il represente, comme sur paroles il lui en auoit donné plusieurs fois, qui toutes auoient esté agréées par ces deux icy, & que celuy à qui il auoit baillé l'argent faisoit toutes leurs affaires, & estoit chargé de procuration d'eux. Cette affaire balancée par le Viceroy, mais il est constant, dit-il, Banquier, que vous vous estiez obligé de ne bailler point cet argent qu'en presence de tous les trois, & neantmoins vous l'avez donné tout entier à cettuy-cy sur vne simple police, qui portoit, que vous lui donnassiez ce qu'il vous demanderoit? Ouy, Monseigneur, respond le Banquier, & j'ay creu puis qu'ils me le man-
doient

doient, que ie n'en deuois point faire difficulté, puis que le billet portoit que ie lui baillasse ce qu'il me demanderoit, & il m'a demandé la somme, dont voilà vn bon acquit de sa part. Mais quoy, lui dit le Viceroy, en vne somme d'vne telle importance, n'en deuez-vous point conférer auparauant avec les autres, & suiure les termes de vostre obligation? Mon amy, dit-il, ie vous condamne à executer ce à quoy vous estes obligé, qui est de payer la somme encor vne fois puis que vous l'auiez donnée avec si peu de precaution. Mais ie veux que les termes de vostre contract soient suiuis, qui porte que vous ne payerez point cét argent qu'en presence de tous trois; qu'ils se presentent tous trois, & vous leur payerez cette somme. Par ce moyen le Banquier fut déliuré, & les deux compagnons en eurent pour leur argent, car l'autre n'ayant garde de paroistre, le Banquier n'estoit pas obligé à rien bailler.

*Autre Jugement du mesme Duc d'Ossone,
contre des Religieux.* 1

LE mesme Duc d'Ossone fit vn autre iugement aussi subtil, & aussi equitable, entre vn Conuent de Religieux (& pour cer-

Quelques Considerations ie ne veux point dire de quel Ordre ils estoient , aussi n'est il pas necessaire) & vn ieune homme habitant de la ville de Naples. Cettuy-cy estoit fils unique d'un Banquier de la même ville , riche de cent mil ducats. Ce Banquier estoit fort deuot & affectionné à cet Ordre , où il alloit fort souuent faire ses deuotions, & meue d'un zele pieux, il leur fit de grands biens, & venant à mourir il mit tout son bien en argent qui montoit comme nous auons dit à cent mille ducats, & en fit vn don à ces bons Peres, à condition de faire des prieres pour son ame, & de receuoir nouice en leur Conuent son fils unique, qui étoit encor fort ieune, qu'il destinoit à passer le reste de ses iours parmi eux. Mais dans le testament il y auoit vne clause, qu'en cas que ce fils estant en âge ne voulût point estre Religieux, ni faire profession dans leur Conuent, ces Peres seroient obligés pour le maintenir dans le monde , des cent mil ducats qu'il leur laissoit, de luy en donner ce qu'ils voudroient. Ce Pere meurt , ils se mettent en possession de cette somme , donnent l'habit de Nouice à ce ieune enfant qui n'auoit pas l'esprit de sçauoir encor ce qu'il faisoit. Mais estant paruenue en âge, & ces Peres le pressant de faire profession,

tion, il relinoignoit n'en auoir gueres enuie, car estant vilié par ses parens, & par quantité de ieunes hommes de la ville qui le connoissoient, ils luy remonstrerent le toût qu'il se faisoit de viure enferme dans vne Religion, où avec tant de biens, en l'âge où il estoit il pouuoit si bien passer son temps dans la ville, si bien qu'ils luy mirent le cœur au ventre, & la resolution de leuer le masque, & dit tout haut qu'il ne desiroit point estre Religieux, & que Dieu ne luy auoit point tant fait de grace de le destiner à cette profession, & partant demanda instamment de sortir, ce qu'on ne luy peut pas refuser, ils luy firent faire vn habit de Cavalier, & le mirent hors du Couuent. Quelques iours apres il fut trouuer le Pere Superieur, & luy demanda quelle raison on luy vouloit faire des biens que son pere auoit l'aislé à leur maison, & qu'il en auoit besoin pour viure dans le monde. Le Pere Superieur dit qu'il falloit assembler le Chapitre sur ce sujet, & qu'ils en resoudroient ensemble. Ce ieune homme leur ayant donné temps suffisant pour ce faire, il reuint au bout de quelques iours trouuer ce Superieur qui luy dit que la maison estoit pauvre, que ne pensant point rendre cét argent ils l'auoient despen-

lé en œuvres pieuses ; mais que neantmoins ils étoient tant obligés à la memoire du defunt pour les biens qu'ils auoient receüs de luy , qu'ils auoient resolu de faire vn effort sur eux , pour luy donner moyen de viure en homme d'honneur, & de maintenir le rang que ses parens tenoient , & que partant ils auoient deliberé de luy donner dix mil ducats. Cettuy-cy se trouuant bien esloigné de son compte , qui pour le moins esperoit auoir la moitié de la somme , qui estoit cinquante mille ducats, leur rémoigna qu'il n'estoit point satisfait de leur procedé, & qu'il ne vouloit point accepter cette somme à quoy ils lui repartirent avec des paroles si douces, mais il eust mieux aimé de l'argent, qu'ils appelloient Dieu à témoin, qu'ils faisoient plus qu'ils ne pouuoient , & même plus qu'ils n'estoient obligés par le testament de son Pere , qui ne les obligeoit qu'à luy donner seulement ce qu'ils voudroient , sans rien specifier: mais quoy qu'ils luy peussent dire , ils ne lui osterent point la resolution de s'en plaindre en Iustice, comme il fit. Le bruit en fut tel dans Naples, que le Viceroy , comme il faisoit en toutes les affaires qui importoit, en voulut auoir la connoissance. La cause fut plaidée deuant luy, où chacun

où chacun d'eux déduit ses raisons le mieux qu'il luy fut possible, lesquelles ayans esté ouïes par le Viceroy, il demanda a ce ieune homme s'il deuoit contester le testament de son pere. Non, dit il, Monseigneur, mais ie supplie vostre Excellence, selon sa prudence ordinaire, de le vouloir expliquer vn peu plus à mon aduantage, que ces Peres ne font qui veulent tout auoir pour eux, & me laisser si peu de chose de la succession d'vn si grand bien. A quoy le Duc respond; l'ordonne que le testament du pere sera executé, qui veut que cent mille ducats qu'il legue à ces Peres, ils donnent à son fils ce qu'ils voudront. Or est-il que par l'offre de dix mille ducats qu'ils lui font, ils tesmoignoient en vouloir quatre-vingts dix mille pour eux, il est ordonné que puis qu'il est dit qu'ils lui donneront ce qu'ils voudront, qu'ils lui donnent ces quatre vingts dix mille ducats, qu'ils veulent pour eux, & qu'ils ayent les autres dix mil ducats, dont le ieune homme tout ioyeux remercia son Excellence, & les bons Peres tous honteux s'en retournerent mal satisfaits d'vn iugement si equitable.

*Autre Jugement du mesme contre des
estropiez.*

CE mesme Duc estant encor Viceroy de Naples, allant par les ruës rencontra vne infinité de gueux, qui faisans les soldats estropiez pour le seruice du Roy, l'importunoient de demandes. Comme il s'en plaignoit au logis deuant ses domestiques, il apprit d'eux que le nombre en estoit bien plus grand qu'il ne croyoit, & que l'on ne voyoit autre chose dans les ruës. Le Viceroy se douta bien qu'il y auoit de la fourbe là dessus, & resolut d'en faire vn châtiment exemplaire, mais il craignoit qu'en voulant chastier les coupables, il ne fit tort aux innocens, & se delibera par vn subtil stratageme de connoistre la verité, & de discerner les vns d'avec les autres. Pour ce sujet, il fit le lendemain publier vn Edit par tous les carrefours de la ville, qu'ayant receu du Roy son Maistre commandement de recompenser tous les soldats qui auoient esté estropiés à son seruice, & ayant receu fonds pour cela, il ordonnoit à tous ceux qui pour lors se trouuoient dans Naples, estropiez pour le seruice du Roy, de s'assembler le lendemain à la Larga del Castello, qui est la plus grande

de place de Naples, pour y recevoir les recompenses que le Roy leur ordonnoit. Cét Edit estant publié, il s'y en trouua le lendemain vne si grande quantité, que le Viceroy en y arriuant en fut extremement estonné, & s'estant mis en lieu où il pouuoit estre ouy, si non de tous, pour le moins de la plus grande partie, Il leur dit, l'ay bien receu ordre du Roy mon Seigneur & mon Maistre de donner recompense à tous les soldats estropiez pour son seruice, mais le fonds qui m'est destiné pour ce sujet, n'est pas suffisant pour satisfaire à tant de monde. Aussi n'y a t'il pas d'apparence que dans vne seule ville il y eust tant de soldats estropiez pour ce sujet. Or l'intention du Roy est, que ses liberalités s'estendent seulement sur les personnes de cette condition, & non sur ceux qui par accident de maladie, ou pour autres causes ont esté endommagés de leurs membres. Pour connoistre donc ceux à qui ce fonds est legitimement destiné, ie me resous d'vser d'vne certaine inuention pour les discerner. Il est à croire que ceux qui ont esté mal traittés dans les occasions d'honneur, quoy qu'ils manquent de force, ne manqueront point de courage, & par ce moyen ie les discerneray bien. Il fait tendre vne corde

au milieu de la place, comme vne corde de jeu de paume, qui pouuoit arriner iusques à la ceinture, & dit tout haut; Ceux qui auront encor assez de courage & de generosité pour sauter sur cette corde, & la franchir de l'autre costé, seront ceux qui me feront paroître auoir du cœur; & par consequent de s'estre trouués dans les bonnes occasions, & ceux-là auront la recompense qui leur est destinée par le Roy. Mais ceux qui feront paroître manquer de force pour ce sujet, ce seront ceux que ie tiendray pour lasches, & que ie croiray auoir esté estropiés en autre occasion que l'espée à la main pour le seruice de son Prince. De tous ces estropiés, il n'y en auoit pas le tiers qui veritablement le fussent, l'esperance de la recompense promise ayant obligé plusieurs vaux-riens à feindre estre tels, ce fut pourquoy il fut fort aisé à ceux qui n'auoient ni mal, ni douleur de sauter librement par dessus la corde, dont ils receuoient des louanges du Duc qui les faisoit mettre à part, & escrire leurs noms, & ceux qui veritablement estoient estropiés, se presentant s près de la corde, quelque effort qu'ils fissent n'en pouuans venir à bout, le Duc les faisoit mettre de l'autre costé avec des termes de mespris, qui encourageoit d'aurant

d'autant plus les autres, qui ne trouuoient aucun obstacle à obeir à ce commandement dont le nombre fut plus grand deux fois que les autres : Comme ils eurent tous fait l'esprouue de leur disposition, les vns & les autres furent extremement estonnés, quand ils virent que le Duc enuoya aux Galeres tous ceux qui auoient sauté par dessus la corde, & qu'il fit donner vne pistole à chacun de ceux qui n'ayans peu sauter tesmoignoient estre veritablement estropiés.

Autre iugement du mesme Duc, des Forçats de Galere.

IL print fantaisie vn iour au mesme Duc d'aller reuisciter les galeres de Naples dans le port, comme il fut entré dans la Reale, vn des espaliers de la galere, se iectant à ses pieds le pria de lui faire donner liberté, & le tirer de cette misere, où tous les iours sans mourir il souffroit la douleur de mille morts; le Duc lui demanda ce qu'il auoit fait pour être detenu forçat, chose aucune, Monseigneur, respondit il, j'ay tousiours vescu en homme de bien, sans auoir eu iamais aucun reproche, vn de mes ennemis m'y ayant fait mettre pour se vanger de moy à la sollicitation de faux témoins : vn autre forçat lui fit la

mesme priere, à qui il demanda pareillement pour quel crime il auoit esté condamné ; Monseigneur, dit-il, ie n'en ay iamais commis aucun, ie suis icy par l'enuie de mes parens, qui m'ont supposé des crimes à faux, pour durant que ie suis icy captif iouir de mon bien. Plusieurs autres luy tindrent le mesme discours, disant tous estre innocens des crimes qu'on leur imputoit. Le Duc iettant les yeux sur vn grand forçat, qu'il vit là de fort bonne mine: Et toy, dit-il, pourquoy es-tu icy ? l'y suis respondit-il tres iustement. Monseigneur, encor m'a-t'on fait trop de grace ; de me laisser la vie, apres les crimes que i'ay commis, car i'ay volé, pillé, assassiné, & violé, sans plusieurs autres crimes que i'ay commis, dont i'ay esté trop bien conuaincu. Le Duc l'ayant ouy parler de la façon, appella le Capitaine de la Galere, & luy dit; Faites promptement sortir ce pendart hors d'icy, coupable de si detestables crimes; car sans doute par sa frequentation il infecteroit tant de gens de bien. qui sont ceans à tort condamnez : Et cettuy-cy seul fut mis en liberté pour auoir franchement confessé la verité, & les autres laissez là pour leur impudent mensonge.

Autre.

Autre gentillesse du mesme Duc.

LE mesme Duc estant à Naples , aimoit extremement à se promener la nuit seul & inconnu , avec seulement vn lacquais , pour ouyr ce que le peuple disoit de luy. Vne nuit entr'autres , se promenant ainsi dans les ruës , il vit de loing trois soldats de la garnison du Chasteau neuf qui deuisoient ensemble , il s'approcha d'eux , & se mit en lieu qu'il pouuoit tout entendre , sans estre veu d'eux. Il ouyt comme vn d'eux disoit , si i'auois à cette heure mil escus d'argent comptant, ie m'estimerois cent fois plus heureux que nostre Viceroy. L'autre luy dit, tu fais là vn souhait de maraud , pour moy si i'estois vn des Capitaines de la garde , ie me tiendrois plus heureux que luy. Le troisieme, dit, si i'auois à souhaitter quelque chose , ce ne seroit point cela , & quoy donc luy dirent ses compagnons ? si i'auois seulement, dit-il, couché vne nuit avec la Vicereine sa femme, ie serois cent fois plus heureux que vous deux: le Viceroy oyant ce discours , se retire le plus doucement qu'il pût, & enuoye son lacquais querir le plus proche Officier de la garnison pour venir parler à luy, estant

venu il commanda de s'informer du nom de ces trois soldats qu'il leur monstra de loing, & de quelle Compagnie ils estoient, & de lui en venir rendre response le lendemain au matin; cela fait il s'alla coucher, cét Officier ne manqua pas de s'acquitter de sa commission, & vint le lendemain matin en aduertir le Duc, qui enuoya dire au Capitaine qu'il enuoyast ces trois soldats, à quoy il ne manqua point. Le Duc les ayant deuant lui, leur dit, parlez moi franchement & ne mentez pas. De quoy discouriés-vous hier au soir à telle heure, & en tel lieu? ils se mirent à se regarder tous trois estonnez sans rien respondre, mais le Duc leur dit sur l'heure, parlez & me dites la verité, ou ie iure Dieu que ie vous feray pendre. Eux qui connoissoient l'humour seuer, mais tres-raisonnable de celuy qui parloit à eux, furent plus surpris que deuant le premier qui auoit parlé le soir precedent, fut le plus hardi à respondre, disant, Monseigneur, il est vray qu'à l'heure que vôte Excellence dit, nous estions tous trois au mesme lieu que vous dites, nous discourions de plusieurs choses, & ie ne sçay pas bonnement sur quelle matiere nous estions pour lors, & sur celle que vous voulez que ie vous responde

ponde: le discours que vous teniez pour lors, respond le Duc, faisoit mention de moy, voyez si ie suis bien aduertty, respondes donc promptement, & gardez de me mettre en colere en voulant faire l'ignorant d'une chose que ie sçai fort bien. Cettuy-cy qui voyoit fort bien que le Duc n'entendoit point railerie, ie vous diray franchement ce que ie disois pour lors, Monseigneur, m'assurant que vostre Excellence pardonnera la liberte d'un discours que ie disois par galanterie. Je me ressouviens que mes compagnons faisans entr'eux quelques souhaits, ie dis que si i'auois mil escus en argent, ie me tiendrois plus heureux que vostre Excellence. Là dessus le Duc enuoye querir son Tresorier, & fait sur le champ deliurer mil escus à ce soldat, qui fut ioyeux au point que le peut estre vn homme qui a tout ce qu'il souhaite. Le Duc apres se retournant vers l'autre, lui dit, & vous que disiez-vous, cettuy-cy enhardi par cette liberalité, respondit, Monseigneur, ie disois que si ie me voyois vn des Capitaines de vostre garde, ie me tiendrois plus heureux que vostre Excellence. Je ne veux pas dit le Duc estre moins liberal enuers vous, ie vous donne, dit-il, la charge d'un tel qui l'est, que ie recompenseray d'une plus honorable. Et

vous dit-il au troisieme, que disiez-vous ?
 cettuy-cy extremement estonné & surpris ;
 Ah, Monseigneur, dit-il, ie supplie tres hum-
 blement vostre Excellence de me pardon-
 ner, nous sortions du cabaret, nous estions
 yures, & ne sçauions ce que nous disions, au
 moins pour moi. Parlez, répliqua le Duc,
 dites le moy promptement si vous n'avez
 enuie de me mettre en colere, & m'obliger
 à vous faire repentir de vostre desobeyssan-
 ce : luy qui connoissant l'humeur du Duc,
 voyoit bien qu'il lui falloit franchir le pas,
 lui dit d'une voix tremblante, Monseigneur,
 j'ay esté si sot de dire, croyant que nous fus-
 sions seuls entre nous, que si j'auois couché
 vne nuit avec la Vicereyne ie serois plus
 heureux qu'eux ; mais Monseigneur, dit-il,
 en se mettant à genoux, pardonnez s'il vous
 plaist à la temerité d'un impertinent, qui
 parle sans songer ce qu'il dit. Leuez vous
 mon amy luy dit le Duc, ie suis marry qu'il
 n'est à mon pouuoir de vous accorder ce
 que vous desirez, vous vous en retourneriez
 aussi satisfait que vos compagnons, mais
 tout ce que ie puis faire pour vous en cette
 occasion, est puis que cela depend de ma
 femme, de la prier pour vous, venez-ça,
 suivez moy. Le pauvre homme tout trem-
 blant

blant ne ſçauoit à quoy il deuoit ſe reſoudre, mais le Duc voulant abſolument qu'il le ſuiuiſt, il y fut contraint. Il le mena dans la chambre de ſa femme, qui ſe coïſoit, à qui il fit le diſcours du deſſein du perſonnage, & en ſuite le prend par la main, & le preſentant à ſa femme, luy dit, mon amy, voila celle qui ſeule vous peut contenter en ce que vous deſirez d'elle, ſi elle le veut i'y conſens de bon cœur, ie vous laiſſe à penſer ſ'il euſt iamais ſujet d'eſtre plus honteux, & ſans le Duc qui l'en exempta, & le renuoya chez luy, la Vicereyne lui euſt fait donner lès eſtriuieres. Apres cela iugez ſi ſes compagnons n'auoient pas ſujet de ſe bien gaulſer de luy.

D'un ieune homme à qui deux de ſes Compagnons firent accroire qu'il eſtoit au eugle.

TROIS ieunes drolles apres auoir ſouppé ſe mirent à iouer enſemble à trois dez, il y en eut vn des trois ſi en malheur qu'il perdit tout ſon argent contre les deux autres, & eſtoit ſi mal heureux qu'à chaque coup qu'il perdoit il ſutoit & renſoit, prenant Dieu par tous les membres, de ſorte qu'il faiſoit dreſſer les cheueux à la teſte aux autres, qui tant plus qu'ils l'enreprénoient,

tant plus le mettôient-il en colere, & l'obligeoient à iurer & maugreer d'auantage. Comme il eust le premier perdu son argent, il se tetira en iurant encor, & n'ayant plus dequoy iouer, il fut contraint de s'aller coucher, & de laisser iouer les deux autres, qui lui dirent en lui donnant le bon soir, qu'il demandast pardon à Dieu des offences qu'il auoit faites, pour lesquelles il deuoit craindre qu'il ne le punist. Il se couche donc dans la mesme chambre, laissant iouer les deux autres, il ne fut pas long-temps dans le liêt qu'il commença à ronfler, ses deux compagnons qui iouoient l'un contre l'autre, voyans qu'il dormoit bien fort, resoluiēt de luy iouer d'une fourbe. Ils tuent la chandelle, & esteignent le feu, en sorte qu'on ne voyoit goust de tout dans la chambre, feignans de disputer ensemble sur vn certain coup, qu'ils feignoient estre douteux, ils firent vn tel bruit, qu'ils recueillirent en sur-saut celui qui estoit au liêt, qui ouurant les yeux, & ne voyant goust de rien, comment pouuez-vous iouer sans chandelle; va, va, lui dirent ils, tu n'es pas encor bien esueillé. & feignans de ne prendre pas garde à lui, firent semblant de recommencer leur ieu, & l'autre peu à peu se rendort à demy, ceux qui iouoient

ioüissent ou qui faisoient semblant de iouer, feignans estre en dispute sur vn dé, sçauoit si c'estoit droict ou non, appellerent l'autre pour les inger, lui disant, tien, regarde ie te prie, si ce de là ne marque pas vn cinq, & si cettuy-cy a raison de me le disputer. Cettuy-cy estant resucille, ouure les yeux & leur dit, comment voulez-vous que ie vous iuge, si ie ne voy gouste, va, va, lui dirent-ils, frotte tes yeux par plusieurs fois. Il se frotte les yeux par plusieurs fois, & dit, le diable m'emporte si ie ne voy goute, les autres feignirent d'estre extremement étonnez, lui disant, mais par la foy te mocques tu point? Non ou ie puisse mourir, dit l'autre, apporté la chandelle, dit l'vn d'eux à l'autre, ce qu'il fit semblant de faire, & s'approchant près de celuy qui estoit couché, ils lui dirent, comment tu ne vois pas cette chandelle? Non dit l'autre, ie proteste que ie ne voy point. Ah' dit vn des deux camarades, ie me doutois bien que Dieu te puniroit pour tes horribles blasphemes, sans doute il t'a osté la lumière des yeux, & t'a fait deuenir auugle; l'autre extremement fasché se met à pleurer & à se desesperer, demandant pardon à Dieu, & le priant d'auoir pitié de luy, vn des deux vint à son compagnon, approchez vn peu la chan-

delle, ce que l'autre faisant semblant de faire, dirent entr'eux, voyez vn peu quel dommage c'est, il a les yeux si beaux qu'il n'y paroit point, ils le consolent le mieux qu'il leur fust possible, lui conseillant de demander pardon à Dieu, & là dessus se couchèrent, l'autre ne se fit que plaindre & soupirer toute la nuit, il s'obligea à quantité de vœux & pelerinages : & à ne iurer jamais, tant qu'à force de prières, le sommeil l'assoupit, & le len demain au matin en s'éveillant, il fut tout estonné qu'il vit le iour, il creut, & ses compagnons ayderent à le lui persuader, que c'estoit par miracle, & que la contrition qu'il auoit eüe de son peché, lui auoit fait obtenir cette grace de Dieu, en consideration des vœux qu'il auoit fait, que ses compagnons l'obligerent d'accomplir, ce qu'il fit, & de là en auant, vescu tres-deuotement, & perdit cette mauuaise habitude de blasphemer qu'il auoit auparauant.

D'un Curé de village à ses Parroissiens.

VN certain Curé de village, qui aimoit extrêmement à iouer, auoit passé vn Samedy toute la nuit à iouer à la triomphe avec trois ou quatre de ses parroissiens qui lui gagnerent son argent, & pensant le re-

gagner

gagner il ioua iusques au grand iour en perdant tousiours, & iusques à ce qu'il fut heure d'aller à l'Eglise, on le vint querir pour dire Matines, parce que le lendemain il estoit Dimanche & vne bonne Feste. Il quitta le ieu fort à regret, disant à ceux qui luy auoient gagné son argent, qu'ils lui donneroient sa reuanche si tost que le seruice seroit finy, ce qu'ils lui promirent: & de peur que les cartes ne fussent egarées, il les met dans sa manche, & s'en alla à l'Eglise. Apres que Matines furent dites, on dit la petite Messe, & ensuite la grande. Comme il vint à dire le prosne, en se remuant de costé & d'autre, les cartes qu'il auoit dans sa manche tomberent au milieu de l'Eglise, dont il demeura extremement surpris, & le peuple fort estonné: comme il chercha quelque moyen pour euitier l'affront qu'il en eût receu, ils s'aduise de le reparer par vne iolie subtilité; disant, Or ça mes amis, pourquoy vous imaginez-vous que i'ay apporté ces cartes, & que ie les ay iettées deuant tout le monde au milieu de l'Eglise: vous imaginez-vous que ie l'aye fait sans mistere non, non, mes amis, sçachez que ie l'ay fait à dessein, pour vous faire rougir de honte de la mauuaise nourriture que vous souffrez à vos en-

fans, & du peu de soing que vous auez, de les instruire en ce qui est de leur salut, & des bonnes mœurs, & pour vous le faire paroistre, vous allez voir. Il appelle vn de ces enfans qui estoient à l'Eglise: le premier qui se presenta deuant luy, lui disant, ramassez moy vne de ces cartes là, ce qu'il fait, qu'elle carte est-ce? lui dit il, c'est vn valet de cœur, respond-il: il en appelle vn autre, à qui il en dit autant, & l'autre c'est vn sept de trefle, l'autre c'est vn as de cœur, & le mesme fi. à la plus grande partie des enfans de la Parroisse, puis ouure le Missel, & demanda à l'vn d'eux quelle lettre est-ce là? ie ne sçay, Monsieur, dit-il, & pareillement aux autres, & bien mes amis, dit-il, n'est-ce pas vne honte, que ces enfans connoissent toutes les cartes, & pas vn d'eux ne connoist vne lettre. Ainsi il eschapa par cette subtilité où vn plus habile homme que luy fust peut estre demeuré muet, & eust eu l'affront tout entier.

*D'un Seigneur de village & de son
Meusnier.*

VN Gentil-homme qui auoit la reputation d'estre d'une humeur estrange & extremement cruelle, fit decretar la Seignurie tant temporelle que spirituelle d'un certain

certain Gentil-homme qui la possédoit, & qui luy devoit quantité de deniers. Comme il fut en possession de cette terre, il ouyt parler que le Curé de cette Parroisse faisoit profession de deuiner, c'estoit vn terme dont vsoient les simples païsans du village, qui appelloient ainsi l'Astrologie Iudiciaire, dont le Curé extrêmement curieux, & quelquefois se plaisoit à raffiner sur les Almanachs, promettant de la pluye & du beau temps; selon qu'il le voyoit par la conjonction des Astres, qui le plus souvent trompent le plus ceux qui s'y fient trop. Cela donna lieu à ses Parroissiens de dire, qu'il sçauoit bien deuiner. Ce nouveau Seigneur qui se mocquoit de la superstition de ceux qui croient qu'il y ait des hommes qui puissent deuiner non seulement les choses passées, mais les futures, qui est réservé à Dieu seul, enuoye vn matin querir ce Curé, qui le vint trouuer au liét en tremblant, veu la mauuaise opinion qu'on luy auoit imprimée de sa bizarre humeur. Comme il fut entré dans la chambre, ce Seigneur luy dit; On me veut faire accroire que vous-vous meslez de deuiner. A quoy le pauvre Curé respondit, Monsieur, c'est de quoy ie ne fais nulle profession, mais bien suis-je curieux en l'Astre

logie judiciaire, & par le moyen des Astres nous rencontrons quelque fois par le iugement que nous faisons de leurs aspects, conjunctions & de leurs influences. Ce Seigneur qui estoit extremement ignoant, & qui n'entendoit du tout rien à ce discours, dit au Curé comme il estoit tout à fait déraisonnable. Vois-tu mon amy si tu ne me deuines quatre choses que ie veux çauoir, ie te feray donner les estriuieres, & te traiteray comme vn affronteur, ce Curé voulut s'excuser, non, non, dit-il, il n'y a point d'excuse, il faut te resoudre à l'vn des deux. Ces quatre choses que ie veux çauoir, sont. La premiere, où est le milieu du monde. La seconde, ce que ie vauz. La troisieme, ce que ie pense; & la quatrieme, ce que ie croy. Ce Curé luy voulant dire qu'il n'y auoit que Dieu seul qui conneut les eœurs d'autrui; Non, non, mon amy luy dit-il, tu penses attraper les simples par tes impostures ordinaires, mais ne croy pas me traiter de la meisme façon, ie veux que tout presentement tu confesse que tu n'es qu'un affronteur, ou que tu me satisfasse à ce que ie demande. Ce pauvre Curé connoissant cet extrauagant brutal iusques au dernier poinct; & que ce seroit l'irriter dauantage de luy contester, luy de-
manda

manda seulement terme iusques au lendemain , pour auoir loisir de consulter ses Ephemerides , ce qu'il luy accorda. En retournant en son Presbitaire, il rencontre le Meusnier du village, qui le voyant triste luy demanda ce qu'il auoit , il luy conta ce qui luy estoit arriué aupres de ce nouveau Seigneur, à qui le Meusnier dit, laissez moy faire ie vous deliureray de cette peine, vous me donnerez seulement demain au matin vôtre robe & vôtre bonnet, il ne m'a iamais veu, & quand vous luy auez tantost parlé, il estoit dans le liēt à ce que vous venez de dire, & la chambre estoit obscure , il ne vous aura pas sans doute remarqué, i'y veux aller sous vôtre nom, & le satisfaire de ses doutes : le Curé qui connoissoit le Meusnier, pour homme extremement subtil & entendu, & d'ailleurs, estant fort empesché de ce qu'il luy respondroit le lendemain, se resolut de se laisser conduire à luy: il luy accorda volontiers ce qu'il luy demandoit, & dés le soir mesme luy enuoya sa robe, sa soutane & son bonnet carré. Le Meusnier le lendemain estant venu, il s'habille de ces longs habits, & n'y eust eu personne qui ne l'eust pris pour vn maistre és Arts. Il va trouuer le Seigneur qui se-leuoit, & luy fit dire par vn lac-

quais, que son Cure le demandoit pour auoir raiſon de ce qu'il luy auoit demandé. A ce mot eſtant preſque habillé, il le fait entrer dans la chambre; & luy demande, s'il pourroit ſatisfaire à ſes demandes, il reſpond qu'ouy, ſur le peril de ſa vie. Ce Seigneur bien ioyeux, ſi-toſt qu'il fut habillé, luy dit, & bien diſ-moy où eſt le milieu du monde. Je ne vous le diray pas ſeulement, luy dit le Meufnier, mais ie vous le veux monſtrer, ſi vous me voulez ſuiure, & meſme il ne faudra pas aller gueres loing: car il eſt aſſez proche d'icy. Eſt-il poſſible, dit ce Seigneur? Ouy Monſieur, dit le Meufnier, ie pretends ſi vous le voulez de vous le monſtrer dans vn quart d'heure, ie le veux dit le Seigneur, ils ſortent enſemble, & le Meufnier le meine dans vne grande campagne, où apres auoir quelque temps fait ſemblant de meſurer la terre avec vn long baſton qu'il auoit apporté à ce deſſein, il le ficha en terre, & dit à ce Gentil-homme, Monſieur, voila iuſtement le milieu du monde, ce Seigneur luy demanda comme il le iuſtifieroit; ah Monſeigneur, luy dit-il, faites le meſurer, & en cas que vous y trouuiez manque d'vn pouce, ie veux perdre la vie. Le Seigneur voyant qu'il n'étoit pas en ſon pouuoir, lui dit, j'aime mieux

mieux te croire, passe pour celuy là. Venons au second. Combien crois-tu que ie vaux: Monseigneur, dit-il, Nostre Seigneur, qui sans vous faire tort valoit vn peu mieux que vous, ne fut vendu que trente deniers, quand ie vous mettray à vingt-neuf, auez vous raison de vous plaindre? Non mon amy, tu as raison, dit le Seigneur. Or voyons cettuy-cy, si tu me dis à quoy ie pense, ce ne sera pas peu fait pour toy. Ma foy, dit le Meusnier, ie gagerois, Monsieur, que vous pensez plus à vostre profit qu'au mien, & par ce moyen ie croy auoir satisfait à vostre demande? Il est vray dit-il, mais que répondras-tu au quatrième, me diras-tu bien ce que ie croy. Ouy, Monsieur dit-il; N'est il pas vray que vous croyez que ie suis vostre Curé? Ouy, dit ce Gentil-homme, & cependant, dit-il, vous vous trompez: car ie ne suis que vostre Meusnier. Ainsi par cette subtilité il fit rire le bon Seigneur, & passer sa mauuaise humeur par ce moyen.

Subtilité d'un Bouffon pour auoir ce qu'on luy auoit promis.

CHacun sçait que les bouffons ont libre entrée par tout, & particulièrement chez les Grands, & qu'il leur est permis des choses pour lesquelles d'honnestes gens se-

roient châtiez, & l'on voit même qu'au ieu d'eschets, les fous sont plus près des Rois que les Cheualiers. Vn certain bouffon ayant libre entrée chez vn certain Prince, & ayant fait quelque tour de son mestier, qui luy auoit plu, le Prince luy promit vn habit fort beau qu'il luy monstra, qu'il n'auoit plus d'enuie de porter, ce sont ordinairement les presens qu'on fait aux gens de cette estoffe, & commanda à son valet de chambre de lui donner quand il le viendrait querir, le lendemain au matin le bouffon ne manqua point, car ils sont fort punctuels à de tels rendez-vous. Le valet de chambre fort mal satisfait de cette liberalité de son maistre, qui estoit si mal employée, auoit enuie de se seruir du corps du pourpoint pour en prendre le passément, qui fut la raison pourquoy il destacha les manches, & le serra, enueloppant ces manches, le haut, le bas & le manteau, dans vne toilette, & les bailla à ce bouffon, qui croyant que tout y estoit, s'en alla chez luy sans le regarder. Mais comme il l'eut déployé, & qu'il vit que le corps du pourpoint manquoit, par la malice du valet de chambre: car il se doutoit bien, que cela ne pouuoit venir que de luy, il se resolut de l'a-

uoir

voir par vne subtilité, qui feroit sans doute rire le Prince qu'il connoissoit de bonne humeur, & l'obligeroit peut-estre par là, à quelque nouvelle liberalité. Il va trouver le Curé de la Paroisse du Prince, à qui il fit entendre qu'il estoit mort quelqu'un là dedans, & qu'il l'enuoyast querir pour le mettre en terre : ce Curé y enuoye des Prestres, avec la Croix, & la Banniere, & le bouffon marchoit à la teste, qui les conduisit iustement chez ce Prince comme il estoit prest de sortir. Voyant cét équipage ils s'en estonne, & comme il demandoit que vouloit dire cela, le bouffon s'aduance, qui luy dit, Monseigneur, il vous a pleu me faire l'honneur de me donner vn de vos habits, vostre valet de chambrem'a donné le manteau & les chausses, pour le pourpoint, il ne m'a donné que les manches, nous venons querir le corps, Monseigneur. Le Prince se mit si fort à rire de cete naïfueté, qu'apres auoir goui mandé son valet de chambre, il commanda qu'on luy donnast le corps.

*Vengeance subtile d'un François sur
un Espagnol.*

VN François & vn Espagnol disputans vn iour ensemble sur les prerogatiues

de leur Nation. L'Espagnol se voyant vaincu en plusieurs choses par le François, la Nation duquel auoit beaucoup d'auantages sur l'Espagnole. L'Espagnol le voulut prendre sur le fait de la Religion, disant au François, voyez si en vostre país on est deuot & respectueux enuers Dieu comme en ce país-ey, j'ai esté en France dit-il, où l'on lui rend si peu d'honneur que j'en estois honteux, quand on porte le S. Sacrement à vn malade, il n'y a le plus souuent qu'un simple Prestre, qui le porte avec vn petit Clerc qui sonne vne petite clochette sans aucune suite. Mais en Espagne quand le S. Sacrement marche par les rues, voyés avec quelle pompe, & quelle suite il est accompagné, jamais ne va qu'avec quantité de flambeaux & quatre ou cinq cens personnes à sa suite, tous ceux qui le rencontrent quelques affaires pressées qu'ils ayent, il faut qu'ils quittent tout pour l'accompagner, & le Roy meisme & les grands d'Espagne, quand ils s'y rencontrent, tiennent à grand honneur de prendre vn des bastons du Dais duquel il est couuert: l'aduouë cela, dit le François: mais le bon Dieu sçait bien qu'en France il est avec ses anciens seruiteurs, desquels n'ayant nulle doute, il ne se soucie pas beaucoup de se fai-

re accompagner. Mais en Espagne, où il y a vn si grand nombre de Iuifs, il craindroit s'il ne se faisoit ainsi accompagner, qu'on ne le crucifiast encor vne fois. Comment, dit l'Espagnol, pour le faict de la Religion voudriez vous entrer en comparaison avec nous ? ne scait-on pas bié qu'il y a plus de SS. Canonisez en Espagne, que ie n'ai de poils à la barbe. Le François soustient, qu'il y en a eu beaucoup plus en France, & sur cette dispute, le François luy dit en presence de monde, vous dites qu'il y a eu plus de Saints en Espagne que vous n'avez de poils à la barbe, mais il y en a eu cent fois plus en France que ie n'en ay en la barbe & en la teste, & pour vous le tesmoigner, voulez-vous à chaque S. François. que ie vous nommerai que ie vous arrache vn poil de vostre barbe, & à chaque S. Espagnol que vous me nommerez vous m'en arracherez vn de la mienne. Je le veux, dit l'Espagnol, ah pauvre homme, dans peu il ne vous en restera pas vn. Ils se mettent donc en estat & gagerent vne grande somme d'argent, que deuoit perdre celui qui demeureroit court. Le François commence, & en arrachant vn poil de la barbe à l'Espagnol il dit, S. Denys, l'Espagnol lui en faisant autant, lui dit, Saint Ignace. Le François en

prend vn autre, disant S. Martin. L'Espagnol, S. Xavier. Le François, Saint Louys. L'Espagnol, Sainte Tereſe. Le François, Sainte Clotilde. L'Espagnol, S. Iſidore. Le François, S. Bruno.; L'Espagnol arrachant au François deux poils tout à la fois, dont il lui fit mal, dit S. Coſme, S. Damian. Le François ſe voulant vanger, lui prend vne mouſtache toute entiere qu'il lui arrache, diſant, onze mille Vierges, là finit la diſpute, car la douleur qu'il ſentit, fut ſi grande qu'il aim mieux quitter la partie, & puis il euſt eu bien de la peine d'en nommer onze mille tout d'un coup.

D'un Cordonnier qui ſe vengea d'un Archeueſque.

L'Archeueſque de la ville de Toledé, Metropolitain des deux Caſtilles, qui eſt vn Prelat de ſi haute reputation, en Eſpagne dont il eſt le Primat, qu'il paſſe pour vn petit Pape, ayant vn million de livres de reuenu, & en eſſect c'eſt le plus riche Diocèſe de la Chreſtienté, eſtant dans la ville de Senille en Eſpagne, fit tuër vn Cordonnier de la meſme ville, pour quelque rapport qu'on lui fit qu'il auoit meſdit de lui. Le fils du Cordonnier, qui eſtoit homme reſolu, ſe

se porta partie contre lui pardeuant le Iuge Ecclesiastique, pour auoir raison de la mort de son pere, dont il donna des preuues si claires que personne n'en pouuoit douter, qui obligerent la Iustice, veu la qualité du personnage, de condamner l'Archeuesque d'estre vn an sans dire la Messe, pour reparation de ce crime. Le fils du Cordonnier ne se tenant point satisfait de cette condamnation, attend que le Roy d'Espagne, qui estoit Dom Pedro; qu'on surnommoit le Cruel, vint à Seuille, comme le bruit couroit qu'il y deuoit venir pour le iour du S. Sacrement, qui deuoit estre en bref: Si tost qu'il fut arriué, le fils du Cordonnier ne manqua point de le venir trouuer, & se iettant à ses pieds, luy demanda vengeance de la mort de son pere que l'Archeuesque de Toledé auoit fait tuër sans aucune cause. Le Roy lui demanda s'il ne s'en estoit point plaint en Iustice. Ouy Sire, dit-il, mais on n'en a pas tenu compte, veu que ie ne suis qu'un pauvre Cordonnier, & lui un Prelat de telle reputation. Le Iuge Ecclesiastique, pour reparation de son crime, l'a seulement condamné à estre vn an sans dire la Messe, dont il se mocque, ayant bien moyen de viure sans cela. Le Roy luy demanda, mais ce que tu me dis est-il bien.

vray ? Ouy Sire, sur le peril de ma vie, respond le Cordonnier. Auras-tu bien la hardiesse de le tuer ? lui dit le Roy, Ouy Sire, dit il, pourueu que vostre Majesté me le commande. Va fay-le, dit le Roy, & ne te mets point en peine. Ce Cordonnier s'en reua fort ioyeux, & se saisit d'un bon poignard, se resoluant de faire cette execution le lendemain, qui estoit la feste du S. Sacrement, mesme en la presence du Roy. Il scauoit que le lendemain, cette grande procession se deuoit faire, qui en ce pays là est tres magnifique, où l'Archeuesque deuoit paroistre à la queue avec ses habits pontificaux, à costé de l'Archeuesque de Seuille, il le suit iusques à ce qu'il fut deuant le Palais Royal, où le Roy & toute sa Cour étoit aux fenestres pour voir passer la Procession. Là il ne le manque point, & le choisissant droit au cœur, il luy donna deux si grands coups de son poignard, qu'il tomba roide mort à ses pieds. L'horreur de cet étrange spectacle donna de l'étonnement à tous les spectateurs, on se saisit de luy pour le mener en prison afin d'en faire vne seueré iustice. Il se fit vn si grand bruit, que le Roy se doutant bien ce que c'estoit, en demanda la cause. On luy dit la hardiesse qu'auoit en
ce

ce malheureux, & qu'on le menoit en prison. Le Roy commande qu'on l'amenaſt deuant luy : Et d'autant qu'on ſçauoit que le Roy étoit vn Juſticier très-ſeuere, qui comme nous auons dit, luy a donné iuſques au iourd'huy dans les Histoires le ſurnom de Cruel, on n'eſperoit pas de lui autre choſe qu'une horrible punition d'un ſi deteſtable crime. Le Roy l'ayant deuant lui en preſence de cette honorable aſſiſtance, lui dit d'un ton graue: Vien ça traître, & meſchant homme que tu es, quel malin eſprit t'a porté à commettre vn ſi énorme crime en preſence de Dieu, & à ma veüe, en vn iour meſme ſi ſainct comme eſt cettuy-cy ? Le Cordonnier, qui ſçachant l'aduëu qu'il en auoit eu de ſa Maieſté, auoit ſuiet de répondre hardiment, lui dit ſans s'étonner: Pourquoi, Sire, a-t'il eu la hardieſſe de faire tuer mon pere comme il a fait, & quoi que pluſieurs fois i'en aye demandé Juſtice, on ne me l'a pas faite ? Ce que voyant, n'ay-je pas eu raiſon de la faire moy-meſme ; chacun fut étonné de cette réponſe ſi hardie : Mais ceux qui tenoyent le party de l'Archeueſque maintindrent deuant le Roy que cela étoit faux, & qu'on lui auoit rendu Juſtice, & écouté ſa plainte. Quelle Juſtice me peut-on auoir

rendue, répond le Cordonnier, puis qu'il étoit en vie ? Le Roy voulut sçauoir quelle iustice on lui auoit rendue, on luy dit qu'on auoit condamné l'Archeuesque d'estre vn an sans dire la Messe, & que c'estoit vne grande infamie à vn homme de cette condition là. Et bien, dit le Roy, n'auois tu pas sujet de te satisfaire. Non, Sire, répondit le bon homme, puis qu'il auoit bien moyen de s'en passer. Le Roy luy demanda de quel mestier il estoit, il répondit qu'il estoit cordonnier, va luy dit le Roy, pour punition de ton crime ie te commande d'estre vn an entier sans faire des souliers ; & pour auoir moyen de viure, il luy assigna vne bonne pension à vie sur les biens du deffunct Archeuesque.

*D'un Gentil-homme qui se vangea d'un
Coupeur de bourse.*

VN Gentil homme s'amusant dans la Galerie du Palais à lire vn Liure à la Boutique d'un Libraire, il vit vn certain galand s'accoster de luy, qui n'auoit pas trop bonne mine. Ce Cavalier auoit vn grand manteau d'escarlatte avec force boutons d'or, sur lesquels voyant que ce drosle auoit dessein, il se tourna de l'autre costé pour lui donner plus.

plus de lieu de venir à bout de son entreprise, afin de le surprendre sur le fait. Le galant voyant qu'on lui faisoit beau ieu, avec son couteau commence à vous couper sept ou huit de ses boutons, le Gentil-homme qui s'en apperceuoit bien, met la main dans sa poche, feignant d'en tirer son mouchoir, mais c'estoit pour en tirer comme il fit vn couteau qu'il auoit aussi bien que l'autre, qui coupoit comme vn rasoir, avec lequel haussant la main, feignant de rendre le Liure au Libraire, il vous attrapé mon diôle si subtilement, qu'il lui coupe l'aureille toute nette; lui qui sentit cela plus viste que le iour, commence à crier tout haut: ah! mon aurreille, & le Gentil-homme de son costé se met à crier, ah! mes boutons. Le Coupeur de bourses oyant cela, lui iettant ses boutons à la teste, lui dit, tien voila tes boutons, & l'autre lui iettant pareillement son aurreille, & tien voila ton aurreille. Encor le pauvre diable fut bien heureux d'en estre quitte pour cela.

*D'un Filou qui trompa vne Marchande
de Soye avec vn faux Diamant.*

VN Filou extremement rusé auoit vn fort beau Diamant, qui valoît bien dix.

sept ou dix-huit cens liures , avec lequel
ayant dessein de faire vn tour de son mestier,
il fit tailler par vn Orfevre de les amis, vne
pierre blanche, de celles qui viennent de
Canadas, qui ressemblent estans taillées, si
fort à vn Diamant, qu'il n'y a que les experts
qui en puissent connoistre la difference, ils
escriuent mesme sur le verre comme les fins,
& ont aussi vn lustre sinon esgal, pour le
moins extremement approchant. Il la fit ,
comme dit est, tailler de la mesme forme, &
de la mesme grosseur que le bon, avec vne
fucille si proprement mise & l'enchassure si
semblable, qu'il estoit bien mal aisé à vn au-
tre qu'un expert Lapidaire de le discerner
d'avec le bon. Avec ces deux pieces, il vient
accoster vne Marchande de Soye de la rue
au Foire, à qui il dit qu'il s'alloit marier , &
qu'il lui falloit quantité d'estoffes pour s'ha-
biller lui & sa maistresse. Cette Marchande
aspre au gain, voyant vne si bonne pratique,
lui dit qu'il ne trouueroit point dans Paris
mieux son fait que chez elle , ni qui lui fust
meilleur marche. Elle lui desploye quantité
d'estoffes de toutes sortes , mais auant de
rien marchander , il lui dit, Madame, ie n'ay
point d'argent content à vous donner iuf-
ques à ce que i'en aye receu de mon maria-
ge

ge, ie me marie dans huit iours, apres ie dois receuoir mon argent, il m'en faut pour quinze ou seize cens liures; mais en attendant que ie vous paye ie vous donneray des gages. Quels gages me donnerés-vous, Monsieur, ce lui dit-elle: Tels que vous en serez contente, lui respondit-il, & lui montrant son Diamant, ie vous laisseray cette bague, lui dit-il. Elle le regarde, & quoy qu'elle ne s'y connuist pas, elle vit bien qu'il estoit fort beau, mais lui dit-elle, Monsieur ie ne me connois point en pierreries, ie ne connoy point leur bonté, & ne sçai point leur valeur. Faites le voir, dit-il, Madame, à quelque personne capable, & à qui vous vous fiez, ie m'en rapporterai à ce qu'il en dira. Elle trouua cette proposition fort iuste, & dit qu'elle le monstreroit fort volontiers à vn Orfevre de sa connoissance, s'il vouloit prendre la peine de venir avec elle iusques là, il dit qu'il iroit fort librement, elle le mena donc chez vn sien compere Orfevre, à qui elle fit voir ce Diamant, le priant de lui dire s'il estoit bon, & combien de marchandise elle pouuoit fier dessus. L'ayant contemplé à loisir, allez, dit-il ma commere, quand vous lui donnerez pour cinq cens escus de marchandise & plus encor, ie vous

en respond sur ce gage là, ie le croy bien dit le galand, vous ne l'aurez pas asseurement pour ce prix-là, mais ie n'ay pas enuie de le vendre, & il suffit que vous m'en bailliez enuiron pour cette somme là, ie pense que i'en auray assez. Mais Monsieur, lui dit-elle, vous sçavez que les Marchands comme nous, ont affaire de leur argent pour aller en marchandise, si vous pensiez me le laisser long-temps entre les mains, vous me feriez tort. Madame, dit-il, ie vous feray vn mot, par lequel ie vous donnerai permission de le vendre, comme estant à vous, si dans vn mois pour toute sorte de delais, ie ne le retire d'entre vos mains. Fort bien, dit la Dame, i'en suis contente, & s'il ne le retiroit pas par hazard, dit l'Orfevre, & que vous eussiez affaire d'argent, apportez-le moy, ie vous en donneray tousiours iusques à seize cens liures; la Dame bien aise, iugeant bien qu'il falloit qu'il valust dauantage, puis que si franchement cét homme en offroit ceste somme pour regagner dessus, dit au maistre du Diamant qu'il pouuoit venir à sa Boutique choisir telle marchandise qu'il lui plairoit. Il reprend sa bague, & s'en reuont à la boutique, où il print quantité d'estoffes d'or & de soye de toutes façons, iusques à la concurrence

currence de 1600. liu. sur lequel marché la Dame faisoit son conte de gagner bien près de cent écus, qui estoit vne bonne iournée pour elle. Comme toutes les marchandises furent coupées, il luy mit en main le faux Diamant que nous auons dit, qui estoit si semblable au fin. La Dame le print, n'ayant garde de s'imaginer la tromperie, & ne le regarda pas beaucoup, parce qu'elle ne se desffioit pas que ce fut vn autre que celuy qu'elle auoit veu entre les mains de l'Oïsevre. Le galand lui dit, Madāme, faites moy s'il vous plaist apporter du papier & de l'encre pour en faire vn petit mot, il me semble à propos que nous en ayons chacun vn, moi pour auoir lieu de vous redemander mon Diamant en vous apportant vostre argent, & vous de le vendre en cas que ie ne puisse venir le requerrir, quoy que ie sçache bien que cela n'arriuera pas, mais il est bon de prendre ses seuretez: car vous non plus que moi ne sommes pas asseurez d'estre en vie d'huy en vn mois, ce qu'elle trouua fort raisonnable, il fit donc vn billet pour luy laisser qui estoit en ces termes: Je souz signé vn tel, vn nom qu'il print à plaisir, Escuyer sieur d'vn tel lieu, avec quantité de qualités, qu'il adiousta, reconnois & confesse deuoir.

à honorable personne Dame vne telle ,
Marchande de Soye, demeurant à Paris rue
au Foire, Parroisse S. Innocent la somme de
seize cens liures , pour marchandises à moy
liurées, dont ie me tiens content; laquelle
somme de seize cens liures ie promets lui
payer dans vn mois du iourd'huy, & pour
assurance de cette somme, ie lui ay laissé
entre les mains vn Diamant pesant tant de
grains en table enchassé en vne bague d'or
esmaillée en telle façon, dont elle contente,
demeurant d'accord moy dit vn tel, que le
dit mois expiré ladite Dame le pourra ven-
dre à qui bon lui semblera, comme à elle
apartenante, sans que moi ni les miens puis-
sent cy-apres reuandiquer, sous pretexte
qu'il pouuoit valoir dauantage que ladite
somme de seize cens liures, ou pour quelque
autre que ce soit, en foy de quoy i'ai signé
ces presentes, à Paris ce trentiesme, &c.
témoins tels & tels voisins, qu'on pria de si-
gner, & lequel ecrivit la Dame garda, & lui en
fit vn de sa part, contenant à peu près la
meisme chose, qu'elle lui mit entre les mains,
de façon qu'ils se separerēt tous deux extré-
mement contents l'vn de l'autre. Le mois ex-
piré, la Dame fut extrêmement contente de
voir qu'il n'estoit point reueu querir son
diamant.

diamant, s'imaginant desia auoir gagné pour le moins cent autres escus, mais au bout de quelques iours estant pressée d'argent pour faire vn payement pour des marchandises qu'ils auoient acheptées, elle fut trouuer son compere, pour le prier de lui prester de l'argent dont elle auoit besoin sur ce Diamant, dont mieux que pas vn il connoissoit la valeur, cét Orfevre apres l'auoir consideré, lui dit, pour ce Diamant là, ie n'en voudrois pas auoir baillé plus de cent sols, qui est à peu pres la valeur de l'or, car pour la pierre ie ne l'estime pas plus de cinq fois. Cette pauvre femme fut extremement estonnée, luy disant qu'il auoit promis de lui en donner seize cens liures, toutesfois & quantes qu'elle auroit besoin d'argent. Ouy de celui que vous me monstrâtes alors, lui dit-il, mais ce n'estoit pas cettuy-cy, elle creut que ce pauvre homme relusoit, elle le fit voir à plusieurs autres Orfevres, qui tous lui dirent la mesme chose, dont elle pensa desesperer.

*D'un Filou qui affronta vn hostelier
de Paris.*

LE Renard est bien fin, dit on; mais celui qui le prend l'est encor deuotage, ie dy.

cecy , parce qu'un certain hôtelier de Paris estoit si rusé, que tous les amis pour ce sujet l'appelloient Renard , & pour ce sujet voulant tenir hostellerie , il mit pour son enseigne au Renard , qui est encor à present dans la rue saint Denys à Paris , mais ce Filou dont nous allons parler l'affina comme vous allez entendre. Ce maître Filou estoit un bas Normand, qui estant venu à Paris à dessein d'y tromper quelqu'un, car ie croy qu'il n'y auoit pas d'autres affaires, vint loger en certe enseigne du Renard, où estant arriué il demande à la Maistresse s'il pourra loger là dedans, y auoir vne chambre, & y estre traité à table d'hoste , parce qu'il auoit longtemps à demeurer à Paris , l'hostesse luy demanda combien de temps il y pourroit séjourner, il luy respondit qu'il ne le pouuoit pas bonnement dire , parce qu'il y venoit plaider un procez de consequence , & qu'il ne scauoit pas quand il pourroit estre vuidé, & qu'il loueroit Dieu de bon cœur si les iuges le pouuoient expedier dans quatre ou cinq mois, mais qu'il estoit resolu de ne sortir point de Paris qu'il n'en vit vne fin, venant en discours sur le sujet de ce procez , il dit qu'il auoit pris un Office aux parties casuelles, qu'on s'estoit opposé à la leuée , & qu'il

demanda

demandoit d'estre receu en dep osant son argent, ce que l'on disputoit, disant auoir apporté les deniers pour ce sujet; qui consistoient en dix mil escus, qu'il auoit tous coulez dans sa valize, & qu'il prioit l'hostesse de lui vouloir mettre en lieu de seureté, parce qu'il n'y vouloit point toucher, estant réservé pour ce sujet, l'hostesse luy promit d'en auoir soin, & de lui rendre toutesfois & quantes qu'il le lui demanderoit: Il lui vaquerir vne valize qu'il auoit apportée pleine de cailloux, qu'il auoit cachetée à trois ou quatre cadénats, & qu'elle enferma encor sous deux ou trois clefs. Il demanda combien on payoit là dedans en table d'hoste, pour estre couché & leué à faire bonne chere, elle lui dit qu'on payoit cinquante sols par iour, & que venant ou non, on ne laissoit pas de payer, il l'accepta; & fit mettre en escrit le iour qu'il y entroit, pour payer quand il sortiroit autant de iours qu'il y auroit demeuré, il fut bien trois mois logé là dedans à faire grand chere, sans qu'on lui demandast de l'argent, s'imaginant auoir de si bon gages de lui en cette valize, où ils croyoient qu'il y eust dix mil escus, comme il leur auoit donné à entendre, sortant tous les iours du matin, & ne reuenant qu'à midy, & apres qu'il

auoit dîné il ne reuenoit que le soir, feignant tousiours de venir solliciter ses Iuges, & conférer avec son Aduocat. Il continua tousiours cette vie, iusques à ce qu'un iour il apprint le soir que son hôteisse deuoit aller le lendemain de grand matin à Vaugiard voir vn enfant qu'elle y auoit en nourrice, & qu'elle ne deuoit reuenir que le soir, cela lui donna lieu de iouer d'un tour à son hôte dont il ne se doutoit pas, car sçachant que la maistresse auoit la clef du cabinet où elle auoit enfermée sa valize, il vint sur le midy, contre-faisant le ioyeux, dire à son hôte qu'il venoit de gagner cent liures en vn quart d'heure de temps, par ce qu'il venoit d'achepter vn cheual qui lui auoit coûté cent escus, & que tout à l'heure on luy en auoit voulu donner quatre cens liures, demande promptement sa valize pour prendre de l'argent pour payer le Marchand qui l'attendoit pour aller dîner ensemble, cét hôte lui dit que sa femme en auoit emporté la clef, & qu'elle ne deuoit reuenir que le soir: là-dessus il commence à iurer & à tempêter avec mille sermens, voulant tout à l'heure qu'on enuoyast querir vn Serrurier pour ouurer la porte, disant qu'il ne recouriroit peut estre vne telle occasion, que le Marchand.

chand s'en vouloit aller, & qu'il ne pouuoit attendre. L'hoste qui void qu'il ne pouuoit ouvrir cette porte sans se faire tort, & sans laisser tout à l'abandon, car cette clef estoit enfermée dans vn autre cabinet, & qu'il falloit rompre deux ou trois serrures, d'ailleurs qu'estant seul il ne pouuoit pas auoir le loisir de vacquer à cela, lui dit, Monsieur, ce que vous me demandez est impossible, ie ne scaurois pas rompre ce cabinet pour auoir la clef, de combien auez vous affaire, i'ayme mieux vous le donner, & vous me le rendrez quand elle sera venuë. Luy qui ne demandoit pas mieux, fait semblant d'estre mal satisfait, disant que s'il auoit besoin de plus grande somme qu'auant en seroit, mais pourtant à la fin se laisse combler à prendre cent escus des mains de son hoste pour aller payer le cheval qu'il feignoit d'auoir acheté, fait marché mesme combien il lui cousteroit par iour pour le nourrir, & pour mieux colorer sa fourbe, il fit donner mesme vn teston au valet, pour auoir soin de le bien panser, & demanda encor vne pistole à l'hoste de plus pour payer le disné avec le marchand & deux autres qui lui auoient aydé à acheter le cheval, à quoy il feignoit d'estre obligé par le marche. Il sort donc de ce lo-

gis pour n'y r'entier iamais. L'hottesse arrive le soir, à qui son mary fit des reproches, d'auoir emporté cette clef, pour laqu'elle il y auoit eu beau bruit. Elle s'en estonne, disant, quoy en plus de trois mois qu'il y a qu'il loge ceans il ne me l'a point demandée, il faut qu'à point nommé vn iour seul que ie suis dehors il en ayt eu besoin; Ouy, dit son mary, il a fallu que ie lui aye baillé cent escus pour payer son cheual, & vne pistolle pour aller faire la vie avec les Marchands, & bien, dit elle, il n'importe, nous auons assez bons gages. Le soir vient, & ne voyans point leur hôte, ils ne s'en estonnent point beaucoup, croyans qu'il fit encor la débauche avec les marchands, mais trois ou quatre iours apres n'oyans point parler de lui, ils commencent d'en estre en peine, & s'imaginer peut estre qu'ayant voulu reuenir le soir mesme ou le lendemain, il auroit peu rencontrer quelques Filous, qui pourroient bien l'auoir tué pour auoir son manteau. la nuict ils se confirmerent encor plus en cette croyance, apres l'auoir en vain attendu plus de huit iours, ce que voyans, ils presenterent Requête à Monsieur le Lieutenant Civil, exposans de ce que dessus, disans estre chargé d'une valize où il y auoit, à ce qui leur auoit

esté

dit, dix mille escus dedans, qu'ils leur auoient presté plus de cent escus, & autant pour le moins qu'il leur deuoit en despence qu'il auoit faite chez eux, que craignans d'en estre recerchez quelque iour, ils requeroient que la valize fust ouuerte par autorité de Iustice, estans satisfaits de ce qui leur peut estre deub, & déposé en telles mains qu'il plairoit à Iustice en ordonner, croyans estre obligez de faire cette diligence pour leur seureté: leur requeste leur fut accordée, vn Commissaire fut député avec Sergent & Greffier, & trois ou quatre tesmoins, pour estre presens à l'ouerture de la valize, pour rendre encor la chose plus authentique: Mais qui fut bien estonné ce fut mon hôte, quand il ne vit que des cailloux dedans, car luy qui n'en sçauoit rien que par le recit de sa femme, qu'il croyoit auoir veu & conté l'argent, il demeura plus froid que marbre, voyant bien qu'il en tenoit pour ses trois cens dix liures, pour autant pour le moins de despense & ce qui plus le desesperoit encor, fut qu'il luy fallut payer les frais de Iustice, & la taxe du Commissaire, du Sergent & du Greffier, qui se montoit encor à quelque argent. Voila comme nostre vieux Renard fut affiné, qui iura depuis de ne se fier à personne qu'a-

nec bons gages, qu'il verroit auparavant. Mais apres la mort le Medecin.

*De deux Archifilous qui attraperent
plusieurs Marchands de Paris.*

Cettuy cy est tres veritable, & des plus subtils qui se soient faits de long-temps dont les plus aduises eussent eu bien de la peine à s'en defendre. Et ie vous proteste l'auoir appris d'un des Marchands mêmes qui y furent attrapés, qui se souuiendra bien de me l'auoir dit, si ce Liure tombe entre ses mains & s'il se donne de la peine de le lire. Deux Filous de consideration, ie les nomme ainsi, parce qu'il falloit qu'ils eussent du bien pour auoir fait ce que vous allez entendre, leur fond se montoit à vingt-cinq ou trente mil liures, ils estoient estrangers, qui vindrent demeurer à Paris, l'un d'eux prit vne grande maison au Faux-bourg S. Germain, auoit carrosse & cheuaux dans vne des plus fameuses hostelleries, & l'autre fit le semblable au Marais du Temple, car il importoit comme vous sçaurez à cette heure, qu'ils fussent, le plus qu'il se pouuoit faire, separez l'un de l'autre. Celui qui estoit logé aux Marais du Temple contrefaisoit l'Allemand, semblant être fort facile à dupper, & se disoit
estre

estre Marchand qui venoit employer quantité de deniers en cette grande ville de Paris, pour auoir toutes sortes de marchandises qu'il deuoit porter à la Foire à Francfort en Allemagne, Il acheptoit de tous costez ce qu'il pouuoit rencontrer de curieux, iusqu'à plus de vingt mil liures, qu'il mit en estoifes d'or, de soye & de laine, en Castors, en toiles desliées, en dentelles de points coupez, en pierreries & orfevrie, en montres, en gands, en rubans, & esuentails, & generale-ment en tout ce qu'il vouloit faire croire, qu'il y anroit vn grand profit à le porter en cette Foire, tout ce qu'il achetoit il le payoit argent comptant, en belles pistoles qu'on ne pesoit point en ce temps là, elles ne valoient pour lors que sept liures quatre sols, mais entre marchands à la bourse elles passoient bien iusques à sept liures & six. Il prenoit les marchandises quasi au mesme prix qu'on les lui estimoit, comme vn homme qui preiugeoit bien qu'il n'en payeroit rien, quand le marché estoit fait, il payoit tout en pistoles, mais il les bailloit à sept liures six, disant qu'elles lui coustoient autant, les Marchands qui trouuoient bien leur compte ailleurs, se soucioient fort peu de deux sols sur pistole, eux qui en la vente de

leurs marchandises y en gaignoient plus de trente, & tel iusques à vn escu, toutesfois il leur disoit, Messieurs, contrefaisant l'estranger, j'ay pris icy les pistoles d'un Marchand au prix que ie vous les donne, il m'a fait entendre qu'elles valoient cela à Paris, il n'a tenu qu'à moi que ie n'aye pris d'autre argent, il n'est pas raisonnable que vous perdiez, ni moi non plus, ni qu'en cette consideration vous me vendiez vos marchandises plus cheres, tous ceux qui en ont receu de moy peuent aller trouuer mon Marchand avec vn billet de moy qui leur baillera d'autre argent: ceux-cy eurent l'oreille esueillée, disans le pis qu'il nous puisse arriuer est de perdre ces deux sols pour pistole, que nous gagnons bien & par delà sur nostre marché, mais si nous les pouuons auoir ce sera encor le mieux, de façon qu'ils prirent tous vn billet de ce pretendu Marchand, pour receuoir d'argent de son Banquier, c'est ainsi qu'il nommoit celui qui comme nous auons dit, se tenoit au Fauxbourg S. Germain. Ils les vont tous trouuer les vns apres les autres pour auoir d'autre argent, & pour ne perdre point deux sols sur chaque pistole, il les remit tous au lendemain, disant qu'il deuoit le soir receuoir d'autre argent. Cependant mon

drosse

drofle qui se tenoit aux Marais du Temple, & qui estoit saisi des marchandises, conte avec son hôte & s'en va. Le lendemain tous les Marchands se trouuent au leuer de celui qui leur auoit donné rendez-vous, ils attendirent qu'il fust habillé & en estat de parler à eux, il les fit tous entrer, leur demandant quel argent ils auoient receu de leur correspondant, chacun apporte son faict, l'un cent pistoles, l'autre cinquante, l'autre quatre-vingt, l'autre deux cens, faisant escrire sur vn liure les noms de ceux qui lui rapportoient cét argent, & la somme qu'ils lui mettoient entre les mains, comme il eut fait à tout le monde, demandant s'il n'y en auoit plus, & voyant qu'à peu près il auoit son conte, il leur dit, Messieurs, ie suis bien aise de r'auoir mon argent, celui qui vous a enuoyez vers moy n'est qu'un fripon, à qui i'ay presté tout cét argent là, à la recommandation d'un mien amy dont il m'a apporté des lettres, entre nous autres Marchands en gros nous les prenons à ce prix là, & c'est vn lot de me les renvoyer, veu que ie ne prends aucun interest de lui, allez lui faire ce rapport de ma part, & l'assurez qu'il n'aura iamais vn teston de moy, ceux-cy voulurent faire du bruit, mais l'autre leur dit, allez requier

vos marchandises, ie m'en vay vous bailler vn mot à tous, par lequel ie confesseray que j'ay repris mon argent, & que ie l'en tiens quitte. Ceux cy ne pouuans faire autre chose, furent contrains d'aller promptement chercher leur Marchand du Marais du Temple, qu'ils trouuerent party, celuy du Faux-bourg S. Germain cependant conta à son hoste & plia bagage, & fut trouuer son Camarade où ils s'estoient donné rendez-vous, qui au lieu d'aller à Francfort, allerent ailleurs debiter leurs Marchandises, & les pauvres Marchands eurent chacun vn pied de nez.

De quatre Filous qui attrapperent vn garçon de Cabaret.

CETuy cy n'est encor que gentil, & qui pourroit passer pour risée en vn Mardy-gras. Quatre bons compagnons eurent enuie de faire grand chere sans qu'il leur en coutast rien, aux despens de qui il appartient. Et scachans qu'il y auoit vn garçon qui estoit fort niais en vn bon Cabaret de Paris, ils creurent qu'il leur seroit fort aisé de le desniaiser, ils concerterent ensemble le tour qu'ils auoient enuie de lui iouer, & s'en allerent là dedans demander à dîner. Il ne faut point s'informer s'ils firent grande chere

chere & s'ils beurent du meilleur puis qu'ils n'auoient pas resolu d'en rien payer. Comme ils eurent bien disné, ils appellerent le garçon pour conter, estans arretez de conte, l'un d'eux fit semblant de mettre la main à la pochette pour tirer de l'argent, quoy que pas vn d'eux n'eût vn liard: ce que voyant vn autre qui estoit assis aupres de lui dit, que pretendez vous faire, vous ne payerez rien icy, & veritablement il auoit bonne raison, aussi n'estoit ce pas son dessein. Le troisieme se mit en colere, disant au valet, ie vous defends de prendre de l'argent d'autre que de moy. Mais le quatrieme insista encor plus que pas vn, disant qu'absolument il vouloit payer, chacun faisant deffences de son costé à ce pauvre diable, qui ne sçauoit auquel entendre. Ce que voyant vn d'eux, dit aux autres, Messieurs, ie voy bien ce que c'est, il n'y a personne de nous qui le vueille ceder à son compagnon, & nous serions iusques à demain à nous le disputer ensemble. Il faut que celui là paye sur qui le sort écherra. Bandonns les yeux à ce garçon-icy, afin qu'il n'aye pas la liberté de choisir qui bon luy semblera, & celui qu'il prendra de nous quatre payera l'escor, les autres s'y accorderent, & le bon valet aussi, qui n'y pensoit point de

malice. On le banda avec vne seruiette, & mes drosles faisans semblant de s'escarter s'en allerent les vns apres les autres, laissant ce pauvre nigaud tastonnant dans cette chambre les yeux bandez, & fut bien vne demie heure en cét estat, taschant à en attrapper quelqu'un iusques à ce que le Maître de la maison reuenant de la ville entra dans cette chambre, cettuy-cy le sentant le va prendre au collet, lui disant, ah ma foy vous payerez l'escot, & il se trouua qu'il dit vray, car l'escot alla sur le dos du Maître, qui ayant appris la fourbe qu'on lui auoit iouée, auoit sujet d'admirer la subtilité de son valet.

D'un Filou qui subtilement attrapa vn Rotisseur.

Cettuy-cy ne cede point en subtilité aux deux autres; vn drosle ayant enuie de faire grand chere à peu de frais, & de traiter ses Compagnons, s'en alla à la Valée de Misere chez vn Rotisseur avec vn Crocheteur qu'il mene avec luy, disant qu'il se marioit le lendemain, & qu'il lui falloit quantité de viandes pour ses nopces, il fait marché de tout ce qu'il trouua, & en chargea le Crocheteur tant qu'il en peut porter, disant au Rotisseur,

Rotisseur, mon amy, c'est mon oncle qui est vn Curé de cette ville qui fait les frais de mes nopces, ie vous prie de commander à quelqu'un des vostres de venir avec moy querir l'argent, ce qu'il fit, commandant à vn de ses garçons d'aller avec lui querir cette somme dont ils estoient conuenus ensemble. Il le meine par plusieurs ruës de Paris, & passant deuant saint Iacques de la Boucherie, il dit à ce garçon, c'est icy dedans qu'est mon oncle, entrons, & fit demeurer le crocheteur à la porte. Estans entrez, le premier Prestre qu'il vit qui disoit la Messe, dit au valet du Rotisseur, voila mon oncle, attendons qu'il ait acheué, ce qu'il firent. Comme le Prestre eut fait, attendez-moy, lui dit mon galand, ie m'en v'ay parler à lui. Lui qui ne connoissoit point du tout ce Prestre, lui dit à l'oreille, Monsieur, voicy vn pauvre garçon que ie vous enuoye qui a perdu l'esprit, mais son genre de folie est estrange, il croit que tout le monde lui doit de l'argent, & ne tient autre discours qu'à en demander à tous ceux qu'il rencontre, on m'a commandé de faire dire vn Euangile sur lui, ie vous prie Monsieur de m'obliger en cela. Ouy-dca, dit le Prestre, là-dessus cet homme dit tout haut, l'allez vous pas depecher, Monsieur? Ouy.

dit le Prestre. Le valet du Rotisseur entendant cela, creut qu'il n'y auoit plus qu'à tendre la main, & cependant mon drolle s'en va, qui emmeine le Crocheteur avec luy. Ce Prestre apres auoir acheué son Oraison, va trouuer ce garçon, à qui il dit qu'il se mist à genoux. Pourquoi faire, dit ce garçon, il n'est pas besoin de se mettre à genoux pour receuoir de l'argent, ie le receuray bien debout. Le Prestre croyant que sa folie agissoit, se met à le prescher, lui disant qu'il deuoit mettre ces folies là hors de son esprit, mais lui qui ne se repaissoit point de ce discours-là, demandoit de l'argent à chaque moment, ils furent assez long-temps en cette plaisante dispute, iusques à ce que le Prestre commença à se douter de la fourbe. Lui demanda quel argent il lui demandoit, celuy, dit le valet, que vostre nepueu doit pour des viandes qu'il a prises chez mon Maistre pour le festin de ses nopces, qu'il dit que vous deuez payer. A l'heure il vit bien qu'ils entenoient tous deux, ce valet voyant qu'il estoit hors d'esperance de ce costé-là, cherche son homme avec ce Crocheteur, qui estoit déjà bien loing de là.

D'un

*D'un Filou qui desroba la iuppe de la femme
d'un Procureur.*

VN certain Filon se promenant dans Paris, estant aux aguets pour trouuer moyen de faire son coup, vit vne porte ouverte, il entre hardiment, ayant son excuse preparée en cas qu'il rencontrast quelqu'un, il entre iusques à la salle, dans laquelle ne trouuant personne, il se saisit d'une iuppe de tafetats qu'il trouua sur vne chaire, & l'emporte quand & lui. En sortant la porte il rencontra Monsieur le Procureur qui reuenoit du Palais, qui le voyant chargé sous son manteau, lui demande ce qu'il portoit. Il oste hardiment son manteau, & lui monstre la iuppe qu'il portoit disant, que Madame sa femme lui venoit de donner pour la racommoder, de façon que le prenant pour vn des garçons du Tailleur, il le laissa librement aller.

Tour subtil d'un Filou.

QVoy que cettuy-cy soit imprimé quelque part, il est trop bon pour le laisser derriere, venant si à propos à nostre sujet. Et puis le liure où il est ne peut pas estre veu de tous ceux qui liront cettuy-cy. Il y

eut deux freres dans la ville de Chartres, l'vn nommé Charles d'Estampes, & l'autre Philippe d'Estampes, fils d'un riche Marchand de cette ville-là. Charles d'Estampes qui estoit l'aîné fut par son pere enuoyé à Paris chez vn Marchand Drapier, chez lequel ayant appris le mestier il se fit receuoir Maître & s'habituâ dans Paris, où il prit femme, de laquelle il eut quelques enfans, Philippes d'Estampes demeura à Chartres, faisant la profession de son pere, qui estoit Orfevre, qui s'y maria, mais qui ne peût auoir d'enfans. Vn certain Filou natif de Chartres estant à Paris, & connoissant fort bien les deux freres, & toute leur famille, il se resolut de faire vn coup de sa main chez ce Charles d'Estampes. Drappier qui demouroit en la rue Saint Honoré, il aduertit de son dessein quelques meschans garnemens de Paris qu'il hantoit, leur disant que par vne subtilité qu'il auoit conceüe en l'esprit, il trouueroit moyen de se faire receuoir à souper & coucher chez ce Drappier, qu'ils ne manquassent pas de venir à la rue sur vne heure apres minuit, qu'il leur ouuriroit la porte, & qu'ils auroient moyen de faire vn beau butin là dedans, ce qu'ils resolurent de faire.

Ce Filou icy pour venir à bout de son dessein

dessein, tout nud presque, c'est à dire en fort mauuais equipage, sans bas ny souliers, chapeau, pourpoint, ny manteau, mais seulement avec des vieux haillons qui lui seruoient de chausses, vint trouuer ce Marchand Drappier, à qui il dit qu'il auoit vne bonne & vne mauuaise nouuelle à lui dire, la mauuaise estoit celle de la mort de son frere Philippes d'Estampes, & la bonne, que n'ayant point d'enfans il estoit son heritier, & qu'il l'auoit laissé executeur de son testament. Cette nouuelle fut capable de le consoler promptement de cette perte, il lui demanda s'il n'auoit point de lettre de sa belle-sœur, il dit qu'ouy, & qu'elle lui mandoit qu'il la vint trouuer en diligence, mais sçauuez vous, dit-il, le mal-heur qui m'est arriué, passant par Palaiseau où i'ay disné en vne hostellerie où il ne me souuenoit pas que ie deuois quinze francs, il y a quatre ou cinq ans ayans meilleure memoire que moy, ils me l'on iamentu, & n'ayant point d'argent pour les payer, ils m'ont despoüillé mon habit, & l'ont pris, m'ayans mis en l'estat que vous me voyez, m'ayans donné seulement ce meschant haillon icy. Je me suis trouué si éperdu que ie n'ay pas songé à prendre ma lettre, que

de peur de la perdre i'auois coufue dans vne des basques de mon pourpoint : si vous me voulés tant faire de faueur que de me prester cette somme de quinze liures pour aller requierir mon habit, Madame vostre sœur qui me connoit fort bien, & chez qui ie suis tous les iours, estant son proche voisin, vous le rendra sans doute en cas que ie n'eusse pas le moyen de vous les rendre si tost. Là dessus il luy dit tant de particularités de Chartres, & de toute sa parentée, & dont il estoit fort instruit, qu'il ne fit point de difficulté de lui donner cette somme, tant il auoit haste de voir cette lettre qui lui annonçoit vne si bonne succession, car il sçauoit bien que son frere estoit à son aise.

Avec cét argent mon drosle fit bonne chere à Paris le temps qu'il fallut mettre pour faire croire qu'il auoit esté à Palaïseau & reuenu, il s'en va chez vn Fripier, où pour dix ou douze francs il eut vn habit tout complet qui auoit esté porté, puis s'en alla au Cimetiere S. Innocent trouuer vn des Secretaires de ce lieu-là à qui il fit escrire vne lettre aux termes qu'il voulut, au nom de la femme de ce Philippes d'Estampes, & la porta à ce Drappier, qui l'ayant leuë, & veu qu'elle luy confirmoit ce qu'il lui auoit dit

de

de bouche, & le prioit de venir à Chartres en diligence, il ne douta plus de la verité, & pour s'excuser que la lettre n'estoit pas de sa main, il fit escrire dedans qu'elle prioit de l'en excuser, que la grande affliction où elle estoit ne lui auoit pas permis, veu qu'elle n'eust sceu escrire vn mot sans baigner le papier de ses larmes. Remettant le surplus de la lettre à la relation du porteur, qu'elle attestoit fort homme de bien & de connoissance.

Ce Drappier retint cét homme à souper & coucher chez lui, qui estoit ce qu'il demandoit, lui disant qu'il se mettroit le lendemain au matin en chemin avec lui pour aller à Chartres, comme sa belle-sœur lui mandoit. Comme tout le monde fut couché, ce Filou qui n'auoit pas enuie de dormir, ouure vne fenestre qui respondoit sur la rue pour prendre garde quand ses Compagnons seroient arriuez, qui ne tarderent gueres à venir, il descend en bas pour leur ouvrir la porte, mais comme ordinairement, & principalement dans Paris où chacun se tient sur ses gardes, les portes des Marchands sont fermées à double ressort, il lui fut impossible de l'ouvrir; de sorte qu'il fut contraint de remonter, & de jeter par la fenestre quel-

que piece de drap à ses compagnons , n'osant pas en prendre beaucoup, ny d'autres meubles , de peur qu'on ne s'en aperceust au logis, puis qu'il falloit qu'il se fust voir.

Le lendemain au matin le Drappier le fait appeller, lui disant qu'ayant songé la nuit au voyage qu'il vouloit entreprendre, il ne trouuoit pas à propos de paroistre à Chartres qu'il ne fust habillé de dueil, qu'il lui falloit du temps pour cela, & partant qu'il lui conseilloit de retourner à Chartres retrouver sa belle-sœur avec vn mot de lettre qu'il lui donneroit, dans laquelle il mit la raison qui l'obligeoit de retarder encor deux ou trois iours, au bout desquels il ne manqueroit pas de se rendre par delà, la consolant le mieux qu'il lui fut possible de l'affliction qui lui estoit arriuée. Il donna cette lettre à cet homme, avec de l'argent pour faire son voyage, & pour la peine qu'il auoit eüe de lui apporter vne si bonne nouuelle, quoy qu'il lui tesmoignast beaucoup plus de regret de la mort d'vn si bon frere, que de cette bonne succession.

Ce Filou voyant qu'il n'auoit fait qu'vne partie de ce qu'il desiroit, resolut de faire la mesme fourbe à Chartres à Philippe d'Estampes,

Estampes, & lui faire entendre que son frere Charles estoit mort à Paris, pour estre receu de mesme dans la maison, & attrapper quelque Orfeverie. Pour venir à bout de ce dessein il fit par vn Secrétaire de S. Innocent contrefaire vne lettre de la femme de Charles d'Estampes, aux mesmes termes que celle qu'il auoit fait faire auparauant, lui donnant aduis de l'affliction qui lui estoit arri- uée, d'auoir perdu vn bon mary, & lui vn si bon frere, lui disant que son mary lui auoit laissé quelques legs par son testament; dont il le faisoit executeur, & tuteur de ses enfans sous âges, le priant de venir en diligence à Paris pour donner ordre à leurs affaires, lui faisant les mesmes excuses de ce que cette lettre n'estoit pas écrite de sa main.

Avec cette lettre il arriue à Chartres, il la presente à Philippes d'Estampes, qui fut bien marry d'apprendre vne si mauuaise nouuelle, & scachant que cet homme estoit venu exprez de Paris, ennoyé par sa belle- sœur, il lui fit faire bonne chere, lui disant qu'il s'en retournoit le lendemain au matin avertir sa belle- sœur qu'il s'alloit faire habiller de deuil, & que dans deux iours il li- roit trouuer, & lui donna vn mot de lettres.

mais le Filou, qui ne s'endormit point, la nuit, crocheta vn petit cabinet, dans lequel il print vne petite boüette où il y auoit quelques bagues, & quelques perles; De sorte qu'il fit mieux les affaires à Chartres qu'il n'auoit fait à Paris: Et dès le lendemain de grand matin il part, feignant aller à Paris porter les lettres. On ne s'aperceust pas si promptement de cette boüette, car le lendemain cét Orfevre ne songea qu'à faire despescher son deüil pour s'en aller promptement à Paris.

Le bon de l'affaire est, qu'ils partirent en mesme iour, Charles de Paris, & Philippes de Chartres, pour faire leur voyage, & vindrent tous deux coucher à Bonnelle, qui est enuiron la moitié du chemin de Chartres à Paris, mais Charles estant party vn peu plustost arriva de meilleure heure, alla coucher au Lyon d'or, qu'il apprint estre la meilleure hostellerie, soupa si-tost qu'il fut arriué, & s'alla coucher d'heure pour partir le lendemain du matin; Philippes arriue fort tard, demanda la meilleure hostellerie, on luy enseigna le Lyon d'or, où il fut demander vne chambre, on luy en donna vne ioignant celle de son frere, qui estoit couché & qui dormoit, & pour y aller il

falloit

fallloit passer au trauers de celle où son frere estoit. A quoy il ne prend point garde en passant, & s'alla coucher avec vn de ses amis qu'il auoit emmené avec luy.

Comme ils discouroient ensemble dans cette Chambre, Charles s'estant resueillé, ouit cette voix qu'il ingea aprocher de celle de son frere, quoy qu'il ne peust pas *discerner* les mots, dont il s'estonna fort, & commença à auoir peur que ce ne fust l'ame de son frere qui reuenoit, mais ce qui le confirma bien dauantage en cette apprehension, fut qu'ayant pris enuie à Philippes estant couche n'aller aux lieux secrets, il se leue nud en chemise, & passe au trauers de la chambre de son frere, qu'au moyen d'vn clair de Lune qu'il faisoit. eut le moyen de le reconnoistre, & le voyant en cet estat, il ietta vn grand cry: qui ne donna pas moins d'apprehension à Philippes, qui reconnut la voix de son frere, & qui s'en retourna à son liét extrêmement effrayé, croyant de son frere, ce que son frere croyoit de lui. De sorte qu'ils passerent tous deux le reste de la nuict, en l'apprehension l'vn de l'autre; mais le bon, fut le lendemain au matin qu'ils se rencontrerent faisant le deuil l'vn de l'autre, & chacun s'enfuyant

de son compagnon, avec des signes de croix, pensant voir vn fantosme, mais peu à peu s'estans enhardis, ils sceurent la fourbe qu'on leur auoit faite. De façon que chacun s'en retourna chez soy, où aubout de quelque temps ils s'apperçurent du larcin, le Drappier de son drap, & l'Orfevre de sa boüette, mais il fallut que l'vn & l'autre prist patience, pource qu'ils ne voyoient aucun remede à leur perte.

D'un Cordelier qui fut contraint de faire vne Predication à des voleurs.

Cinq ou six voleurs qui alloient de compagnie, rencontrèrent en leur chemin vn Cordelier, qui n'ayant que perdre apprehendoit fort peu cette rencontre, ils s'informerent de luy où il alloit, il respondit qu'il alloit prescher en vn certain village proche de là qu'il leur nomma. Or bien luy dit vn d'eux, puis qu'il n'y a rien à gagner avec vous, il faut que vous nous donniez vn plat de vostre mestier, & que vous fassiez presentement vne predication à nostre louange. Le Cordelier voyant que c'estoit force, dit qu'il estoit content. Il se mit donc à les prescher de la sorte, Messieurs, dit-il, ie ne vous scaurois traiter plus

plus dignement que de comparer vostre vie à celle de Nostre Seigneur Ieſus Chriſt lors qu'il eſtoit au monde. Il enduroit beaucoup en ce monde, auſſi faites vous fugitif çà & là, comme vous eſtes. Il alloit accompagné de ſes Diſciples, auſſi allez vous en troupe. Il hantoit les Scribes & les Pharifiens, vous hantez des gens qui ne valent pas mieux. Il ſouffroit le plus ſouuent la pluye, le vent, le froid le chaud & toutes ſortes d'iniures, vous receuez le plus ſouuent toutes ſortes d'incommoditez. Il alloit pieds nuds, vous n'eſtes gueres bien chauffez, Il n'auoit qu'une robe, & vous autres n'avez que ie croy que les habits que vous portez. Il ne portoit ſur luy ny or, ny argent, ie ne crois pas que vous en ſoyez beaucoup chargez. Il ieſna quarante iours dans les deſerts, auſſi faites vous bien ſouuent. Il fut tenté du diable, vous l'eſtes continuellement auſſi. Il fut transporté ſur le pinacle & ſur vne haute montagne, auſſi le diable vous porte ſur des collines pour eſpier les paſſans, & les voir venir de loing. Il eut faim & ſoiſ, il vous en prend bien ſouuent autant. Il eſtoit reſtetté de tout le monde, auſſi eſtes vous. Les Iuiſ guettoient continuellement pour le prendre, le Preuoſt & les Archers en

font de mesme pour vous attrapper. Il fut trahy par Iudas, l'un de vous autres trahira ses compagnons. Il fut pris, mené, lié & garrotté, aussi ferez vous sans doute. Il répondit deuant Anne, Caïphe, & Herodes, aussi ferez vous deuant vos Iuges. Il fut fouetté de verges, aussi ferez vous si vous ne l'avez desia esté. Il fut pendu entre deux larrons, on vous verra bien-tost de mesme. Il descendit aux enfers, aussi ferez vous. Il monta apres aux Cieux, mais vous ne partirez point de là, & demeurerez eternellement avec les diables, où vous enuoyeront le Pere, le Fils & le S. Esprit. Ainsi soit-il. Ainsi finit le Cordelier sa Predication, & s'en alla aussitost, laissant Messieurs les voleurs si confus, qu'ils n'eurent pas un mot à respondre.

D'un Larron qu'on menoit pendre.

VN larron pour ses meffaits ayant esté condamné à estre pendu & estranglé, comme on le menoit au gibet, son confesseur lui disoit, mon amy que vous deuez estre heureux en songeant que vous allez souper avec Dieu. Helas! ce dit-il mon Pere, pourueu que i'y sois bien de main à diner, ce ne sera pas mal allé. Non mon amy, lui repliqua son Confesseur, il faut tenir pour as-

seurée

seuré que vous y irez souper à ce soir, mourant contrit & repentant comme vous faites, quelle felicité de se voir seruy par des Anges en la compagnie des Saints, avec des mets tous diuins. Ah! mon Pere, répondit-il, vous me feriez bien plaisir si vous y vouliez aller en ma place, car ie vous iure que ie n'ay nul appetit, le Cordelier qui n'en auoit nulle enuie, lui dit: l'y irois fort volontiers, mon amy: mais il est auourd'huy ieusne en nostre Conuent.

Autre sur le mesme sujet.

COMME on menoit vn iour pendre vn Clarron, en lui prononçant son Arrest, le Bourreau, comme c'est la coustume, lui met la corde au col, le Roy vous saluë. Comment, dit-il, me connoit-il le bon Seigneur, ie le remercie bien fort, comme on lui oste son chapeau, ne me decouurez pas, dit-il, car ie suis fort caterreux & sujet à la migraine. Mais lui ayant dit qu'il falloit chanter vne autre langage, & se resoudre à la mort, l'ayant monté dans la charrette, comme il vit en passant par vn certain endroit qu'on alloit destourner au coing d'vne rue ne me menez pas par là, dit-il, ie vous prie, ie dois de l'argent en cette rue là, i'aurois peur

qu'on ne me fit mettre la main sur le col. Estant à l'eschelle tout prest d'estre jetté, il dit qu'il mourroit de soif, & qu'on lui donnaist vn verre de vin. On lui alia querir tout à l'heure, comme il vint pour le boire voyant l'escume qui estoit sur le verre, il dit au bourreau, ostez cela ie vous prie, j'ay toujours ouï dire que cela donne la gravelle. Apres qu'il eut beu, il laissa tomber le verre en bas, & comme il baïssoit la teste plusieurs fois, le bourreau lui demanda pourquoy il la baïssoit. C'est, dit-il, pour voir si le verre est cassé, ouy, ouy, dit-il, il est cassé, pourquoy. Là dessus ce pendart se met à dire; Ah Dieu, il m'arriuera donc auiourd'huy quelque malheur: car ie n'ay iamais cassé de verre qu'il ne m'en soit arriué. Il auoit bien raison d'auoir cette croyance, car c'estoit le plus grand qu'il lui pouuoit arriuer de sa vie.

Gasconade.

VN Gentil-homme Gascon entendant parler des belles actions de nos Generaux d'Armées, & que dans deux attaques de places vn Prince auoit tué iusques à six soldats de sa main: Hal dit le Gascon, voila bien de quoy s'estonner, ie veux que vous sachiez que les matelats sur lesquels ie repose

mes membres, ne sont garnis que des moustaches de ceux dont mon épée a esté victorieuse, & c'est de cela dont il faut s'esclamer, & non pas des petites bagatelles de ce Prince dont vous parlez.

Imagination de huit Langues en vne bouche.

IL y a environ vn an qu'un homme qui n'estoit pas des plus spirituels, entendant vn recit que l'on faisoit des belles qualitez de l'esprit de la Reyne de Suede, entr'autres dece qu'elle parloit huit sortes de Langues differentes aussi distinctement & parfaitement, que si elle estoit originaire des pays : Cét homme à mesme temps prenant la parole, dit, vraiment il ne faut pas s'estonner si cette Dame parle si bien, car puis qu'elle a huit langues dans la bouche, elle n'a garde de demeurer court.

Naïfueté impertinente d'un Lacquais.

VN ieune Aduocat du Parlement, ayant affaire d'un lacquais pour le seruir, alla sur les degrez du Palais, pour en choisir vn à sa fantaisie, parce que c'est le lieu où d'ordinaire il s'en trouue de toutes façons, & ayant ietté l'œil sur vn garçon de l'âge de dix-huit

ans, dont la phisionimie lui sembloit assez bonne, mais dont l'esprit n'y correspondoit nullement, l'Aduocat lui demanda s'il le vouloit seruir, à quoy le garçon ayant respondu qu'il ne demandoit pas mieux, & qu'il auoit vn bon respondant, ils conuindrent ensemble que l'Aduocat lui donneroit par année dix escus, & qu'il l'habilleroit & chaufferoit, ce qu'estant accordé entr'eux, & le respondant ayant donné assurance à l'Aduocat de la fidelité du lacquais, il l'amena chez luy, & tout le iour seruit assez bien son maistre, le soir venu s'estant couché, & la nuit passée, sur les huit heures du matin, l'Aduocat attendoit toujours son lacquais pour faire du feu dans sa chambre, & lui donner ses habits, mais comme il eust conté neuf heures & dix heures, & que ce garçon ne se leuoit point, il eust apprehension qu'il ne fut mort, ou qu'il lui fust arriué quelque accident, ce qui fut cause que l'Aduocat se leua & alla en la chambre de son lacquais, qu'il trouua fort bien esueillé, & lui demanda pourquoy il ne se leuoit pas, & n'estoit venu au leuer de son Maître? Ho, ho, Monsieur, dit le nigaut, auez-vous desia oublié le marché que nous fîmes hier ensemble? auez-vous pas promis outre mes gages de m'habiller

billier? Hé dame, i'attendois que vous vinsiez m'apporтер mes habits pour me leuer, ce qui donna fujet de rire à l'Aduocat, plustost que de s'en fâcher, & croy qu'il ne le seruit pas long temps d'un tel lacquais.

Le miroir où vne Dame ne se voyoit point dedans.

IL y a quelques mois que m'estant rencontré dans vne compagnie où il y auoit quantité de Dames de qualité, & entre les autres vne, qui quoy que belle n'auoit point de dents dans la bouche, & tenoit tousiours vn miroir à la main, dont quelqu'un de la compagnie estonné me demanda si ie ne scauois point pourquoy elle se miroir si souuent, à quoi ie lui fis réponse qu'il ne falloit pas s'en estonner, & que c'estoit que dans cette glace, elle auoit beau la tourner, & s'y mirer d'un costé & d'autre, elle ne s'y voyoit iamais dedans, & que c'estoit ce qui la faisoit si souuent regarder, & parce que d'abord il ne pouuoit comprendre qu'on ne se vit point dans vn miroir, ie lui fis entendre que cette Dame n'ayant point de dents dans la bouche, ne s'en pouuoit pas voir dans la glace qu'elle tenoit en sa main, ce qui le satisfit de sa curiosité.

Le Payſan démonté de ſon aſne.

TROIS Filous, dont les apprentiſſages & leſ chefs d'œuvres auoient eſté merueilleux en ſubtilitez, ayant remarqué parmy vne grande foule de peuple qui eſtoit à la Croix du Tiroir, pour voir executer à mort vn Gentil-homme condamné d'auoir la teſte tranchée, vn certain payſan du village de Coulombe monté ſur vn fort bel aſne, qui regardoit avec grande attention tout le miſtere de la Juſtice, ils entreprirent d'auoir l'aſne du pauvre homme, & pour paruenir à leur deſſein, s'eſtans coullez tous trois parmy la preſſe, & eſtans paruenus iuſques auprès du manant, l'vn d'eux appuyé ſur le col de l'aſne lui cachoit la teſte de ſon manteau, pendant qu'vn autre doucement, feignant de s'accoder ſur la croupe, le deſſangla ſubtilement, puis prenant avec ſon troiſieſme compaignon les deux coſtez du baſt de la beſte aſine, leuerent doucement le manant en l'air, ſans qu'il s'en apperçeut en aucune façon que ce fut, ayant toujours l'eſprit bandé à oïr chanter le *Salut*, & conſiderer le pauvre Gentil homme. Pendant vne petite émotion qui arriua au ſujet de quelques Coupeurs de Bourſes, qui pouuoient eſtre
de la

de la cabale des Filous, & iultement lors que le Bourreau tiroit son épée pour donner le coup, le Filou qui cachoit la teste de l'asne, le tirant par sa bride, pendant que l'un des autres le picquoit aux fesses avec vne espingle, il tira la beste d'entre les jambes du paysan qui auoit les yeux sur l'échaffaut, & lui ayant fait faire quatre pas l'amena, pendant que les deux autres soustenoient toujours le manant sur son bast, lequel laissant tomber aussi-tost le coup donné, ce pauvre homme se voyant culbuté à terre, & son asne hors d'entre ses jambes, il demeura tellement esperdu, qu'il ne sçauoit s'il estoit mort ou vif, puis ayant vn peu repris ses sens, demanda à ceux qui estoient autour de lui, s'ils n'auoient point veu sa bourrique, mais il n'en peut apprendre autre chose, sinon qu'un homme vestu de noir l'auoit amené, & par ainsi le paysan fut contraint de s'en retourner à pied en son village, grandement estonné d'une auenture si estrange, & dont il ne peust iamais rendre raison à sa femme, ny à son Curé.

Le Degraisseeur de manteaux:

VN autre Filou qui n'estoit pas moins subtil que les precedens, cherchant oc-

caſion pour faire quelque bon tour de ſon meſtier, & ayant appris que proche la place Maubert vne honneſte femme veſue logeoit des Penſionnaires, ſeroit entré effrontément dans cette maiſon, & n'ayant rencontré dans vne chambre que trois manteaux d'aucuns de ceux qui eſtoient en penſion, il ſ'en faiſit à l'inſtant, & les mit ſous le ſien, & redoualant les degrez plus viſte qu'il ne les auoit monté, lors qu'il penſoit fortir le pas de la porte, vn jeune Aduocat qui eſtoit à la même penſion, reuenant de la ville avec vn manteau doublé de panne, rencontrant le Filou lui demande d'où il venoit, à quoy le coquin reſpond ſans ſ'eſtonner, qu'il alloit degraiſſer des manteaux que des Meſſieurs qui logeoient dans cette maiſon lui venoient de donner ce que le ieune homme approuuant, & regardant le collet & le haut du ſien qui eſtoit gaſté de poudre, dont on ſe ſeruoit fort en ce temps-là, lui demande ſi cela ſeroit bien-toſt fait : A quoy le Filou ayant reſpondu, que dans vne heure il les rapporteroit comme neufs, l'Aduocat à meſme temps lui donne le ſien, & le prie de le nettoyer au pluſtoſt: Tellement que par cette rufe le diſole emporta quatre manteaux au lieu de trois, & eſt encore à leur rapporter :

Et

Et ie vous laisse à iuger ce qui se passa entre tous ces pensionnaires, lors qu'ils virent ainsi leurs manteaux perdus, & leur gaullerie de l'Aduocat, qui auoit perdu le sien par sa propre faute.

Le bon Mestier non permis.

VN voleur, ayant esté apprehendé & condamné à mort; lors qu'on le menoit au supplice, le Docteur qui l'assistoit lui ayant fait plusieurs remonstrances, & entr'autres qu'il eust bien mieux fait d'apprendre quelque bon mestier pour gagner honnestement sa vie, plütoist que de s'amuser à voller & piller comme il auoit fait, au grand déplaisir de ses parens & amis: Ha! Monsieur, dit le Larron, n'auois- ie pas appris vn bon mestier pour deuenir riche en peu de temps, si l'on me l'eust laissé faire, il y en a bien d'autres qui l'exercēt qu'on ne punit pas.

D'un Chirurgien à vn homme à qui on auoit creué vn œil.

VN homme regardant iouir à la paume receut sous la galerie vn si grand coup de balle dans l'œil, que peu s'en fallut qu'il ne le mit hors de la teste, il enuoye tout à l'heure querir vn Chirurgien, qui comme il

le vouloit panser, l'œil lui demeura dans la main: Ce pauvre homme dans la grande douleur qu'il sentoit auoit toutes les apprehensions du monde de deuenir borgne, ce qui l'obligea à dire au Chirurgien, Monsieur, dites moy ie vous prie, mon œil est-il perdu? non, non, Monsieur, répondit le Chirurgien, n'apprehendez rien de ce costé là, il n'a garde d'estre perdu, ie le tiens dans ma main.

Naisueté d'un Enfant.

VNe bonne femme de village voulut enuoyer à confesse vn fils qu'elle auoit âgé de neuf ou dix ans, qui se mit à pleurer, disant n'y vouloir point aller, parce qu'il se souuenoit bien que l'année passée on l'auoit tenu plus d'une heure. Va, va, ce lui dit sa mere, ie m'y en vay deuant toy, & ie luy diray qu'il te depesche. Sa mere va à confesse deuant lui, & ayant fait elle dit au Curé Monsieur, ie m'en vay vous enuoyer vostre petit garçon, ie vous prie de le depescher promptement, ce qu'il lui promit de faire. Estant retournée à la maison, elle dit à son fils, va-t'en à confesse, Monsieur le Curé m'a promis de te depescher; Il s'y en va, & s'estant mis à genoux, le Curé lui demanda s'il scauoit son Confesseur, il dit que non: le Curé lui dit, ie me confesse

confesse à Dieu , dit le Curé , cét enfant croyant que ce fut fait, lui dit , Adieu Monsieur, en se leuant , ma mere ma bien dit que vous ne me tiendriez gueres.

De certains Marguilliers de village.

A Quatre ou cinq lieuës de Paris , il y a vn certain village, dont le Patron de la Parroisse est S. Sebastien , la representation duquel est sur le grand Autel de l'Eglise , mais à cause que durant la guerre les Huguenots auoient abatu les Eglises, & rompu toutes les Images , ce Sainct icy se trouuoit ruiné, sans teste ny sans bras. Ce qui obligea le Curé à représenter aux Parroissiens qu'ils auoient tort de le laisser en cét estat , & que pour peu ils en auroient vn neuf. Ils demurerent donc d'accord, de prendre de l'argent du tresor de l'Eglise, pour en faire vn de bois, qu'on deuoit argenter par dessus. Et avec cét argent les Marguilliers furent deputez pour aller à Paris commander ce Sainct , avec la mesure de la grandeur qu'il le falloit. Ils furent donc chez vn Sculpteur , à qui ils demanderent combien il vouloit auoir pour leur faire vn S. Sebastien. Le Sculpteur leur demanda dequoy ils le vouloient, ils responderent qu'ils le vouloient de bois pour le

faire argenter par apres. Leur demandant de quel bois ils le vouloient, ils respondirent qu'ils le vouloient de bois de chesne. Il voulut sçauoir la grandeur, ils lui monstrent la mesure qu'ils en auoient apportée. Ce n'est pas tout, dit le Sculpteur, le voulez-vous vif ou mort. Leur demandant en quelle posture ils vouloient qu'il le representast, soit encor viuant, ou bien mourant dans le martyre, ou bien desia mort de ses blessures. Les Marguilliers se trouuerent fort estonnez à cette question, à laquelle ils ne pouuoient que répondre, aussi n'auoient-ils eu aucune charge touchant ce point là. Comment, dit l'un d'eux, nous faut-il retourner pour cela; Il le faut bien, dirent les autres, car si nous leur allons porter en vie, & qu'ils le vueillent mort, il n'y a point d'apparence, & aussi peu de le porter en vie s'ils le veulent mort. Ce que voyant vn d'eux, qui se croyoit bien plus habille homme que ses compagnons, leur dit, Vous voilà bien empeschez, faut-il tant consulter là-dessus: Là, là, faites-le en vie, dit-il au Sculpteur, s'ils le veulent mort, n'aurons-nous pas bien le moyen de le tuer apres.

Gages qui courent tousiours.

LE Valet de Chambre d'un Gentil-homme de campagne, qui vouloit quitter son maistre,

maistre, à cause qu'il estoit mal payé de ses gages, & lui ayant fait sa harangue, par laquelle il luy tesmoignoit ouuertement son mécontentement, & le dessein qu'il auoit de sortir de son seruice; le Gentil-homme qui se trouuoit bien du garçon, & qui n'auoit pas enuie de le laisser aller, parce qu'il eust eu de la peine à en trouuer vn autre pour le seruir à meilleur marché, luy dit, qu'il auoit tort de se plaindre, parce que ses gages ne laissoient pas de courir tousiours. Et c'est de quoy ie me plains, dit le Valet de Chambre, car ils courent si fort que ie ne les scaurois attrapper.

D'vn Medecin à son fils.

VN Medecin ayant vn fils vniue malade, qu'il aimoit extremement, le visitoit à toute heure, & ne luy ordonnoit iamais que des bouillons, & de tenir bon regime de viure, sans vser d'aucuns autres medicamens, dont ce fils s'estonnant, lui dit vn iour: Mais mon pere, vous ne m'ordonnez aucune medecine comme vous faites aux autres malades. Je le croy bien, dit-il, mon fils, nostre marchandise est bonne pour la vendre & en tirer de l'argent, mais elle ne vaut rien pour en vser; Ne voyez-vous pas

qu'un Confiturier a la presse pour le débit de ses confitures qu'il vend, & que lui n'en use iamais, nous en sommes tout de même, si elle vous pouuoit seruir ie ne vous l'espar-
gnerois pas.

D'un Predicateur.

VN Cordelier preschant le iour du Sainct François, comme il voulut exagerer le merite de ce glorieux Sainct, ie preferant à tous les autres, comme celui que Dieu auoit tant aimé, qu'il l'a honoré de ses saincts stigmates, faueur qu'il n'a faite à autre qu'à lui: Où le mettrons-nous, dit-il, le bien-heureux Pere Seraphique Sainct François? le mettrons-nous avec les autres Saincts? Il est bien plus en dignité que les autres: le placerons-nous avec les Prophetes? Ah il est encor bien au dessus des Prophetes: le mettrons-nous avec les Patriarches? Ah il est bien encor au dessus des Patriarches: le mettrons-nous avec les Anges? il est encor au dessus des Anges: le mettrons-nous avec les Archanges: il est encor au dessus des Archanges: le mettrons-nous avec les Cherubins? il est encor au dessus des Cherubins: le mettrons-nous avec les Seraphins? il est encor au dessus des Seraphins. Où le placerons-nous.

nous donc ce glorieux Sainct François : le mettrons-nous avec les Vertus? Ah il est encor bien au dessus des Vertus : le mettrons-nous avec les Thrônes? il est encor au dessus des Thrônes: le mettrons-nous avec les Dominations? il est encor au dessus des Dominations: le mettrons-nous avec les Puissances? il est encor au dessus des Puissances. Où le mettrons-nous donc? où le placerons-nous? Vn bon compagnon qui estoit là present, & qui s'ennuyoit fort de ce discours si souuent repeté, se leue & dit tout haut : Si vous ne sçavez où le mettre, mettez le à ma place, car aussi bien ie m'en vay. Ce qui obligea tout le monde à rire, & fit on telle confusion au pauvre Predicateur, qu'il fut contraint de s'en aller sans dire mot.

D'un Biscain.

LEs Biscains, entre les Espagnols, sont estimez estre les plus simples, les plus idiots & les plus grossiers. Vn iour vn d'eux estant venu en vne certaine bourgade de Castille, & ayant veu vn moulin à vent par dedans où cette grande rouë tournoit avec vne vitesse incroyable, sans que personne y touchast, il creut qu'indubitablement il falloit qu'il y eust du miracle, & qu'il estoit im-

possible que sans vne force extraordinaire, cette grande machine peüst aller si viste, veu qu'il n'y auoit point d'hommes pour forts qu'ils fussent capables de l'ébranler, & attribuant ce miracle à vne puissance supérieure, il creut estre obligé de l'adorer, & se prosternant à genoux, & s'estant mis à la baiser tres-deuotement, cette rouë luy emporta toutes les babinés, luy laissant les dents toutes descouuertes. Ce que voyant, il dit tout en colere en sa langue, *Juro a Dios que andas por arte del diablo*; Qui veut dire, le iure Dieu qu'il faut que cela marche par l'inuention du Diable.

D'un Valet.

VN homme rencontrant le valet d'un de ses amis, qui estoit vn bon Payſan, qui ordinairement en Esté vont nus pieds: Il luy dit, mon amy, quand les bas que tu portes seront vſez ie t'en donneray d'autres, entendant parler de ses jambes qu'il auoit nuës. Ce valet qui n'estoit point sot, luy repart sur le champ; le vous remercie de bon cœur, Monsieur, il y a long-temps qu'ils me durent, ils ne font pas près d'vſer, l'estoffe en est si bonne qu'il y a plus de trente ans que j'en porte le haut de chausſe de meſme, & il n'y a encor qu'un trou.

D'un

D'un Borgne.

EN la ville de Roüen il y auoit vn certain droit à prendre sur ceux qui veulent tenir cabaret, qu'on nomme droit d'enseigne; car pour mettre vne enseigne il faut donner vn escu, ou quatre francs, & de ce droit vn borgne estoit Partisan: Vn homme voulant tenir cabaret, ne pût iamais obtenir de ce borgne permission de mettre vne enseigne qu'il ne luy donnast vne pistole, parce qu'ils auoient autrefois eu querelle ensemble; de sorte que pour en passer son enuie il fut contraint de donner à ce Borgne la pistole qu'il lui demandoit, avec resolution pourtant de l'en faire repentir: Si tost qu'il eut permission de leuer vne enseigne, il y fit peindre vn borgne à qui vn homme presentoit vne pistole, & fit écrire dessous, *Au borgne qui prend.* Ceux qui voyoient cette seigne, & qui sçauoient l'histoire en rioient à bon escient, tant que cela vint aux oreilles du Borgne, qui s'en sentant extremement scandalisé, en coucha sa plainte en iustice. Le Tauernier fut assigné en plainte deuant le Iuge, qui respondit sur l'interrogatoire qu'on lui fit, qu'il étoit vray qu'il l'auoit fait mettre exprez en derision du Borgne, qui

auoit exigé deux fois plus de luy qu'il ne luy falloit pour faire appofer son enseigne : qui apres serment pris de luy , auoüa qu'il estoit vray, & offrit à luy restituer le surplus; ce qui fut ordonné au Borgne, & au Tauer-
nier de reformer son enseigne: mais toute la reforme qu'il fit ne consista qu'à oster vn P, de l'escriture, y laissant la peinture entiere, de sorte qu'on lisoit, *Au Borgne qui rend*: Et en effet, dans la posture que ce Borgne faisoit en prenant la pistole de l'autre, on ne sçauoit discerner s'il la prenoit ou s'il la rendoit: & par ce moyen soustenoit auoir satisfait à l'Arrest. Ce qui fut iugé, sans auoir esgard à la seconde plainte du Borgne.

D'un Soldat.

EN vne certaine Garnison, dans vne ville frontiere, où les soldats estoient fort mal payez, ce qui n'est pas bien difficile de trouuer, où l'on attend les Commissaires quelques fois six mois auant qu'ils viennent, où les monstres sont quasi aussi rares que les eclypses; Comme on demandoit à vn soldat quelle heure il estoit, ie n'ay garde de vous le dire, dit-il, car il y a plus de six moix que ie n'ay veu de monstre

D'un Cuisinier à son Maistre.

VN Gentil homme auoit vn Cuisinier, qui apres l'auoir seruy quelques an-

nées, ne se pouuant accommoder avec luy, fut contraint de chercher maître ailleurs, où il fit mieux ses affaires: car en peu de temps il se mit en fort bonne conche avec vn bel habit verd, & fut voir en cét estat son premier maistre, qui le voyant si bien vestu, luy dit, comment, mon amy, te voila bien verd? C'est, dit il, Monsieur, que ie sème en bonne terre.

D'un Peintre à vn Cavalier.

VN Cavalier commanda à vn Peintre de luy peindre ses armes, pour donner à vn Tapissier, pour les faire mettre en broderie sur des couuertures de mulet: le Peintre luy demanda quelles estoient ses armes: il dit qu'il vouloit vn chasteau d'or en champ de gueules, & que dedans il vouloit qu'il y eust vn chien qui abayast, & à la porte vn homme d'argent, tenant à sa main vne espée de même. Le Peintre se charge de faire ses armoiries, moyennant vne somme d'argent, dont ils demeurèrent d'accord. De là à quelques iours le Peintre luy apporte ses armoiries, il trouua le chasteau fort bien fait, & l'homme aussi en fort bonne posture avec son espée à la main, mais n'ayant point de chien abayant.

il lui demanda d'où venoit qu'il n'entendoit point ce chien abayer : le Peintre voyant la simplicité du Cavalier, lui repartit : Ah, Monsieur, il est à present l'heure de dîner, & sans doute il est à la cuisine, qui s'amusera à ronger quelque os. Ce que le Cavalier prit pour argent comptant.

D'un à qui on auoit donné vn coup d'Espée au trauers du visage.

VN certain homme ayant querelle contre quelqu'un de la mesme ville, ils le quitterent la nuict, & lui donnerent vn grand coup d'espée tout au trauers du visage, il reuint tout sanglant en la maison, on enuoye querir par tout des Chirurgiens pour le panser, qui luy banderent sa playe, qui luy couuroit tout le visage : comme vn de ses amis le vint voir vn iour, le voyant si defiguré, il lui dit, ces gens là qui vous ont ainsi accommodé n'auoient pas dessein de vous nourrir, mais encor ce n'eust esté que demy mal s'ils ne vous eussent frappé que par vn bras, ou par vne iambe, sans vous auoir ainsi donné au trauers du visage, pour le moins la playe ayant esté cachée, elle n'eust pas paru comme elle fait. A quoy le blessé repartit, à quoy bon ces discours, ver-
tu non

tu non pas de ma vie , ne sçavez vous pas
que celuy à qu'on donne ne choisit point.

D'un Page à son Escuyer.

VN Page d'un grand Seigneur ayant fait
quelque friponnerie, son Maître com-
manda à son Escuyer de luy donner le fouët,
l'ayant emmené dans sa chambre , & luy
voulant faire mettre pourpoint bas : le Pa-
ge qui estoit desia grand, n'en voulut rien
faire , de sorte que s'estant rebellé contre
son Escuyer , qui seul n'en pouuant venir à
bout, se fit assister de quelques palefreniers ,
qui le prennent & le despoüillent, de sorte
qu'ils le mirent tout nud, & durant qu'ils le
tenoyent, l'Escuyer animé qu'il estoit de la
grande resistance qu'il luy auoit faite se ruë
si viuement sur luy à coups de fouët qu'il le
mit tout en sang , quelque cris & quelques
prieres que le Page fit pour l'émouuoir à pi-
tié , & après estre plustost lassé que saoul , il
le laisse là, luy disant qu'il s'habillast prom-
ptement : le Page extrêmement animé d'a-
uoir esté traitté si rudement, luy dit tout en
colere, vous auez tort, Monsieur, de me dire
que ie m'habille, prenez vous-même mes
habits, puis que de droit ils appartiennent
au bourreau.

*D'un Medecin & d'une ieune Fille
malade.*

VNe ieune fille estant tombée malade, ses parens, qui en estoient idolatres, pour n'auoir que cette fille, qui estoit fort belle, & en l'âge de dix-sept ou dix-huict ans, enuoyerent querir le Medecin, qui la venant visiter, la premiere chose qu'il fit fut de luy demander son bras pour taster son pouls, pour voir si elle n'auoit point de fièvre: cette fille se voyant en compagnie, faisant la succrée, ne vouloit point presenter son bras nud à vn homme pour le manier, mais ses parens l'ayant admonestée à cela, luy disant qu'il n'y auoit point de danger, à force de prieres elle tire son bras du liect, & le presente au Medecin, couuert de sa chemise, le Medecin n'ayant sceu gagner sur elle qu'elle luy presentast à nud, se mit en colere, & se leuant d'auprès d'elle s'en alla, disant, à malade de roille, il faut vn Medecin de drap.

D'un Docteur au Roy d'Espagne.

EN vne grande assemblée en Espagne, où il falloit que tous les Estats comparussent, les Docteurs voulurent precéder les Cualiers.

Cavaliers, se fondans sur cette sentence, *Cedant arma toga*, que les armes cedent à la robe, mais les Cavaliers ne voulurent ceder en façon quelconque aux Docteurs: surquoy il y eut entr'eux vne grande dispute, qui ne se pouvant terminer par autre moyen, il fallut que le Roy decidast ce different, ce qu'il fit en faueur des Cheualiers, ordonnant qu'en tous lieux ils precederoient les Docteurs. Ce dont vn d'eux se pleignant en bonne compagnie, il dit à ceux qui soustenoient le party de la Noblesse, & par consequent le iugement du Roy. Vous ne sçavez ce que vous dites, Messieurs, il n'y a nulle comparaison des Cavaliers aux Docteurs: car le Roy en vn iour peut faire mille Cavaliers: mais en dix ans il ne sçauroit faire vn Docteur.

Brocard contre vn Medecin.

VN Laboureur ayant vn fils vnique, & luy voulant faire apprendre quelque mestier pour avec le temps le pousser dans la ville, le mit chez vn de ses amis Boucher, qui alloit en tous les marchez vendre de la viande. Comme il eust esté quelque temps avec luy, & qu'il commençoit à deuenir grand, & qu'il sçauoit plus que mediocrement ce qu'il falloit sçauoir de ce me-

stier pour le village, son pere le voulut mettre chez vn Maistre boucher de la ville : & comme il recherchoit celui qui auoit le plus de pratique, où la tuerie estoit plus grande, & où il pouuoit apprendre & profiter d'auantage en son mestier, il s'en conseilla à vn des bourgeois de la ville, qui estoit fort son ami, qui luy dit : le vous conseille de le mettre chez le Medecin vn tel, il n'y en a pas vn en toute la ville qui en tuë tant que luy.

D'un Abbé à vn Cardinal.

VN Cardinal faisoit vne tres grande despenſe, & mangeoit deux fois plus qu'il n'auoit de reuenue, de sorte qu'il estoit endebté avec tout le monde, & son bien arresté de tous costez. Il y auoit vn certain Abbé qui le venoit voir fort souuent : & quoy qu'il fut fort accommodé, il mangeoit la pluspart du temps à la table du Cardinal, parce qu'il faisoit tres bon ordinaire, & quoy que cét Abbé ne mangeast iamais chez luy, & qu'il donnast meſme à ses gens leur argent à despenſer pour ne tenir point d'ordinaire : il ne laissoit pas d'auoir vn Maistre d'Hostel, & vn train fort leste & fort bien entretenu ; De quoy venant à discourir vn iour à la table du Cardinal, il luy dit, N'estes vous pas bien
fol.

fol de faire la despense de nourrir & payer vn Maistre d'Hostel, & vous ne tenez point d'ordinaire chez vous? A quoy l'Abbé respondit, veritablement, Monseigneur, vous auez raison, vostre Tresorier & mon Maistre d'Hostel sont extremement superflus, & comme fainéants, on les deuroit bannir du pays.

Rodomontade d'un Gascon.

Comme chacun sçait que les Gascons pour la pluspart son fanfarons: Vn Cavalier François estant en discours sur pareille matiere en compagnie où se trouua vn Gentil homme Gascon, il ne peut nier cette verité: mais aussi faut-il que ie vous confesse, dit-il, que tous les Gascons plus qu'aucune autre nation, ont bonne grace à faire vne rodomontade, & que les autres n'y entendent rien au prix d'eux. Vne Demoiselle qui estoit là presente, luy dit, pour obliger donc la compagnie, Monsieur, luy dit-elle, ie vous prie de nous en faire vne, puisque vous y reussirez mieux que pas vn. Ah, respondit-il, Mademoiselle, ie vous estime trop, & toute la compagnie, car il est certain que si ie faisois vne rodomontade, ie vous ferois tous mourir de peur, & i'ay trop d'affection pour vostre service.

Autre sur le mesme sujet.

VN certain Cavalier Gascon, nommé le sieur de la Terrade discourant de son extraction, & de ses moyens, exagérant les superbes bastimens & ses grands reuenus de la terre de la Terrade, se plaignoit que ses coquins de valets en vn an luy auoient vendu pour plus de mil escus, de bois mort dans la forest : Considerez ce que pouuoit valoir le reuenue du bois verd : apres qu'il fut party, vn de la compagnie qui le connoissoit, & qui auoit esté chez luy, dit, Voyez vous ce que ce fanfaron vient de dire : ie proteste que i'ay esté chez luy, & que i'ay veu cette terre de la Terrade dont il fait tant d'exagerations, & il n'est rien de plus vray qu'un escargot des plus gros, pourroit faire le tour de cette terre en moins de demy quart d'heure de temps marchant au petit pas : il faut, si ce qu'il dit est vray, que le bois y soit vendu beaucoup plus qu'au poids de l'or.

D'un Seigneur Gascon.

VN Seigneur Gascon de tres-haute condition, qui auoit vn fort beau Chasteau en ce pays-là, basti sur vne fort belle terre d'un tres-grand reuenue, de laquelle dépendent

doient grande quantité de Fiefs nobles, y estant vn iour, comme il y faisoit la plus-part du temps sa demeure ordinaire, deux Conseillers du Parlement de Bordeaux qui releuoient de lui, l'y vindrent trouuer pour lui rendre la foy & hommage qu'ils lui deuoient à cause de la redeuance de leurs Fiefs, qui estoient obligez de lui venir rendre la foy & hommage dans son Chasteau vn genouil en terre. Cē Seigneur extrêmement ialous de son autorité, ayant esté aduertý de leur arriué, les fit entrer, & en arriuant lui dirent, Monseigneur, nous sommes venus icy pour rendre à vostre grandeur les hommages que nous lui deuons pour telles terres & telles que nous tenons qui releuent d'elle. Vous soyez les bien-venus, Messieurs, leur répondit-il, à chacun le sien n'est pas trop. Qu'on appelle mon Secretaire. Ce Secretaire estant venu; Voyez, lui dit-il, à quoy ces Messieurs sont obligez. Ayant feuilleté le papier terrier, & trouué les noms de leurs Fiefs, il leut tout haut comme ils estoient obligez de venir rendre foy & hommage audit Seigneur en son Chasteau vn genouil en terre. Et bien, Messieurs, ce leur dit-il, ie suis prest de receuoir vos soubmissions. Aussi-tost deux lacquais qui les suiuoient,

Leur ayant fait signe, apportèrent chacun vn carreau de velours dont ils s'estoient munis, sur lesquels les Maistres s'estans mis chacun vn genouïl, comme ils commencerent à faire leur harangue, ce Seigneur les interrompit, disant; Attendez vn peu, Messieurs: Secretaire, lisez encor vne fois à quoy ces Messieurs sont obligez. Il reprend le papier terrier, leur tout haut comme ils estoient obligez à venir rendre foy & hommage à Monseigneur dans son Chasteau, la teste nuë, & vn genouïl en terre. Est-il parlé là-dedans, dit ce Seigneur, de carreaux de velours? Non. Monseigneur, dit le Secretaire. Ostez ces carreaux de velours, Messieurs, dit ce Seigneur, ie ne veux que ce qui m'appartient.

D'un Capitaine Espagnol.

VN Capitaine Espagnol estant à l'armée au siege d'une ville, entendant sonner l'alarme en son quartier, se leue en sursaut, & ceux qui le voyoient armer, virent qu'il trembloit comme la feuille: Ce que ceux qui estoient presens, comme il y auoit de l'apparence, l'interpretant à poltronnerie ou lascheté de cœur, ils lui dirent: Comment, Monsieur, vous tremblez à ce qui se voit?
Que

Que veut dire cela, nous auions tout autre opinion de vostre courage. C'est la grandeur de mon courage, respondit-il, que ma chair tremble, car comme elle est ordinairement fragile & timide, elle tremble de peur pour le danger où elle preuoit bien que mon courage la portera tantost.

D'un autre fanfaron Espagnol.

VN Espagnol extremement fanfaron, mais en effect le plus lasche homme qui fut iamais, discourant avec son valet de sa generosité, & des hauts faits d'armes qu'il auoit autresfois executez en plusieurs endroits, non seulement de l'Europe, mais de l'Asie, Afrique, & Amerique, où sa valeur s'estoit renduë redoutable par tout. Son valet qui connoissoit sa poltronnerie, & qui se mocquoit ordinairement de lui, lui dit, veritablement vous dites vray, Monsieur, car en quelque lieu que ie passe par les ruës, i'entends dire par les tauernes & les bordels, que vous estes le plus vaillant homme de l'Europe, mais depuis que ie suis avec vous ie suis si mal-heureux que ie n'ay point esté tesmoin d'aucun de ces genereux exploits que le monde exagere si haut. Tu dis vray, mais c'est que ma valeur est tellement con-

nuë par tout, que tout le monde la redoute ,
& personne n'oseroit m'attaquer , te iurant
bien que depuis que ie me connois, ie ne sça-
che point auoir esté tant de temps sans don-
ner à boire à mon espée que depuis que tu
es avec moy. Que veut dire, répondit ce va-
let, donner à boire aux espées? les épées boi-
uent elles? On connoist bien par ces deman-
des que tu me fais, lui repliqua son Maistre,
que tu es peu expert aux affaires de la guer-
re, le breuuage des espées n'est autre chose
que le sang de ceux qu'avec elles on tue
dans le combat. Ah! dit ce valet, i'aduouë que
ie suis vn ignorant , mais puis qu'elles boi-
uent, il faut bien qu'elles mangent , car tant
boire sans manger leur pourroit faire mal.
Ah, répondit le maistre, la miennë ne se re-
paist que des cœurs des Capitaines , les au-
tres de moindre condition mangent les
iambes, les bras, & les testes de ceux qu'elles
abbatent en combattant. Il est vray, dit le va-
let, qu'avec vn Maistre extremement sçauant
& expérimenté , vn ignorant comme moy
apprend de belles choses : certainement
quoy que ie n'aye pas le cœur martial , que
ie me plais fort à ouyr ces belles histoires ,
comme il alla, il tua, il frappa, il meurtrit , il
tailla , il reduit en poussiere , il trancha la
teste,

teste, il coupa les iambes, & pourfendit la teste d'un autre iusques aux dents; mais ie ne me plais pas beaucoup à me trouuer en telles rencontres, parce que tel homme fera vaillant à faire & vn autre à ouyr les fais d'autrui. Pour moy, quand ie voy reluyre vne espée ie tremble plus d'une heure apres, aduoüant que ie suis le plus grand poltron qu'il y ait au monde. Tay-toy maraud, luy dit son Maistre en colere, ne prononce iamais ce mot de poltron dans mon logis, car c'est le profaner entierement. Mais puis-que tu connoissois ce deffaut en toy, d'où vient que tu ose venir habiter avec la terreur du monde comme moy. Parce, Monsieur, respondit-il, que quelque offence que ie puisse faire, à qui que ce soit, il n'y a ame viuante qui m'ose regarder au visage. Tu es adroit mon amy, respondit son Maistre, & veritablement ta pensée est fort excellente, &c.

Autre sur le mesme sujet.

VN fanfaron Espagnol pareil à celui dont nous venons de parler cy-dessus, exagerant avec vn valet qu'il auoit, les exploits qu'il auoit autrefois fait, ne laissant pas vn seul endroit de la terre habitable où

il n'eust amplement signalé sa valeur. Son valet se moquant de lui, qui connoissoit à quel point estoit sa poltronnerie, lui dit, mais, Monsieur, il me semble avoir autresfois ouy dire qu'on vous auoit banny de France? Il est vray, respondit-il, car le Roy sçachant quels hauts exploits i'auois fait en tous les lieux où ie m'estois rencontré, & le nombre infiny de mes conquestes, ayant peur que ie ne m'emparasse de la meilleure de ses Prouinces, ou pour mieux dire de la pluspart de ses Estats; me commanda de sortir de son Royaume, point pour autre chose que pour l'enuie qu'il portoit à ma valeur: mais tu ne sçais pas comme ie m'en suis bien vangé depuis; Et comment, Monsieur, lui dit son valet? C'est chose qu'il ne faut pas publier, car tu sçais que les personnes des Roys sont sacrées, mais moy qui m'estime autant qu'eux, parce qu'encore que ie ne sois point né Prince, mon bras me peut fournir des Royaumes quand il me plaira. Je ne te celleray pourtant point cette genereuse action, quoy que personne iusques à present n'en sçache rien. As tu pas ouy dire qu'un Roy de France auoit autresfois esté tué par un Cavalier inconnu, qui armé de toutes pieces auoit couru quelques coups de lances

lances avec lui? Ouy Monsieur, lui dit ce valet, i'en ay bien ouy parler, mais ie pensois qu'il y eut long temps que cela fut arriué; Non, non, mon amy, il n'y a pas si long-temps que tu penses; qui crois-tu qui estoit ce Cavalier-là par ta foy? moy Monsieur, respondit ce valet, ie n'en sçay rien, aussi ne m'en suis ie iamais informé, & puis que vous dites que personne n'en sçay rien, qui est ce qui m'eust pû esclaircir de ce doute. Tu as raison, respondit ce fanfaron: Mais ce nous deux, ce fut moy pour te dire la verité, qui le fis exorez pour me vanger de lui: Mais mot; j'ay fait quantité d'autres actions genereuses, dont par modestie ie n'ay pas voulu que le tiers en entendit parler.

Rodomontades Espagnoles.

IL faut aduoüer que les Espagnols encherissent encores par dessus les Gascons, c'est pourquoy ie ne les separe point les vns des autres: ie ne pretens pas aussi m'estendre beaucoup sur cette matiere, veu qu'il y a vn Liure imprimé, auquel ie remets le Lecteur qui sera curieux d'en voir dauantage sur ce sujet; i'en diray seulement ce mot en passant, que tu ne trouueras pas imprimé. Vn Espagnol voulant tesmoigner quel carnage il

pretendoit faire de les ennemis en vne sanglante bataille qui se deuoit donner le lendemain, dit : le veux que le nombre de ceux que ie pretends tuer de ma main soit si grand, qu'au lieu de cette spacieuse valée, on voye vne haute montagne de corps morts, que le Soleil le lendemain au matin, voyant vne montagne au lieu où il auoit accoustumé de voir vne plaine croira s'estre esgaré de son chemin. le veux que les fleurs de ces prez flottent dans les ruisseaux de sang humain ; & que ces herbes que ie foule aux pieds, se rejouyssent seules de cette misere commune, puis que ie leur donneray lieu de contester de couleur avec les œilllets, puis-que en despit de l'Aurore, qui à force de pleurs les fait naistre vertes, ie veux qu'elles meurent rouges.

Vn autre voulant menacer son ennemy qui faisoit mine de se vouloir battre contre lui. Sors, lui dit-il, mal-heureux, si tu as assez de cœur pour paroistre deuant moy ; ie te veux reduire en tant de morceaux, que le grand estant ietté au vent, donnera moins d'ombre au Soleil que le plus petit de ses atomes.

D'un

*D'un Normand qui faisoit dire un Service
pour son Pere, qui auoit esté
pendu.*

VN Normand s'estant trouué à Bour-
deaux, comme il vouloit desniaiser vn
certain Gascon, le Gascon se trouua plus fin
que luy, car il le surprint la main dans sa
poche, & il est à croire que ce n'estoit pas
pour luy emprunter son chappellet. On se
faisit du Normand, & le mena t'on prison-
nier, l'ayant fait dépouiller, & l'ayant trou-
ué marqué sur l'espaule des armes du Roy:
il fut condamné à estre pendu & estranglé.
Il auoit vn fils en Normandie, qui ayant
esté aduertý de la disgrace arriüée à son pe-
re, il en porta le deuil, sans publier la cause
de sa mort, il en feignit vne plus honorable;
& meu de pitié. luy fit faire vn Service en
son village, où il assista vestu de deuil, avec
vn feint tombeau couuert de drap noir.
Comme le Service fut acheué, le Curé (com-
me c'est la coustume) prenant le benestier
pour ietter de l'eau beniste sur le tombeau:
le fils qui l'assistoit en cette ceremonie, prit
le bras du Curé, & le leuant en haut, luy dit,
plus haut, Monsieur, ie vous prie, le Curé
ne sçachant ce qu'il vouloit dire, il s'expli-

qua, disant, que son pere estoit mort en l'air, & que partant il falloit que l'eau benist al-
last plus haut.

*De la harangue qu'un Escheuin de Ville
fit au Roy à son entrée.*

LE Roy faisant vn iour son entree dans
vne des capitales villes de son Royau-
me ; vn Escheuin estimé vn des plus habiles
habitans , fut deputé pour luy faire vne ha-
rangue. Il se prepara toute la nuict, & com-
me il n'auoit iamais paru deuant vn si grand
personnage, pour habile homme qu'il estoit,
il demeura tout interdit , & ne laissa point
d'assez bien debuter, & de dire de fort bon-
nes choses. Comme il fut au milieu de son
discours , vn asne qui estoit en quelque es-
quirie assez proche de là, commença à brai-
re si fort, que le Roy se trouuant par ce bruit
interrompu d'ouyr cette harangue , qui ne
luy déplaisoit point, dit tout haut , qu'on
fasse taire cet asne. Le pauvre Escheuin
estoit si attentif à son discours, qu'il n'auoit
point ouy , ou n'auoit point pensé à la voix
de l'asne , de façon qu'il creut que le Roy
vouloit parler de luy , & qu'il commandoit
qu'on le fist taire. Ce qui le fit demeurer tout
court, disant , ah, Sire, ie me doutois bien
que

que ie n'estois pas capable de haranguer deuant vostre Majesté. Aussi n'en voulois- ie rien faire ; mais ces Messieurs icy m'y ont forcé. Le Roy se print à rire de cet equivoque , ce qui desorienta encor davantage le pauvre Escheuin, & pour tout ce que le Roy luy peust dire pour l'obliger à acheuer sa harangue , luy attestant qu'il parloit fort bien, iamais il n'en voulut rien faire; mais se coulant parmy la presse il s'euada , & s'en retourna au logis, où l'on ne le peust iamais consoler.

Autre sur le mesme sujet.

LE Roy voulant faire son entrée en l'une des villes capitales de son Royaume , il luy fallut passer par vne ville où l'on luy dit, qu'il y auoit vn homme deputé pour le haranguer. Ce Prince qui auoit l'esprit fort bon , & qui ne se plaisoit point à ouyr des sottises, ne croyant pas que dans vne petite bicoque , comme estoit celle-là , il y eust personne qui fut capable de dire quelque chose qui luy peust plaire, dit qu'il ne vouloit point entendre de harangue. Vn des grands qui l'accompagnoyent, luy dit, Sire, vous desespererez ce pauvre peuple, qui s'imaginera que c'est par mespris , & vous con-

traîndrez ce harangueur à rengainer son compliment, qui croira auoir receu le plus grand affront du monde : le Roy qui estoit bon & qui ne vouloit point faire confusion à personne, dit, bien donc qu'il parle ; mais qu'il ne die gueres de choses, car les longs discours m'ennuyent. On ne manqua pas à luy dire qu'il fut fort court, qui fut vn commandement qu'il obserua fort religieusement. Si tost qu'il fut deuant le Roy, en presence de tant de monde, où il ne s'estoit iamais veu, il ne sceust dire autre chose que Sire, tant il se trouua surpris. Il repete par trois fois cette parole, sans pouuoir dire autre chose. Ce que voyant le Roy, il luy dit, est-ce tout ce que vous auez enuie de dire ? Ah, Sire, respondit-il, vostre Majesté m'estonne. Bon, luy dit le Roy, voila la meilleure harangue que vous eussiez sceu faire à mon gré. Je vous en remercie.

Autre sur le meisme sujet.

LE Roy venant vn iour pour faire son Lentrée en vne ville, & estant obligé de passer par vne petite ville où on luy preparoit vne harangue, estant pressé d'entrer, parce qu'il auoit appetit, & que son dîné estoit

estoit préparé dans l'Hostel de ville, il n'auoit pas beaucoup d'enuie d'entendre cette harangue : Mais s'y estant laissé porter par les Seigneurs qui l'accompagnoient, celui qui deuoit haranguer, l'attendant à la porte de la ville, il luy dit d'abord, Sire, Alexandre le Grand, si tost qu'il eust dit ce mot, il fut si interdit, qu'il ne peust dire autre chose, que repeter ce qu'il venoit de dire. Disant derechef, Sire, Alexandre le Grand, & demouroit là. Il repeta pour la troisieme fois, & le Roy voyant qu'il ne pouuoit dire autre chose, luy dit : Ouy-dea, mon amy, Alexandre le Grand auoit disné, & moy non, remettons ce discours à vn autre fois, & là dessus passa outre, laissant mon pauvre harangueur tout honteux & confus, qui ne peust se plaindre que de son manque de memoire : car pour sa harangue, il soustint à tous ses Confreres, qu'elle estoit parfaitement bien faite : ce qu'ils creurent fermement, puis qu'il le disoit luy mesme.

D'un menteur qui fut attrapé en son mensonge.

VN certain homme se vantant qu'il auoit extremement voyagé, & qu'il y auoit

quantité d'années qu'il auoit esté hors de son pays, en discourant deuant quelques ignorans qui n'ont pas l'esprit de concilier les choses, chacun l'admiroit, leur disant qu'il auoit demeuré tant d'années en Espagne, tant en Italie, tant en Allemagne, tant en Turquie, tât aux Indes Orientales qu'Occidentales, ceux qui l'auoient ouy en ayant fait recit deuant d'autres personnes plus sensées, ils vinrent à examiner l'âge qu'il auoit quand il partit du pays, & celui qu'il pouuoit auoir pour lors, qui ne pouuoit pas passer quarante-deux ou quarante-trois ans, il auoit plus de dix-huict ans quand il commença à voyager, & partant il ne pouuoit auoir du tout mis que vingt-quatre ou ving-cinq ans, & neantmoins ceux qui en discouroient, soustenoient lui auoir ouy dire que le temps qu'il disoit montoit à plus de deux fois autant. Ils concerterent deux ou trois de le voir & de le faire discourir de ses voyages, & de se munir de pois dans vne de leur poches chacun, pour marquer avec eux le nombre des années qu'il leur diroit: l'ayant donc mis sur ce discours, il leur dit qu'il auoit demeuré sept ans en Espagne, ils prirent chacun sept pois d'une poche qu'ils mirent dans l'autre poche, apres il dit qu'il

auoit

auoit demeure cinq ans en Italie, ils reprindrent encor cinq pois. Le temps qu'il auoit demeuré en Turquie, aux Indes Orientales, & aux Occidentales, & en Orient; le temps qu'il auoit aussi mis à aller d'un pays à l'autre. Ils lui demanderent quel âge il auoit quand il commença à voyager, il leur dit, qu'au sortir de ses estudes, il estoit sorty du pays, & qu'il n'y estoit pas reuenu depuis, il estudioit encor à dix huiet ans, & partant ils mirent dix-huiet pois dans la mesme poche, sçachant qu'il y auoit quatre ou cinq ans qu'il estoit de retour, ils en mirent encor autant, & apres vn d'eux lui va dire, quel âge, pouuez vous auoir à present, Monsieur? Luy sans cōcilier ce qu'il auoit dit, dit qu'il pouoit auoir enuiron quarante-cinq ans. ils tirent tous les pois de leurs poches, & trouuerent, que si ce qu'il disoit fut vray, il falloit qu'il eust plus de six vingts ans, & tous trouuerent le nombre de leurs pois égaux; quelqu'un d'eux lui demanda pour se mocquer de lui s'il n'auoit point passé par la ville de Cosmographie, il dit que non, mais qu'il auoit passé auprès, & l'auoit laissé à main gauche.

Response d'un Homme que l'on appelloit.

Veau.

IL y a quelque temps qu'au lieu de petits colets qu'on porte à présent, on portoit des frezes, & n'y a pas mesme long temps que la mode en est passée. Vn homme du vieux temps, estoit tellement fait à porter des frezes qu'il ne se pouuoit accoustumer à porter vn colet, & quoy que tous les amis l'en importunassent, & sa femme mesme, c'estoit chose à quoy il ne se pouuoit resoudre. Il estoit homme d'esprit pourtant, & qui ne souffroit pas volontiers vne raillerie. Vn certain ieune estourdy le rencontrant par les ruës, le voyant avec sa freze, pour se moquer de lui, lui dit : Approchez, approchez freze de veau. Mon homme qui auoit sa repartie prompte; lui respondit sur le champ. Nous auons partagé le veau ensemble, Monsieur, la freze est demeurée en mon lot, & vous en auez la teste.

D'un Payfan qui confondoit la doctrine des plus sçauans.

VN certain Roy, ie ne sçay pas de quel pays il estoit, se promenant par la campagne en habit déguisé, parce qu'il ne vou-
loit

loit estre reconnu de personne, rencontra vn payſan qui fouiſſoit la terre, qui bien qu'il n'eust que cinquante ans ou enuiron, ne laiſſoit pas d'auoir les cheveux & tous blancs, & qui trauailloit la teſte nue. Le Roy le voyant en cét eſtat lui dit, Dieu vous gard l'homme de la terre, & vous auſſi, reſpondit-il au Roy, Maistre de la terre. Pourquoi m'appelle tu ainſi, lui dit le Roy, me connois-tu bien? Non, lui dit le payſan (quoy qu'il le connut bien: ce qu'il ne uouloit pas teſmoigner, voyant qu'il ſe uouloit cacher de lui) mais ie vous appelle ainſi, puis que Dieu ayant crée la terre pour l'viage de l'homme, il en doit estre le maistre. Il a bien neigé ſur la montagne, lui dit le Roy, lui voyant ſes cheveux tous blancs: le temps le veut ainſi, reſpondit le payſan: le Roy connoiſſant par ces reparties equiuoques qu'il eſtoit homme d'eſprit, lui dit, vous trauaillez beaucoup, & vous eſtes deſia bien âgé; il y en a, reſpondit le payſan, de bien plus âgé que moy qu'il faut que ie nourriſſe, & que ie trauaille auſſi pour gagner ma vie. Combien gagnez-vous par iour, lui demanda le Roy? le gagne, reſpondit-il, huit ſols tous les iours. Cela eſt il ſuffiſant pour te nourrir, lui dit le Roy, il faut bien que l'en ſaſſe.

tre chose, respondit-il : car c'est bien la moindre dépense que ie fasse de ma nourriture : Mais encor, en quoy les despenses-tu, luy dit le Roy? i'en despense seulement tous les iours deux pour la nourriture de moy & de ma femme, respondit-il, ie paye mes debtes de deux autres que ie baille tous les iours, i'en preste tous les iours deux autres, & les deux autres ie les iette. Comment cela se fait-il, luy dit le Roy : ainsi respondit-il, i'en dépense deux pour la nourriture de ma femme & de moy, & pour si peu d'argent nous ne pouuons pas faire grand chere, comme vous iugez bien. Les deux autres i'en paye mes debtes, c'est que i'ay encor mon pere & ma mere, qui sont si vieux qu'ils ne peuuent trauailler, & comme ils m'ont nourri estant ieune, ie les nourri en leur vieillesse, & par ce moyen ie leur paye ce que ie leur dois. Les deux autres que ie preste, sont pour la nourriture de mes enfans qui sont encor si ieunes qu'ils ne peuuent encor trauailler, car ie me suis marié, estant desia bien auant sur l'âge, & cela estant, ie leur preste, esperant qu'ils me le rendront quand ils pourront trauailler, & qu'accablé d'ans ie ne pourray plus rien faire, ainsi que ie le rends à ceux qui m'ont nourri durant

ma

ma ieunesse ; & les deux que ie iette , sont pour la nourriture de deux filles de ma femme que i'ai eipoufée en secondes nopces, car ie n'efpere iamais qu'elles me le rendent, vëu qu'elles ne me font de rien, & quand bien elles en auroient la voloutré, elles feront eñans grandes, mariées à des hommes qui les empêcheroient , & ie me fuis par mariage faifant avec leur mere, oblige a certe nourriture, le Roy prit grand plaifir à l'entretien de ce Payfan , & ne creut pas qu'en toute la Cour, il y eust perfonne, non pas mefmes les plus Doctes. qui peuffent fi bien raifonner : ce fut pourquoy il lui dit, mon ami, i'ai pris plaifir a ton discours : mais si tu le gais fves peines, ie te defens de dire à qui que ce foit, ce que tu m'as dit aujourd'huy, que ce ne foit qu'en ma prefence, regarde ce vilage là, lui dit-il, lui montrant le fien, & si tu ne le vois devant toy, n'ouvre iamais la bouche à perfonne pour dire ce que tu me viens de dire. Ce qu'il lui promit. Le Roy avec certe affeurance s'en retourna à la ville, où eftant arrivé, il fit afsembler tous les Docteurs de la Cour, auxquels il dit, qu'il auoit le iour d'auparauant fait rencontre d'un payfan , qui eftoit capable de les confondre tous. Il leur conta les paroles que le

d'en parler : ils s'informerent s'il n'auoit pas tenu au Roy tels & tels discours? il dit qu'oui ils le prierent de leur en dōner l'explication : ce qu'il refusa de faire. Ils lui firent mille promesses de lui dōner force biens, à quoi il ne se voulut point fier. Ce que voyans, ils s'en retournerēt à la ville en résolution de lui apporter tant d'or & d'argent, qu'indubitablement ils le suborneroient, ce qu'ils firent, lui apportant de grandes pieces d'or de la monnoye du Prince, que ce payfan les voyant en son pouuoir, ne fit aucune difficulté de leur dire ce qu'il auoit dit au Roy, ils s'en retournerent le trouuer extremement ioyeux, & lui expliquerent le discours qui leur auoit demandé : le Roy en fut estonné, & se douta bien qu'il falloit qu'ils eussent consulté le payfan, contre lequel il se mit extremement en colere, veu l'estroite deffence qu'il lui en auoit faite d'en parler à qui que ce fut : Ce qui l'obligea à l'aller trouuer seul, comme il auoit fait auparauant : si tost qu'il le vit, il lui dit, hé bien mon amy! pourquoy ne m'as-tu pas tenu la parole que tu m'auois dōnée : moy, Monsieur, respondit-il, ie vous l'ay tenuë. Ayant obey ponctuellement à ce que vous m'avez commandé. Comment, lui dit le Roy? Ne t'auois-ie pas deffendu de dire

qui ne fust, l'explication des paroles que tu m'auois tenuës, & neantmoins ie sçay bien que ça eüsté toy qui l'as dit à tels & tels, qui te le sont venus demander. Il est vray Monsieur, respondit-il: mais ie n'ay rien fait sans que vous ne me l'ayez ordonné. Ils sont venus la premiere fois sans vous, & pour ce sujet, ie ne leur ay voulu rien dire: car vous m'auiez deffendu de parler que ie n'eusse veu vostre visage, à la seconde fois ils sont reuenus, & ne m'ont pas seulement monsté vostre visage seul, mais vne quantité de visages tous semblables au vostre, que voila, (& en disant cela il lui monstra toutes ses pieces d'or qu'ils lui auoient données, où l'effigie du Roy estoit marquée) ce que voyant ie n'ai fait aucune difficulté de leur dire tout ce qu'ils m'ont demandé. Le Roy fut encor plus étonné de la subtilité d'esprit de ce payſan, & iugant qu'il estoit malſeant qu'un homme de si bon sens fust en un si pauvre estat, dans un village, il l'emmena à la Cour avec lui, lui fit de grands biens, mesme quelques vns disent qu'il en fit son fauoré, & qu'il prenoit aduis de lui aux choses des plus importantes de son Estat. Tant un bon esprit est à priser par ceux qui le ſçauent connoistre.

Nai ſueri

Naïveté d'un Lacquais.

VN ieune garçon de village ayant esté receu lacquais en vne maison de Noblesse, comme il estoit tout neuf, sa maistresse lui fit vne leçon, lui disant, mon amy, apprend la ciuilité, & sçache que les lacquais de ceans ne portent iamais de chapeau, afin que ie ne voye iamais, ny mon mary, le tien sur ta teste. Ce pauvre garçon retint cela : Vn iour comme son maistre estant à la sale l'appelloit, lui estant à la chambre, & n'osant descendre avec son chapeau, il s'en alla vite-ment à son liét prendre son bonnet de nuit, son maistre voyant qu'il tarδοit, commence à crier, maraud veux-tu pas venir ; Incontinent il fut tout estonné qu'il parut deuant lui avec son bonnet de nuit sur sa teste. Ce que voyant, il lui dit, qu'est-celà mon amy, es tu malade, ou bien est-ce quelque mascarade que tu veux faire ? Nenny, Monsieur, respondit-il, mais c'est ma maistresse qui m'a dit qu'on ne portoit point de chapeaux ceans, c'est pourquoy ie me suis tardé à aller querir mon bonnet de nuit. le vous laisse à penser s'il y eut sujet de rire.

*D'un homme qu'on vouloit recevoir à
estre Prestre.*

VN ieune homme Diacre, nommé Mai-
stre Jean Bastier, allant aux Ordres pour
estre receu Prestre, qui ne sçauoit pas un
mot de Latin, ou fort peu avec, apprehendoit
extremement l'examen, comme celui qui
sçauoit bien qu'il demeureroit coert, en al-
lant, il faut attrapé de la ploye, en sorte que
pour se mettre à couuert, il ne peut faire au-
tre chose que de s'enfermer la nuit entre
deux meschâces nattes: mais comme il estoit
à descouuert, & qu'il pleuuoit en abondan-
ce, il ne laissa point d'estre mouillé depuis la
tête iusques aux pieds, & de geler de froid
toute la nuit. Le iour venu il se mit en che-
min, comme si de rien n'eust esté, & se rend
au lieu où estoit l'Euesque; comme ce vint à
l'interroger, il lui dit, que veut dire ce passa-
ge de l'Escripture : *Inter natos mulierum, non
surrexit maior Ioanne Baptista*. Ce pauvre
drosse qui entendoit aussi peu ce discours
que du haut Allemand, s'imagina qu'on lui
reprochoit la mauuaise nuit qu'il auoit
eüe. Ce fut pourquoy tout honteux, il dit,
qui vous l'a dit, Monsieur? comment, qui c'est
qui me l'a dit, lui dit l'Euesque, vous moc-
quez z

quez vous de moy ? Respondes à ce que ie vous demande. L'entendez vous bien; Ouy, dit-il, Monsieur. Expliquez le donc, lui dit l'Euesque. Voyez l'explication qu'il lui donna, *Inter natos mulierum*, entre les nates mouillées, *non surrexit*, n'a pas sué, *Maior Ioanne Baptista*, Maistre Jean Baptiste. L'Euesque ne prenoit point cela en raillerie au commencement, qu'il n'entendoit point ce discours: mais comme on lui eust expliqué, & l'accident arriué au pauvre Prestre, il en pensa mourir de rire.

D'un Docteur & d'une jeune Fille.

VN Docteur estant dans sa chambre, feuilletant ses liures, actif à la composition de quelque ouurage sérieux, il entra vne jeune fille à qui il demanda ce qu'elle vouloit. Je voudrois bien vous prier, lui dit-elle, de me permettre de prendre vn peu de feu à vostre cheminée. Prenez-en, lui dit-il, ma fille: mais vous n'avez pas où le mettre, il n'importe, dit-elle, ie ne laisseray pas d'en emporter. Elle s'approche du feu, & avec sa palette elle print vn peu de cendres froides au fond de sa main, & mit dessus vn charbon allumé. Comme ce Docteur vit cela, il fut fort esmerueillé, & iettant ses liures au

loing, il dit, ie proteste qu'avec toute ma science ie n'en eusse iamais sceu faire autant.

Gagente gagnée.

PERSONNE n'ignore que dans l'Isle Nostre Dame il y ait de parfaitement belles filles, & neantmoins aux promenades qui s'y font l'Esté apres souper, deux cadets d'allez bonnes familles & bien galantisez, faisant le tour de l'Isle l'Esté dernier, apperceurent sur vne porte vne fille fort peu aduanagée des traits de la beauté, mais qui estoit connue de l'un des deux gallands, & de l'autre non, & lequel dit à son camarade, l'on parle en beaucoup d'endroits des beautez de l'Isle, mais en voila vne bien mal faite, comment, dit celui qui la connoissoit, sçavez vous bien que c'est la plus belle du Cartier, c'est ce que ie ne vous accorderay pas, respondit l'autre, car i'en connois de cent fois plus belles; & si vous voulez gager ie mettray quatre Louys d'or contre deux, hé bien ie le veux, dit celui qui auoit connoissance de la fille, accostons la, & de fait s'étans approchez, & l'ayant saluée, celui qui la connoissoit lui ayant demandé où estoit sa sœur, la pria de la faire venir, il parut à la porte vne

autre fille encore beaucoup plus laide & mal faite que la premiere, ce que celui qui auoit le premier gagé, ayant bien contemplé, & apres quelques petits complimens, les deux cadets s'estans retirez; celui qui auoit gagé que la premiere estoit la plus belle du Cartier, dit à son compagnon, le bien trouue tu pas la premiere plus belle que la seconde, ouy, respondit l'autre, or bien aduoüe donc, dit le premier, que j'ay gagné la gageure, parce qu'estans toutes deux filles d'un faiseur de Cartes, la premiere est la plus belle fille du Cartier, dequoy l'autre bien estonné apres s'estre enquis si le pere des filles faisoit des Cartes, & s'il n'auoit que ces deux là, consentit à la perte de ses quatre Louys d'or, dont quelques iours apres eux & leurs amis firent grande chere chez Boquet.

Tour admirable d'une Larronnesse.

LEs Voleurs, ou plus honnestement les Filoux de Paris, ayant reconnu que la plus grande partie de leurs subtilitez auoiēt esté sceuës par le moyen de grand nombre de Marchands & autres personnes qu'ils ont affrontez dans Paris depuis vingt ou trente ans, & qu'ils auroient de la peine à se garantir de la corde s'ils estoient attrapez, se sont

aduisez depuis quelques mois d'instruire leurs femmes de diuerſes riles pour attrapper ceux qui ſe peuvent deſſier des maris, dont l'vn ces iours paffez ayant mené ſa femme à la fripperie, fit louer vn atout de Demoifelle paſſablement beau, moyennant vn eſcu pour deux iours, & l'ayant habillée la meine à vn loueur de carrolſe du Fauxbourg S. Germain, choiſit le plus beau carrolſe, le cocher le mieux habillé pour la mener au Palais, du Palais à la rue Aubry-Boucher, & de là à S. Mederic, paye le loiage du carrolſe, elle ſeule monte dedans, va deſcendre au Palais, où ayant fait vn petit tour, elle deſcend par la porte de S. Barthelemy, où voyant quantité de lacquais à louer elle en choiſit vn fort bien fait, & dont l'habit approchoit de la couleur de la caſaque du cocher, le louë, l'emmeine, & le fait monter derriere le carrolſe, & en cét equipage eſt menée en la rue Aubry-Boucher, où eſtant deſcendue chez vn Marchand de paſſemens qui la receut avec grand honneur, la croyant ce qu'elle n'eſtoit pas, elle lui demanda à voir de ſes plus beaux poinçets de Genneſ, à quoy le Marchand lui ayant obey, lui en fit voir de ceux de plus grand prix qu'il euſt en ſon magazin, & dont la gallande ayant fait

prix & choix d'un, ils en convinrent de prix à quinze cens liures, puis elle dit au Marchand, Monsieur, prenez celui-là & montez dans mon carrosse pour venir prendre vostre argent chez moy, qui n'est qu'en la rue de la Verrerie, ce que le marchand ayant creu, prend son manteau & son passément, monte en carrosse avec elle, dit au cocher, touche au Cloistre S. Mederic, j'ay là une parente à qui ie veux monstrier mon marché, & de fait le cocher ayant poussé ses chevaux & arresté devant le Cloistre S. Mederic, la Demoiselle dit au marchand, Monsieur donnez moy vostre passément, ie le vais monstrier à ma cousine; demeurez cependant dans mon carrosse: car ie ne feray qu'entrer & sortir, le Marchand qui se croyoit bien assuré de sa Marchandise, ayant un carrosse & des chevaux qui lui en respondoient, demeure dans ce carrosse, pendant que la Demoiselle gagne une petite ruelle, s'enfuit avec le passément, & ne la point veüe depuis, cependant il estoit dans ce carrosse, attendant tousiours son retour, & apres avoir demeuré en cette attente une heure, deux heures & trois heures en grande impatience, finalement voyant qu'elle ne reuenoit point, il demanda au cocher, mon

maistresse, comment s'appelle vostre maistresse, dit le cocher, la loueuse de carrosse: non, non, dit le marchand, la Dame que vous avez amenée icy: Monsieur, dit le cocher, ie ne la connois point, elle est venue ce matin loier ce carrosse, & en a payé le loüage, alors le Marchand demeura bien surpris, ce qui lui fit demander au lacquais, mon fils, di moy ie te prie, comment se nomme ta maistresse? à quoy le lacquais fit réponse, Monsieur ie ne la connois pas encor, car elle ne m'a loué au Palais qu'à midy, & m'a seulement donné deux sols pour auoir du pain pour mon dîner: comment, dit le Marchand, grandement emeu, vous ne la connoissez ny l'un ny l'autre? non ie vous iure, dirent le cocher & le lacquais: Ah! dit le Marchand, voila mon poinct de Gennes de quinze cens liures perdu, il auoit raison de le dire, car depuis il n'en a eu nouvelle, & bien fasché s'en retourna chez lui, le cocher ramena son carrosse en sa maison, & le lacquais s'en retourna au Palais chercher nouvelle maistresse ou maistre. Ce qui monstre qu'il se faut autant desier des femmes que des hommes de cette condition filoutique.

D'un Deuin feint.

ON appelle grillet vn petit animal noir-
raut, fait enuiron comme vne petite ci-
gale, qui crie la nuit dans les cheminées. Vn
certain villageois nommé de ce nôlà Gril-
let, auoit ouy faire tant d'estat des bons
morceaux, qu'il mouroit d'enuie d'en gou-
ster son saoul, n'ayant iamais mange de
viande plus delicate que du lard, encore à le-
che doigt. Il oyoit si fort louer les perdrix,
levraux, beccaces, canards, alouettes & au-
tres sortes de gibier, les vins delicieux, bis-
ques, entremets, & autres choses delicates
qu'on sert aux festins, qu'il ne vouloit point
mourir sans en taster, & sans faire trois repas
durant sa vie, où il n'eust rien à desirer, apres
quoy il ne se soucioit point de mourir. Mais
n'ayant pas de quoy contenter son enuie,
faut de moyens, il eut recours à vne inuen-
tion qu'il creut qu'elle lui reüssiroit, qui
estoit de contrefaire le Deuin, & de publier
par tous les lieux où il iroit (car il se resolut
de s'en aller par le monde) qu'il scauoit de-
uiner toutes choses, & si quelqu'un qui fust
puissât auoit besoin de son art pour deuiner
quelque chose de conséquence, il diroit qu'il
luy estoit impossible de rien deuiner qu'au-

parauant par trois iours conſecutifs il n'eust fait trois repas, depuis le matin iusqu'au ſoir, des viandes les plus rares & les plus exquisés qui ſe pourroient rencontrer dans le pays, & beu en grande quantité des plus excellens vins de toutes ſortes de façons. Croyant par ce moyen que le mettant en beſogne il aſſouuiroit ſon enuie à ſon aise, ſur l'eſperance que ceux qui le traitteroient auroient de recouurer les choſes qu'ils auroient perduës, ou autres curioſitez, & qu'après qu'il ſeroit venu à bout de ce qu'il ſouhaitoit, il s'expoſeroit aux coups de baſtons, aux eſtriuières, & aux plus rigoureux chaſtimens dont on le voudroit punir, iusqu'à la mort meſme, tant cette furieuſe fantaſie de ſe ſaouler à ſon aise, occupoit ſes eſprits. Il part donc avec cette reſolution, & au bout de quelques iournées ayant public le ſecret particulier qu'il auoit de deuiner toutes choſes, pluſieurs le voulurent employer, mais n'ayans pas le moyen de ſatisfaire à ſes appetits, & quand meſme la choſe euſt eſté, leur curioſité n'eſtoit pas ſi grande, ny les choſes de ſi grande conſequence, qu'ils l'euffent voulu achepter à ſi grands ſrais. Il continuë ſon voyage, & arriue en vn pays où il y auoit vne Dame de fort haute condition

condition , qui auoit perdu vn diamant d'une tres-grande valeur, que trois lacquais auoient derobé par ensemble. Cette Dame entendant parler qu'il y auoit vn deuin l'enuoye querir, & lui demande s'il pouuoit deuiner qu'est deuenu son diamant. Grillet le Deuin simulé, lui dit qu'asseurement il lui en donneroit des nouvelles ; mais que cela ne se pouuoit faire qu'avec le temps, & quelque despence. Elle demanda quel temps il falloit, & à combien monteroit cette despence, il dit qu'il demandoit trois iours de temps, & que toute la despence consistoit à lui faire durant ces trois iours, trois excellents & magnifiques repas , qui durassent chaque iour, depuis le matin iusqu'au soir: qu'autrement il ne pouuoit auoir la faculté de deuiner : cette Dame qui estoit extremement riche, & qui se soucioit fort peu de cette despence, qui pour elle estoit si peu considerable, commanda à son Maistre d'Hostel de lui donner toutes les viandes qu'il demanderoit. Il demanda celles dont il auoit ouy faire le plus d'estat, & dont il desiroit si fort en auoir par delà son saoul. Et là-dessus print congé de Madame , & fut conduit dans vne chambre qui lui fut destinée, on lui donna à souper, mais ce soupé là ne fut pas mis au

nombre de ses trois repas, qui deuoient durer toute la iournée. Estant couché, les trois lacquais qui auoient fait le larcin, estoient en vne merueilleuse apprehension de l'arriuée du Deuin : tenant pour tout certain que leur affaire seroit descouuerte, & que ce Deuin les accuseroit. Apres auoir consulté ensemble, ils résolurent d'attendre que ces trois iours fussent passez, & vn d'eux eut commission du Maistre d'Hostel d'aller servir Monsieur le Deuin durant son premier repas. Dès le matin, il se mit à table, fut seruy tout comme il auoit commandé, & ce lacquais qui soigneusement épioit toutes ses actions, estoit si fort en exercice à lui servir souuentes fois à boire, car comme il n'estoit pas accoustumé à cette sauoureuse liqueur des vins des plus delicieux, il reuisitoit souuent les brocs. Comme il fut saoul, il demanda à se coucher, & par hazard il ietta les yeux sur ce lacquais, en disant tout haut. Ah! Dieu mercy en voila desia vn. Les larrons croyent que tout ce que l'on dit, qu'on le dit pour eux, principalement cettuy cy ayant des sujets si grands d'apprehension, creut que cettuy cy vouloit dire, voila desia vn des trois larrons qui a dérobé le diamant. Mais son intention estoit autre, car il vou-

loit

loit seulement dire, Dieu mercy voila desia vn des trois repas que i'ay tant desiré. Ce qui fut cause que tout tremblant & effrayé, il s'en alla trouuer ses compagnons, leur con-
tant ce qui lui estoit arriué, en exagerant en-
cor les circonstances, que la peur lui auoit
fait remarquer beaucoup plus grandes, leur
donnant pour chose toute assurée que leur
larcin estoit descouvert. Ce qui les fit penser
à leur conscience, & resoudre ensemble pour
en estre encor plus esclaircis qu'un des
deux autres, l'iroit seruir le lendemain. Le
iour estant venu on recommence le festin au
Seigneur Grillet, où il fut seruy encor avec
plus d'apparat qu'au premier, & comme il
fut retiré en se voulant coucher, dit encor
tout haut en presence du second, en iettant
les yeux sur lui comme il lui sembla. Ah !
Dieu mercy en voila desia deux. Ce lacquais
tout effrayé fut pour donner la peur encor
plus grande à ses deux camarades, qui reso-
lurent que le lendemain le troisieme iroit
le seruir sa fois, & sur ce qu'il rapporteroit,
qu'ils resoudroient ce qu'ils auroient affaire.
La nuit se passe, le iour vient & de nouveau
on couure la table, & sert-on à l'accoustu-
mée. La Dame ayant tant de soin de son
Deuin que souuent elle enuoyoit sçauoir de

ses nouvelles, & s'il faisoit bonne chere: Le troisieme lacquais qui mouroit d'apprehension en le seruant, ne sçauoit ce qu'il denoit faire, & à chaque fois qu'il demandoit à boire, il s'imaginoit qu'il le monstroic du doigt en le menaçant. Car la peur qui a desia de grands fondemens, nous fait voir bien souuent des choses qui ne furent iamais. Ayant acheué de souper, il se met à rendre graces à Dieu, & à la fin de sa priere, il dit tout haut. Ah ! Dieu mercy les voila tous trois, ie ne desirois au monde autre chose, ie suis maintenant content, & n'ay plus rien à desirer. Toy, mon amy, dit-il, au lacquais, dis à Madame que i'auray l'honneur de la voir. Ce lacquais ayant le tout raconté à ses compagnons, ils ne douterent point du tout que leur vol estoit decouvert, & que des le matin il en aduestiroit Madame, ce qu'ils firent resoudre à s'aller tous trois de grand matin jecter à ses pieds, lui aduouer toute l'affaire, lui mettre le diamant entre les mains, le supplier d'auoir pitié d'eux, & de ne les vouloir point accuser, parce qu'indubitablement ils seroient pendus. Ce qu'ils firent dès le matin que le Seigneur Grillet fut esueillé, qui ne s'attendoit à rien moins qu'à vne si bonne nouvelle ; car comme son vin fut cué, & que

que le matin il ne se sentoît plus de sa bonne chere, il n'esperoit rien que le chastiment deu à vne entreprise si temeraire, dont la verité alloit paroître à son preiudice, & de bon cœur eust voulu en estre quitte pour deux cens coups d'estriuieres. Mais il fut bien estonné qu'au lieu d'un supplice, il se vid vne haute recompense preparée, avec l'esclat d'une reputation qui iroit bien loing, Il fait le serieux à ce discours, leur dit qu'ils auoient tres-bien fait de lui auoir franchement declaré cette affaire, quoy qu'il ne l'ignorast pas par le moyen de son art; mais que s'ils vouloient auoir leur pardon, qu'ils deuoient lui declarer toutes les particularitez de cette affaire; sçauoir qu'ad, où, & comment ils auoient attrapé ce diamant, ce qu'ils firent sans mentir d'un seul point, ce qui réjouyt fort le Seigneur Grillet, qui prenant le diamant, le fit en leur presence aualler à vn coq-d'Inde du logis, qu'il remarqua, puis print congé des trois lacquais, apres les auoir asseurez du secret, & s'estant fait conduire deuant Madame, il lui dit, qu'elle auoit perdu ce diamant en tel iour, à telle heure, en tel lieu & en telle compagnie, comme il auoit appris de ces trois lacquais, qu'en defaisant son gaud il lui

estoit tombé de la main, & qu'un de ses coqs-d'Indes passant par là l'auoit auallé, qu'on les fit tous venir deuant lui, & qu'il le reconnoistroit. La Dame fut rauie d'entendre ce discours, voyant que toutes les particularitez qu'il lui cottoit estoient veritables, elle commanda qu'on amenast tous les coqs-d'Indes deuant elle, ce que l'on fit. Alors le Seigneur Grillet reconnoissant celui à qui il l'auoit fait aualler, lui dit, Madame, le voila, faites lui ouurir le ventre & vous le trouuerez sur le peril de ma vie. La femme ne fut point paresseuse, elle lui fit ouurir le ventre, & trouuant son diamant, elle s'escria, ô l'excellent Deuin ! ô le grand Deuin ! & mesme ne se peut tenir de se ietter à son col, & l'emmenant chez elle, elle le fit disner à sa table, seïs coste à coste d'elle, & lui fit autant d'honneur, comme si ç'eust esté vn bien plus honneste homme, & le retint à souper & coucher au logis, en attendant qu'elle lui preparast vne foit honorable recompense. Peu d'heures apres le mary de cette Dame arriue, qui depuis huit ou dix iours estoit absent du logis. Elle lui conta à l'heure, comme heureusement elle auoit trouué son diamant, par le moyen d'un excellent Deuin, à qui elle auoit de particulieres obli-

gations. Ce mary qui estoit vn peu plus rusé que sa femme, ne peut si facilement croire qu'elle, qu'un homme eust le pouuoir de deuiner; se moquant de ces suppositions-là: mais elle lui assura la chose avec tant de sermens, qu'il eust enuie de le voir. On le manda, il comparoist deuant lui, il le trouue de si mauuaise mine, & d'un raisonnement si ridicule, que cela le confirma davantage en l'opinion qu'il auoit que sa femme s'estoit laissée dupper, on le renuoya dans sa chambre, & le mary se moqua de sa femme, d'estre de si legere croyance. La femme persiste avec d'estranges sermens, lui disant qu'il lui estoit facile d'en faire la preuve sur quelque autre chose. A l'instant vn grillet qui estoit dans la cheminée de la chambre de cette Dame, avec son cry, cry, les estourdissoit. Vn Page reuisitant la cheminée avec vn bout de chandelle, trouua ce grillet dans vn trou, & le presenta à ce Seigneur, l'ayant entre ses mains, & sa femme l'importunant de faire l'épreuve de ce Deuin, & qu'il en verroit encor plus qu'elle ne lui en disoit. Il commanda qu'on appellast ce Deuin, & pendant qu'on l'alla querir, il demanda deux plats sans que personne le vist faire. Le Deuin arriuant, ce Seigneur lui


dit, hé bien mon amy, vous faites icy le Deuin, & voulez passer icy pour tel, & ie sçay bien que tu n'es rien qu'un marand, & que tu ne le fais que pour penser attraper le monde; mais ie veux voir à present ce qui en est, car si tout presentement tu ne me deuine ce qui est entre ces deux plats, ie te feray donner cinq cens coups d'estriuiere, & te couperay les deux oreilles. Le pauvre Deuin fut bien attrappé, car il voyoit asseurement la fourbe decouuerte. Ce qui fit qu'en leuant les yeux au Ciel, il dit tout; Helas! pauvre Grillet, te voila pris. Il entendoit parler de lui-mesme, qui se nommoit Grillet. Mais ce Seigneur qui ne sçauoit point son nom, & qui n'entendoit point cette equiuoque, creut que veritablement il l'auoit deuiné, à l'heure ouurant les deux plats, & admirant la vertu de cet homme, il fut à lui les bras ouverts, & en l'embrassant, ie te demande pardon, mon amy; Va, tu es le plus habile homme qu'il y ait en l'Europe. Il lui fit mille caresses, & force honneur; on le mena coucher avec pompe, & le lendemain, on le fit magnifiquement déjeuner, & le chargea d'on d'or & d'argent, avec cent mille remerciemens. Voyez un peu s'il n'estoit pas plus heureux que sage.

D'un Curé de Domfront.


Domfront est vne petite ville de la basse Normandie, qui a le nom d'auoir plus de faux tesmoins, qu'en tout le reste de la Prouince. Elle est du ressort de l'Euesché du Mans, & d'autant que les Curez de ce Diocèse exigeoient de leurs Parroissiens des sommes excessiues pour leurs droicts, l'Euesque fit vn Reglement pour tous les droicts des Curez, pour les Baptêmes, Enterremens, Mariages, & Confessions. Mais le Curé de Domfront n'en vouloit baptiser aucun si on ne lui payoit quatre fois autant que l'Euesque leur permettoit de prendre par ce Reglement, ce qui donna lieu d'en faire plainte à l'Officiel, qui ordonna que ledit Curé ne prendroit d'oresnauant que la taxe qui lui estoit enjointe par le Reglement de l'Euesque, & le condamna à restituer le surplus qu'il en auoit exigé sur peine de faisie de son temporel, dont il se porta pour appellant comme d'abus à la Cour, deuant laquelle les parties firent production du Reglement de l'Euesque, & quantité de plaintes furent dressées contre lui, par plusieurs desquels il auoit exigé ces sommes. A quoy il respondit, Messieurs, ie vous supplie

de m'entendre, & ie vous diray la raison qui m'oblige à n'obeïr point pour ce poinct aux Reglemens de Monsieur mon Euesque, il est raisonnable que celui qui sert à l'Autel viue de l'Autel, ie les baptise tous, & ne les enterre point, on sçait qu'un enterrement nous vaut mieux que six baptismes, quand ie les ay baptisez, si tost qu'ils sont grands ils se vont tous faire pendre à Rouën pour faux tesmoins; tellement que ie fais priuez des droicts des enterremens, & ie n'ay pour tout que le casuel de ma Parroisse: car la dismee appartient à Monsieur l'Abbé de Saint Lo: De sorte que ie leur fais payer le Baptisme & l'enterrement quant & quant, m'obligeant quand ils seront morts, s'il y en a quelqu'un qui se fasse enterrer, lui rabattre le surplus sur les frais de l'enterrement, & pour preuve de cela, il apportat vne liste d'environ deux cens qu'il auoit baptisez, dont cent quatre vingts auoient esté pendus. A quoy la Cour ayant esgard, elle trouua sa raison bonne, cassa la Sentence de l'Official du Mans, & permit au Curé de se faire payer de l'enterrement quant & le Baptisme, aux conditions proposées par ledit Curé.


FIN.











B

V